

XTIIDZ NDZON DIOS MI_{NE} PQUIAA MATEW

¹ Jesús men ne pxeel Dios ga, lo xtii Abraham, lo xtii David, ga briequia me. Lëë grë xmengoldoo me nu:

² Abraham goc pxoz Isaac,

Isaac goc pxoz Jacob,

Jacob goc pxoz Judá (bio zla xpëed Jacob),

³ Judá goc pxoz Far ni Zar (Tamar brieelë tsieel Judá),

Far goc pxoz Srom,

Srom goc pxoz Aram.

⁴ Aram goc pxoz Minadab,

Minadab goc pxoz Naasón,

Naasón goc pxoz Salmon.

⁵ Salmóngoc pxoz Booz (Rahab brieelë tsieel Salmon),

Booz goc pxoz Obed (Rut brieelë tsieel Booz),

Obed goc pxoz Isaí.

⁶ Isaí goc pxoz rey David,

David goc pxoz Salomón (lëë Salomón ga gop tsieel Urí
wnaa ne bionie David).

⁷ Salomón goc pxoz Roboam,

Roboam goc pxoz Abí,

Abí goc pxoz Asá,

⁸ Asá goc pxoz Josafat,

Josafat goc pxoz Joram,

Joram goc pxoz Uzí.

⁹ Uzí goc pxoz Jotam,

Jotam goc pxoz Acáz,

Acáz goc pxoz Ezequí.

¹⁰ Ezequí goc pxoz Manasés,

Manasés goc pxoz Amón,

Amón goc pxoz Josí,

¹¹ Josí goc pxoz Jeconí (bio zla xpëed Josí).

Leñ dze ne nac Jeconí mëed, leñ dze co güeybee zhoo zha Babiloin grë zha Israel, beynie zho zho Babiloin.

¹² Babiloin, ga gol tib xpëed Jeconí brieelë Salatiel, Salatiel goc pxoz Zorobabel.

¹³ Zorobabel goc pxoz Abiud, Abiud goc pxoz Liaquim, Liaquim goc pxoz Azor.

¹⁴ Azor goc pxoz Sadoc, Sadoc goc pxoz Aquim, Aquim goc pxoz Liud.

¹⁵ Liud goc pxoz Leazar, Leazar goc pxoz Matán, Matán goc pxoz Jacob.

¹⁶ Jacob co nagon goc pxoz José, men ne ptsieelnia Marí. Marí goc xníaa Jesús, Men ne nacle diidz ga cxeel Dios guiaad lo guidzliu.

¹⁷ Zig choopchop bdzin lo dii co, dzigoraa brieequia Jesús. Tsiida zho wban desde Abraham haxta David; stsiida zho wban desde Salomón haxta leñ dze ne bey zho Babiloin; stsiida zho wban desde leñ dze co haxta bdzin dze ne goc me mëed.

Gol Jesús
(Lc. 2:1-7)

¹⁸ Znu bzhaac Marí grop José leñ dze ne ziaadyob gal Jesús. Gard ctsieelnia Marí loxaque xtiidz me no ne laa me ycaa José, zeene bnabey Espíritu Sant pqualo tib mëed zdo me. ¹⁹ Zeene bien Joséw, mine been me gocladz me mazd nsaan me Marí; sac sca rnabey ley ni zienalpaa me mine rnabey ley; per laa me gocladz zhlianse nzozit me, sacne racladz me nriee xquielto Marí. ²⁰ Zhgab co no me, tibaque blulo tib xanjl Dios lo me lo mcaal.

—José (xiag David) —rëb anjl co—, peet tsienied guic luu, pcaania Marí gac me tsieel luu; sac gon̄ mëdyeen̄ ne zoney me ga, Espíritu Sant bnabey pquialo win zdoo me. ²¹ Zeene gal̄ dze ne laa win gal, JESUS cueelë luu win, sca grieelë win sac win csilaa grë menladz win lo dol.

²² Ga brieequia min̄e bnee Dios padzeela, zeene bzeet zha ne biadnee xtiidz mew, rëb zho:

²³ Bii zan̄ to gan̄le zeene laa tib mëëdbgui yquiaalo zdoo tib wnaayeen̄ ne gard gnee mgui lo.

Zeene laa win gal, Emanuel grieelë win.

(Emanuel nac zig nacne rnee ne: Dioszhal ziaad lo ne.)

²⁴ Zeene bna José laa guic me goc tibli; bin me xtiidz anjl co laa me ptsieelnia Marí. ²⁵ Laa me wban tipse grop me per ib bgaald me Marí, haxta bded dze ne laa mëdyeen̄ co gol. Bdzin̄ dzew, laa win gol, dzigo bleelë José win JESUS.

2

Güeygan̄ bla zha rac Jesús

¹ Tib guiedz win ne ndxie xtan Judé lë Belén, ga gol Jesús. Lëetse len̄ dze co zob men̄ ne lë Herod nac me rey ne rnabey dan co.

Goc palal dzew, laa bla zha ne runbey lo mel ziaad nëz ne rlan ngbidz bdzin̄ Jerusalén, ² bnabdiidz zho rëb zho:

—¿Pa lo dien̄ no mëëd ne gac men̄ ne gnabey ladz to nu, mëëd ne griin̄ gol ga? Bdzion̄ no tib mel nëz ne no no, mel co blu lo no laa win gol-le, min̄ co ne ziaad no nu ziaaddzian̄ no win.

³⁻⁴ Grë menguiedz Jerusalén, zeene bin zhow bzee zdoo zho. Laa Herod, rien̄draa me zha gun̄ me, bnabey me pcaalsa grë zha ne nac pxoz non, grë zha ne rseed miech ley, bnabdiidz me lo zho dien̄ pa lo nac diidz gal Men̄ ne nole diidz cxeel̄ Dios guiaad lo guidzliu ga. ⁵ Dzigo rëbchaa zho lo me:

—Belén, guiedz ne ngab Judé ga none gal men co, sac scale zhobnee lo guits ne pquiaa zha ne pxeel Dios padzeela biadteed xtiidz me, zeene psiaab me guic zho znu bnee zho:

⁶ Tel Belén,

niicle ne winraaw lo grë guiedz ne ngab Judé, per nroob nona;

sac gon ga grieequia tib men ne gnabey,

men ne so yquiaanap grë men Israel, ne nac zho zha ne ngab lo naa.

⁷ Nacne zhlianse bnabey Herod gocredz gza zha rac co, bnabdiidz me lo zho dien blapaa dze rac psilo gon zho blan mel co.

⁸ Blozhse ga, dzigo pxeel me zho Belén, rëb me lo zho:

—Ga gołtsie gołtsieguib mëed co. Zigne gdziel to win, gołtëniegash diidz lo naa nu, zeena ye naa ga gagan naa win.

⁹ Blozhse sca pso me diidz lo zho, laa zho bio nëz stib laa zho zie. Laa mel ne gon zho brieequia nëz ne ziaad zho ga, laa ma neraque lo zho; haxta bdziñ ma ngali guic yu ne no mëdyeen co, gataa laa ma blëz.

¹⁰⁻¹¹ Zeene gon zho laa mel co blëz ga, per nli rley zho. Bzëeb zho len yu co, gon zho laa mëdyeen co no ga grop xniaa win, dzigo pquiitsgzhib zho lo win, bnee zho tib xtiidz zho lo win. Blozh ga blee zho ncuane zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgad zho lo win.

¹² Zeene laa gza zha rac co wbi Belén, laa ne nieted zho Jerusalén, stible nëz bzhen zho zey zho; sac bnee Dios lo zho lo mcaal, rëb me tsienied zho diidz lo Herod.

¹³ Laa gza zha rac co zey, zeene güeylulo tib xanj Dios lo José lëetse nixguies me, rëb anjl co lo me:

—José, na zeena guche i pcaanie mëdyeen qui nëz grop xniaa win, gołsë nëz Egipt, sac laa Herod yquiaguib win

gut me win. Egipt, ga cuëznie to win, na naaque guialnie diidz lo to zeene laa to gbi ga.

¹⁴ Guieel cogazh guche José, pcaanie me mëdyeen co nëz grop xniaa win, laa zho ziese nëz Egipt; ¹⁵ ga blëz me haxta bdzin dze ne laa Herod gut. Ga brieequia mine bnee zha ne biadteed xtiidz Dios padzeela, zeene znu bnee zho: “Nëz Egipt no xpëed naa, zeene bredz naa me.”

Bnabey Herod gut grë mëedlas

¹⁶ Laa zeene gon Herod wbiredraa gza men rac co nienie zho diidz lo me, per nli blëe me. Ntseeb rac me, pxeel me zha ne güey Belén ni grëraa guiedz ne ndxie gax ga, güeygut zho grëse mëedbgui yeen ne no grë guiedz co, desde win ne golnëz, haxta win ne rap chop iz. Tibaque nan me sca ngaa mëdyeen ne nac Jesús ga niet win, sac bleee me cuent zhile gac chop iz psilo gon gza zha rac co blan mel co. ¹⁷ Guieñëdox ne bio grë miech co, ga brieequia mine bzeet Jeremí men ne biadteed xtiidz Dios padzeela, zeene znu rëb me:

¹⁸ Tib redz nroob ne zëeb len guiedz Ramá. Grë wnaa Judá, zha ne ziaad lo xtii Raquel, mbanse rac zho, roon zho no zho xquieñë xpëed zho; zha rna zha ne cchoobladz zdoo zho, sac laa xpëed zho gut.

¹⁹ Goc palal dzew laa Herod gut, dzigo pxeel Dios tib xanj me güeynee lo José lo mcaal zaatne no José nëz Egipt, rëb me lo José:

²⁰ —José, guche i, pcaanie mëdyeen qui nëz grop xniaa win, golbire nëz Israel stib; laa zha ne quiana win ga gutle.

²¹ Dzigo brieenie José mëdyeen co ga grop xniaa win, bio me nëz laa me wbire zeynie win nëz Israel. ²² Per zeene bin José lëeque tib xpëed Herod men ne lë Arquelá, men co biaan xlugar Herod zobnabey xtan Judé, bdzieb José

ndziñnie me mëdyeen co nêz co. Dzigo bneeque Dios lo me lo mcaal tsie me nêz Galilé.

²³ Goł zho Galilé, bdziñaque zho guiedz Nazaret, ga wbannie zho mëdyeen co. Ga brieequia minë bzeet grë zha ne biadteed xtiidz Dios padzeela, zeene rëb zho: men Nazaret guiab miech nac Jesús.

3

Psilo Juan Bautist noseed me miech

(Mr. 1:1-8; Lc. 3:1-9, 15-17; Jn. 1:19-28)

¹ Len dze ne psilo Juan Bautist noseed Juan miech xtan zha Judé, dan zit ne no me ga; ² rnee me lo zho:

—ıGolsaan xquiełntseeb to, golnab lo Dios gun me to perdon grëtaa dol ne ziyun to; sac gon laa dze bdziñle laa me csilo gnabey!

³ Lëë Juan Bautist ga bzeet profet Isá, zeene znu pquiiaa me:

Bii zon miech ganle zeene laa tib tsi men zëëb tib dan zit, rnee me:

“Golzhixcuaa nêz ne ted men ne rnabey, golsaan grë guiełntseeb ne run to.”

⁴ Niapse guits lad camell niaa xab Juan, guid nac ncuane ndxie len me, ni niapse nguzhanch ni dzin dan row me.

⁵ Nzian grë menguiiedz Jerusalén, grë men Judé, grë men ne no gax ro guiubee Jordán, rriee zho riequiaadiag zho zhiwseed me. ⁶ Grë zha ne rxobdol grëse xtol zho, dzigo rchoobnis me zho ro guiubee co.

⁷ Laa zeene ran me grë zha farisé, zha saducé ne rdziñ lo me ga racladz zho ye zho chobnis, dzigo rnee me lo zho:

—ıMiech ngoopdol, masaque nac to zig nac meel! Nan to na lëë, loxaque chobnis to laa to laale lo grë guiełnëdox ne ziaadyob. ⁸ Led scada gon, none zaacse gban to zeena glu nli dib zdoo to psaan to grë xquiełntseeb to. ⁹ Ni

gacniatsde to guiab to loxaque por nacse to xtii Abraham, laa Dios csilaale to; sac gneli naa lo to ganle telne gacladz Dios, haxta grë quie zac gnabey me tsaalow miech ne gac zha xtii Abraham. ¹⁰ Nanle to ganle, grë yag nex, zeene rquiad nex low led rruga, rlozh ga rliaala lo gui, ga reca. Scadaa nagon gdzieelo miech ne gband zigne racladz Dios, sac rriequia laa me nzhenle xquiibyag me cchug me yag ne sca nac.

¹¹ 'Nli tib wrobnisse nu rnedz naa lo to, nacsew zig tib señ, sac lëë gdib rluw laa to psaan xquielntseeb to, laa to bzëëb xnëz Dios. Sangue men ne no guiaad ga, mesi Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa tib men non nac me, tel naa peet nond naa, per ni par tib ngundziin ne glit lab me raguald naa gac naa. ¹² Laa me guiaad zig tib zha ne rbeeguizh zhobxtil, sac zha co rlozhse runmbe zho zhob, rgotsow zhow, laa paj rielaal zho lo gui, ga reca. Per gui ne gzëëg grë paj ne guiadbee me ga, gdziind dze guiuuw.

Brobnis Jesús

(Mr. 1:9-11; Lc. 3:21-22)

¹³ Len dze co brieë Jesús nëz Galilé zie me nëz ro guiubee Jordán, laa me zie par cchoobnis Juan me. Bdziñ me ¹⁴ nëd Juan cchoobnis Juan me, rëb Juan lo me:

—Lëda i gon, naa none guial lo luu cchoobnis luu naa.

¹⁵ Dzigo rëb me lo Juan:

—Nli scaw, per mazd pchoobnis naa, sac gon ib nonguiela dziuun ne miñe rnabey Dios.

Dzigoraa pchoobnis Juan me. ¹⁶ Laa me zieriee lo nis zeene laa zhan gbaa bzial, gonpaa me zig rlu tib palom rlu Espiritu Sant laa me ziad-zëëb bdziñ me guic me, ¹⁷ ni blu zëëb tib tsi men co nëz gbaa rnee me:

—Xpëed naa gon nac men qui, rleynie naa me, men nziuu nac me lo naa.

4

Gocladz mendox niungüet ma Jesús

(Mr. 1:12-13; Lc. 4:1-13)

¹ Zeene blozh brobnis Jesús, dzigo güeynie Espíritu Sant me tib dan zit, zaatne guiend miech; ga gocladz mendox niungüet ma me niun me mine racladz ma.

² Zeene goc choo ngbidz choo guieel no me dan co ni tib lë peet rowd me, laa me pcaabedz ³ hor co bdziñ mendox zaatne no me ga, rëb ma:

—Telne nli Xpëed Dios nac luu, bnabey tsaalo grë quie rii ncuane gow luu.

⁴ Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵ Blozh ga güeynie ma me Jerusalén, blep ma me glaa guic yadoo nroob ne zob lad guiedz co, ⁶ rëb ma lo me:

—Telne nli Xpëed Dios nac luu, bringaa nu, benque led znu zhobnee lo Xtiidz Dios: “Znabey Dios grë xanj me yquiaanap luu, zha queedz luu, zeena ni tib quie ycaand ni luu.”

⁷ Pquiab me rëb me lo ma:

—Psoladz ganle, noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me ncuane nod gun me.”

⁸ Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuañ ndaan ne rap tib tib guiedz co, ⁹ rëb ma lo me:

—Bui ganle, grëse ncuañ qui gon gnedz naa lo luu telne squitsgzhib luu lo naa niina, gunnon luu naa.

¹⁰ Horco pquiab me rëb me lo ma:

—¡Biche lo naa nu meḅdox! Znu goḅ zhobnee lo Xtiidz Dios: “Diosse nac meḅ ne rnabey, mese none gunnon luu, lo me rieguiaḅ yquiiitsgzhib luu; ni miḅne rnabey me miḅ co none guḅ luu.”

¹¹ Dzigoraa biche ma lo me, dzigo bdziḅ bla anjl bdeed zho ncuaaḅ dow me.

Psilo Jesús pseed me miech nëz Galilé

(Mr. 1:14-15; Lc. 4:14-15)

¹² Zeḅne bin Jesús laa Juan biab ladzguiib, dzigo briece me ga güey me nëz Galilé, guiedz ne lë Nazaret.

¹³ Zhisaque goca, briece me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtii Zabolón ni zha xtii Neftalí. ¹⁴ Ga briecequia miḅne bzeet Isá (meḅ ne pxeel Dios padzeela biadnee xtiidz me), zeḅne psiaab Dios guic Isá rëb Isá:

¹⁵ Grëse meḅzit ne ndxie xtan Galilé, nëz daḅ ro guiubee Jordán, gax ro Nisdoo Galilé, zaatne goccheḅ Zabolón ni Neftalí;

¹⁶ miech ne no lo ncow nac zho, per niina tib biini nroob biab lo zho. Ladzniale guielgut no zho, per laa biini co biab lo zho par griece zho ga.

¹⁷ Ga psilo Jesús pseed me miech, rnee me lo zho csaan zho xquielntseeb zho, gbig zho lo Dios, sac laa dze ne csilo gnabey Dios ziaadgaxle.

Bredz Jesús tap ngoozmeḅ

(Mr. 1:16-20; Lc. 5:1-11)

¹⁸ Leḅ dze co, tib dze zieded Jesús gax ro Nisdoo Galilé goḅ me chop ngoozmeḅ, tib zho lë Simón Pedr, stib zho lë Ndrés; grop bets zho lëetse laa zho noroḅ guieḅ ne rgaa meḅ lo nis. ¹⁹ Dzigo bredz me zho, rëb me lo zho:

—¡Goltë goltëna! zhits naa! ¡Laa naa cxel to tsie to stib gooz, tsietop to grë miech ne sëëb xnëz Dios!

²⁰ Horcogazh psan zho guïex ne rgaam mel ga, laa zho zïena! zhits me.

²¹ Zhisaque bzë me ro nis co, gon me laa Jacob ni Juan (lëë grop xingan men ne lë Zebedé ga) no tib len barcw gza pxoz zho, noquiaabdie zho guïex ne rgaam mel; dzigo bredz me zho. ²² Zigne bredz me zho biaannïeque pxoz zho barcw ga, laa zho zïena! zhits me.

Zëëb diidz grëtaa milagr ne run Jesús

²³ Dipse xtan zha Galilé, guïedz ne rdzïntaa Jesús rie me grë yadoo ne zob lad guïedz co rseed me miech Xtiidz Dios, rnee me lo zho zha racladz Dios gban zho, ni runguïac me grë men rzacnë, tel pe guïelguïidztaa rzac zho.

²⁴ Tel pa lotaaw zëëb diidz scataa run me grë milagr, haxta nëz Siria bin miecha. Nzian grë men co brieë ga bdzïnnïe zho grë zhimguidz zho lo me: no grë men rzacnë co noguitnie mendox, no zho rlan guïelguidz gutye, no zho gutoo dipse xcuerp, no zho rlan grë pe stib guïelguidz, nogaa zho rlan grë pe yoob; grëse zho beënguïac me zho.

²⁵ Zaatne zieetaa me, miech guïzhiu ne na! zhits me, grë zha Galilé, grë zha Decápolis, grë zha Jerusalén, grë zha Judé, haxta grë zha ne no stib nëz ro guïubee Jordán.

5

Cho nac zha ne wen zie
(Lc. 6:20-23)

¹ Tib dzew, gon Jesús laa grë miech guïzhiu co bdzïn lo me, dzigo bzoquia me glaa tib guic gui win. Ga zob me, bdzïn grë xpëëdsuel me lo me, ² dzigo psilo me pseed me zho, rëb me:

³ —¡Wen zie zha ne rien ib none gbig zho lo Dios, sac ib zdzïn zho zaatne rnabey me!

⁴ ;Wen zie zha ne mban rac roon niina, sac schoobladz Dios zdoo zho!

⁵ ;Wen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

⁶ ;Wen zie zha ne racladz gun grë minë rnabey Dios, rzac zhow zigne rzac zha ne rcaabedz, zha ne rnabгаа zhis, sac ible zacnie Dios zho parne grieelo gun zhow!

⁷ ;Wen zie zha ne rquia zdoo miech, sac zigne rquia zdoo zho samiech zho scaque Dios squia zdoo me zho!

⁸ ;Wen zie zha ne mbele zdoo, zha ne biaanmbele lo xtol, sac zanlo zho Dios!

⁹ ;Wen zie zha ne noxco zaacse gban miech, tilđ zho, sac masaque mëed gac zho lo Dios!

¹⁰ ;Wen zie zha ne loxaque porne quiayun zho minë rnabey Dios, rquianał miech zho, sac ible zdzin zho zaatne rnabey me!

¹¹ 'Zig nac to, zeene csilo grë miech yquiaago zho to, ctsidil zho to, yquiadiidzguizh zho to loxaque ne rililadz to naa, ;wen zie to ga! ¹² ;Nley golco zdoo to, nguieel golgac, sac gon tib guiełnzaac nroob ne gneedz Dios lo to! Golsoladz ganle, scaque been zho grë zha ne pxeel me padzeela biadnee xtiidz me.

Nac to zig nac zed, zig nac biini

(Mr. 9:50; Lc. 14:34-35)

¹³ 'Masaque nac to lo guidzliu rii zig nac zed. Nanle to ganle pa lotaa rquiin zed, per telne nzhida, ;pa dien rquiina? ;Lëe gdib rliaala lo guizh, zaatne rded rzë miech rzëeni zhow!

¹⁴ 'Nac to zig tib biini ne noziini lo guidzliu. Grieelod tsongueets to, sac tib guiedz ne ndxie glaa tib guic gui, grieelod tsongueetsa. ¹⁵ Golguien ganle nacd biini parne tsolana, sinque parne gziiniw lo grë miech ne no len yu.

¹⁶ Zaacse sca golgac, minë rquiin min co golgun, masaque

lëew gac zig tib biini; zeena zeene gan miech biini co zien zho ganle pa lotaa men nroob nac Pxo_z to men ne no gbaa.

¹⁷ 'Guiabde to togo bod laa naa zial zialtichee naa ley ne psan Moisés, o grëgaa mine bnee zha ne biadteed xtiidz Dios padzeela; sac led mincod zial naa, sinque laa naa zial gun naaw zigne no gaca. ¹⁸ Gneli naa lo to ganle: Laga niaa guidzliu rii, laga niaa gbaa, ib none gac mine zhobnee lo ley, mine bneegaa zha ne biadteed xtiidz Dios, ni tib lë paat gdzëeda. ¹⁹ Gacxe waa zha ne quiits tib ley niicle mine mazdraa wina, ni cseed zho miecha zigne run zho ga, ib tedsod zha nac zha ne mazdraa win guiaan lo grë zha ne ygaa zaatne rnabey Dios. Sangue zha ne guna zigne rnabeya, ni cseed zho miech scaque tsienal zhow, zha cosi nroob gacnon zho lo grë zha ne gdziñ zaatne rnabey Dios.

²⁰ 'Rso naa diidz lo to sca, zaacse golgac gunde to zigne run grë maistr ley, grë zha farisé; sac telne tsoxcode to gban to zigne racladz Dios, grieelod gdziñ to zaatne rnabey me.

*Nodne gut miech
(Lc. 12:57-59)*

²¹ 'Led nanle to ganle, no tib ley ne biaan lo xmengol to padzeela, rneew: "Gute luu samiech luu"; rnabeya zha ne gut samiech, ib none guetaque zho, quizhgazh zho dol co. ²² Sca rnee ley co, per zig nac zha ne gon në rac zdoo ran samiech, rrieequia beetle zho ga, ye zho riegual quizh falt co. Zig nac zha ne gnee pe tib diidznë lo samiech, none gacredz zho lo wxtis zeena gunquizh zho zho dol co; zha ne quiegaa samiech, lëëque zha rguib guey zho gabil ga.

²³ 'Gacxe waa tel ziesan to tib gon, per lo pcoogle zo to rsoladz to rdilnie to tib samiech to, ²⁴ gase golsan gon co, goltsie goltsienabgazh perdon lo zha ne rlëe to lo ga, gbireraa to dzigo gdeed to gon co. ²⁵ Zha ne sca rlëenie

to, goltsoxco pront golguiaan wen; zeena tsiezod zho to lo wxtis, sac tel laa zho tsiezo to lo wxtis ib znabey wxtis tso to ladzguiib. ²⁶ Gneli naa lo to ganle grieede to ga, haxtaque lozh quizh to grë dimi ne gnab wxtis lo to.

Nodne tsonie miech zha ne led tsieeld zho

²⁷ 'Nanlaque to ganle zha rnee stib ley ne biaan lo xmengol to, rneew: "Zha ne nole tsieel, zigtaa mguiw zigtaa wnaaw, nodne tsonie zho zha ne led tsieeld zho."

²⁸ Per zig nac zha ne gon, ran tib wnaa ni rsilo zho riogui zho tsonie zho wnaa co, laa zho bdiitsle ley co.

²⁹ 'Gacxe waa, bziaalo to mine rquiaqui runctal to xtol to, mazd golcueegazha; niicle tel bziaalo derech tow. Peet nacd nitlo tib lëque xcuerp to, lëdle dib nacsew tsietsobe gabil. ³⁰ Laa tel niagaa tow, mine rquiaqui runctal to xtol to, niicle tel nia derech tow, golchuggazha. Peet nacd nitlo tib nia to, lëdle nitlo to len gabil dib nacse xcuerp to.

*Nodne csëbtsieel miech
(Mt. 19:9; Mr. 10:11-12; Lc. 16:18)*

³¹ 'No stib ley znu rnee: "Mgui ne racladz csaan tsieel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa." ³² Per gni naa lo to ganle: telne quiangobd tsieel zho stib mgui, ni rsëbtsieel zho, lëëque zha rguib ga yquianie tsieel zho stib mgui. Mgui ne ctsieelnia wnaa co, dol ga gun zho, sac gon nole tsieel wnaa co.

Nodne yquidie miech

³³ 'Ziyon to ganle zha nac stib ley ne biaan lo xmengol to rneew: "Zha ne gzeet lë Dios par glu zun zho mine bnee zho, yase zeene gdeed zho tib gona, gungaa zho pe tib dziina, ib none gun zhow." ³⁴ Per gni naa lo to ganle: nodne sca gzeet to lë Dios, per ni gbaa nodne ne sca gzeet to, sac gon ga nac zaatne zob Dios; ³⁵ per ni guidzliu, sac

lo guidzliu nac zaatne zo ni me; per ni Jerusalén, sac ga nac guiedz nroob ne rnabey me; ³⁶ guiaabгаа to gzeet to guic to. Gunscade to, sac gon zig nac guic to, per ni tib guitsguic to grielod csan nquits to, grielodгаа csan ngas tow. ³⁷ Gacxe waa ncuaane rgobey to zrieelo gun to, golguiab: “zun naaw”, togo riengaa to grieloda, golguiab: “griyeloda”; tsođe to dieen cho gzeet to, sac gon led Diosdraa rnabey min co.

Nodne ctsire miech guieInë

(Lc. 6:27-36)

³⁸ No stib ley znu rnee: “Tel cuee zho tib bziaalo luu, guiaand luu scase bleeque stib bziaalo zho, tel cueegaa zho tib lay luu, scaque been blee stib lay zho.” ³⁹ Sangue naa laa naa rso diidz lo to gon, gunscade to; zha ne gacntseeb lo to, gacndaande to lo zho. Tel cap zho lo to, tiblise golgac, ib gunde to glisague nia to.

⁴⁰ Zha ne tsiezo to lo wxtis, ni lozh ga haxta gla zho xibiaagw to, golsaan güey zhow haxta xabnal to goldeed lo zho. ⁴¹ Zeene griequia zha ne gnabey to güey to xyo zho tib groi hor, golgüeya, haxta tib hor goltsie güey tow.

⁴² Zha ne gnabtaa pe cos lo to, goldeeda; zig nac zha ne ziadtiin, goldeed ncuaane ziadtiin zho, ctsirede to zho scase.

⁴³ Ziyonle to ganle no zha ne znu rnee: “Zha ne rdzieel xtiidz luu bleynie zho, scagaa zha ne rlëe lo luu, blëenie zho.” ⁴⁴ Per led scada gon, inone zaacse gac to lo zha ne rlëe lo to! jZha ne rgodee to, golnab lo Dios gunlay me zho! ⁴⁵ Zeena sca glu nli xpëed men ne zob gbaa nac to. Golgan ganle tel me rnabey me rziini ngbidz lo grëse miech, zigtaa lo zha wena, zigtagaa lo zha ntseeba; scaque nisguie me rsiaaba rquiin zho grëse zho, rbed me dien cho ngable lo me, chogaa ngabd lo me. ⁴⁶ jGase nasca golwi! Tel loxaque zha ne ndzieeldiidz to zha cose rleyne to,

¿niacxe zгаа to guielnzaac ne gdeed Dios? Haxta zha ne mazdraa ntseeb run min co. ⁴⁷ Tel loxaque zha ne nacse menlidz to, lo zha cose zaacse rnee to, ¿pe lëë guielwen ga na rlu to? Haxta zha ne runbeyd Dios run min co. ⁴⁸ Goltsoxco sca ndzinli golgac, zigne rleynie Pxoз to (men ne zob gbaa) grëse miech, scaque none gun to.

6

Zha ne run xyudar samiech

¹ Zeene gun to xyudar samiech to, ib gunde to zaatne ndxiepaa miech ga so to glu to xquielwen to, par gan zho mine run to. Telne sca gun to, ygaade to guielnzaac ne gdeed Pxoз to men ne zob gbaa. ² Gacxe waa, zeene gun to xyudar zha ne guien pe yquiin, gooldide tow zigne run grë zha ne rquiaalo rquia zdoos samiech; sac zha co tel pe ncuane rgad zho, rzo zho len yadoo, rzo zho ro nëz rlozhd yquiaabdzie zhow par gacnanpaa miecha, zeena zha ne gona guiab zho: ¡Zha wentaa zha qui! ¡Gneli naa lo to ganle ne sca riannziuu zho lo miech, lëële gdib guielnzaac ne yгаа zho ga!

³ Golguien sca, zeene gun to xyudar zha ne no tib liaadz, choot lo gzodiidzde tow, per ni zha ne mazdraa ndzieeldiidz to nodne gacnana. ⁴ Dzigo scagaa Pxoз to nroob guielnzaac ne gneedz me lo to, sac tel me grësew ran me.

Zha gzodiidznie miech Dios

(Lc. 11:2-4, 34-36; 12:22-31, 33-34; 16:13)

⁵ Scaque zeene gzodiidznie to me, gunde to zigne run grë zha ne rquiaalo miech wen nac zho. Sac tel zha co zeene rzodiidznie zho me, rzo zho zaatne ganpaa miech zho, zig nac len yadoo, zig nac len guiedz zaatne rded rzë miech. Gneli naa lo to ganle lëële guielnzaac ne yгаа zho ga. ⁶ Golguien zeene gzodiidznie to me, golsëëb len lidz

to dziits gol̄sioog ro yu, ga gol̄zodiidzn̄ie me. Ible tedsod nroob guiēln̄zaac gneedz me lo to, sac niicle ncuaāne mazdraa nguets zhliana, ran̄ mew.

⁷ Ni zeene nozodiidzn̄ie to me, gūnde to ncuaāne nonee to l̄eew rlozh, l̄eew rsilo zigne run̄ gr̄e zha ne run̄beyd me. Sac zha co rzac zho por nroob diidz gnee zho, por nzian vuelt gnee zhow dzigo squiaadiag mew. ⁸ Gūnscade to, sac me ne nac me Pxōz to gardle gnee to xliaadz to lo me laa me nan̄le pe nac ncuaāne rquiin to. ⁹ Gacxe waa zeene gzodiidzn̄ie to me, znu gol̄nee:

Dios, luu ne nac luu Pxōz no, zob luu gbaa;
luuse nac men̄ ne mazdraa ndzon.

¹⁰ Luu nac men̄ ne gnabey no,
mine gnabeytaa luu zigne raca gbaa,
scaque none gaca lo guidzliu nu.

¹¹ Been̄ guiēln̄zaac bneedz ncuaāne dioow no nadze.

¹² Bzhiguiel̄ been̄ no perdon gr̄ese dol̄ ne ziodziuūn no lo
luu,
zigne rdziuūn no samiech no perdon gr̄e falt ne run̄ zho
lo no.

¹³ Gdeete luu diidz yquuil mendox no,
been̄ guiēln̄zaac bla no lo ma.

Luu nac men̄ ne rnabey, men̄ ne rap poder, men̄ ne
mazdraa nroob. Mine rnab no nu, ndionpaa no
zun̄ luuw.

¹⁴ 'Sca nagon̄ none gnee to. Ni gol̄gona gan̄le, zha ne
gon̄ gūn samiech zho perdon tel̄ pe nactaa falt ne been̄
zho lo zho, scaque Pxōz to men̄ ne zob gbaa, zun̄ me zho
perdon. ¹⁵ Zha ne gūnd samiech zho perdon, niicle megaa
gūnd me perdon xtol̄ zho.

¹⁶ 'Stiba, zeene nocuan to nozodiidzn̄ie to me, gūnm-
bande to lo to. Sac gr̄e zha ne rquiaalo miech wen nac zho,
sca run̄ zho; zeene nocuan zho xtsiinpaa run̄ zho run̄mban

zho lo zho par gan miech laa zho nocuan. Gneli naa lo to ganle, zha ne sca run lëele guielnzaac ne yгаа zho ga. ¹⁷⁻¹⁸ Gunscade to, nguieel golgac ine golzëë biegw guic to, golquiib lo to, zeena ni tib choot guiend laa to nocuan, loxaque Pxoз to gacnana, sac grëse ncuaane rac ngeets ran mew. Grëse ncuaane rac, me rana, me nac men ne needz tib guielnzaac nroob lo to.

¹⁹ Tsienalde to loxaque dien zha gapchen to lo guidzliu rii, sac nac ncuaan lo guidzliu rii rban ngbaana, rnitlo mxila, haxta noxtseeb guioochena. ²⁰ Mazd goltsoxco yгаа to guielnzaac ndzon ne no gbaa, sac mine no gbaa, led yed min co guioochen, led yed min co cuan ngbaan, led yedgaaw gnitlo mxil. ²¹ Golgona ganle, guielnzaac ne gon gunlo to, ga glu pa gdzin xalm to, sac zaatne gunlo to guielnzaac co ga nac zaatne gdzin xalm to.

²² Rriequia nac bziaalo to zig nac tib biini. Telne niapse lo grë ncuaane ndzinli rwi to, dzigo gdipse xcuerp to no lo guielbiini. ²³ Laa telne loxaque lo grë ncuaane nonguield rwi to, dzigo gdipse xcuerp to no lo guielcow ga. jZha rnazhe lo guielcow co, tel lëëque biini noyac guielcow!

²⁴ 'Golgona ganle, grielod gon gleynie to dimi, ni gleynieque to Dios. Ib none telne Dios rleynie to, me none gleynie to, togo dimigaaw, dimi golleynie.

²⁵ 'Gacxe waa, gni naa lo to ganle: Tsoде to zhgab dien zha gban to lo guidzliu rii, pa grie pe gow to, pe guie to, pe gacwxabгаа to. Stiba, jniacxe mazdraa non guielwagw lo xquielmban to? Xabгаа tow, jniacxe mazdraa nona lo xcuerp to? ²⁶ Golwi lo grë mguin ganle, led yed ma rquia gon, led yed ma rquia wlaap, led yed ma rgotsow pe guielgon, per row ma, sac Pxoз to men ne zob gbaa, men co rdeed ncuaane row ma. jTel to gon, mazdraa non to lo grë mguin co! ²⁷ Ni lalnu paat rquiinda tant tso to zhgab.

Telne guiab to tso to zhgab dien zha gacnool xtse to spalal yeense, ĩniacxe zrieelo to gunnool tow?

²⁸ Zig nac lar, ĩpe nacne tant tso to zhgab dien pe gacwxab to? Pe rwide to lo grë guiee ne ganle zëëb dan, zha rrooba, led yeda rio zhgab dien zha gacwxaba, per niow rnaw; ²⁹ gni naa lo to ganle, per ni rey Salomón con grë xab niazh me, blud me scataa niow.

³⁰ Gase na ganle golwi, niicxe grë guiee dan co na, zna dze zob nguiaw, gzhe widz laaw bidzle, laaw tsecle, ni scataa niow rgacwxab Diosa, ĩpe leĭ to dzigo ygacwxabd me, niicle ne squi gard guien to dib zdoo to gnalo to me?

³¹ Tsode to zhgab sca guiab to: “ĩBay pa griee pe dioow ne, pa griee pe dio ne, pa griee pe dziaacwxab ne?” ³² Grë miech ne runbeyd Dios, tibaque zhgab co rio zho. Sangue to golsoladz ganle, Pxoꝝ to men ne zob gbaa, nanle me pe nac grë xliaadz to, ³³ me nac men ne gneedz ncuaane yquiin to, per ib none glo tsoꝝco to gban to zigne rnabey me. ³⁴ Golguien sca tsode to zhgab dien zha ted to gzhe widz, sac gzhe widz co zhaalaeque xco ne ziaad. Tib tib dze zhaase zhaase zhgab ne ziaadniew.

7

Nodne gzee zdoo ne cho zha rac

(Lc. 6:37-38, 41-42)

¹ Blozh ga rëbchaa me lo zho:

—Golguien, ib gunde to në gac zdoo to zeene ran to ncuaan nonguield ne run stib miech, sac to tozhal gunquizh zhow; zeena scagaa Dios, gunscad me to. ² Sac gon tel zha rzac to samiech to, scasaque sac Dios to.

³ ĩLëda ga gon tso to lozhd gzee zdoo to dien cho pe run, ni nenda mazdraa mine run to! ⁴ ĩPe ro to glisqui to mine run stib zho, ni tel mazdraa nac mine run to? ⁵ ĩGolguien sca glude to ncuaane nacde to! Glo goltsoꝝco ndzinli gac

to, dzigo lozh ga zac tsienee to lo stib zho zha gacndzinli zho.

⁶ 'Ndzon nac Xtiidz Dios, gdeete tow lo zha ne rlëeniew, sac gon rrieequia lo mëcw ga gdeed tow, ib zun zho mine run mëcw zacntseeb zho lo to. Naca zig nac quie perl, gdeete tow lo zha ne rleynieda, sac gon rrieequia lo nguts ga gdeed tow, tel ngutsa niicle ncuaane mazdraa non glaal zho lo ma, loxaque gzëeni maw.

Ncuaane gnabtaa ne zгаа new

(Mr. 1:22; Lc. 6:31, 43-44, 47-49; 11:9-13; 13:24-27)

⁷ 'Ncuaane rquiin to, golnaba lo Dios, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzlë me, scagaa me scaania me to.

⁸ Sac grëse zha ne rbig lo me rnab zho ncuaane rquiin zho, rdeed mew. Zha ne rguib ncuaane racladz, racnie me zho rdziel zhow. Zha ne rbedzlë me, rcaania me zho.

⁹ 'Golwi ganle, zig nac to zeene rnab xpëed to quiet gow win, ĩniacxe ziazh to co to tib quie nia win? ¹⁰ Zeene rnabгаа win mel, ĩniacxe zdeed to tib meel lo win? ¹¹ Led rioxco to lëë niapse ncuaane wen rdeed to lo xpëed to, niicle ne miech ntseeb nac to. Telne sca rioxco to xpëed to, pelej Pxo to dzigo, men ne zob gbaa, tsoxcd me to. Ib tedsod grëse zha ne gnab lo me gdeed me ncuaane rquiin zho, zdeed mew.

¹² 'Zha ne racladz ndzinli gac miech lo zho, none glo zho zaacse gac zho lo miech. Zigtaa ley ne psan Moisésa, zigtagaa mine bnee grë zha ne biadteed xtiidz Dios padzeelaw, sca rnabeya.

¹³⁻¹⁴ 'Goltsoxco sca tsienal to mine rnabey Dios, niicle ne nac guielmban co zig nac zeene rzë ne tib nëz nia. Zhis zha ne rzëëb nëz co, per nëz co zгаа miech guielmban ndzon ne rdeed Dios. Sac gon zha ne mban zigne notaa

guic zho, rrieequia tib nēz nzhen ga zie zho; ndal miech ne zie nēz co, per nēz ne nitlo zho ga zie zho.

¹⁵ 'Nsin goḷso lo zha ne gacladz yquidie to gnē zho xtiidz Dios noteed zho, niicle ndooladz rlu zho pale cho grē mēcwxiiḷ yeeḷ, per zha ntseeba, masaque nac zho zig grē coyot blē. ¹⁶ Zigne runbey miech tib yag por nex ne rquia low, scaque wen wen goḷwi zha nac ncuaane run zho, dzigo ga gunbey to cho nac zho. Sac goḷ zig nac uv, rquiada lo yag guiets; niicle guigwgaaw rquiada lo grē lbē guiets. ¹⁷ Tib tib yag nex rdeedsew xnexa. Tib yag wen, nex wen rquia low; scagaa yag ncuaana, nex ncuaan rquia low. ¹⁸ Grieelod yquia nex ncuaan tib lo yag ne rquia nex wen, ni grieelodgaa yquia nex wen tib lo yag ncuaan. ¹⁹ Gacxe waa grē yag ne rquia nex ncuaan, paat rquiinda, lēē gdib rruga, rlozh ga rzēēg zhow. ²⁰ Miḷ co nagon rne naa lo to, zha ne sca guiaad, por ncuaane run zho ga gunbey to cho nac zho.

²¹ 'Grē zha ne rnee noxco zho miḷne rnabey Dios, no zho lega rneesew. Nenda haxta rnee zho, naa nac men ne rnabey zho, per gdziḷd zho zaatne rnabey Pxoz naa. Sac zha ne nḷipaa run miḷne rnabey me, zha cose gdziḷ ga. ²² Gaḷ dze co, nzian zha ne grieequia gnē lo naa: "Conque rdziuuḷbey no luu, blactaa name bio no bionee no Xtiidz luu lo miech, nzian milagr ne bdziuuḷ no, haxta menḷdox bdziuḷcxoon no zeene bzeet no lē luu." ²³ Niicle sca gnē zho, ib ycaaniad naa zho, sonēz naa zho; sac ni lalnu beēḷd zho ncuaane ndzinli.

²⁴ 'Zha ne rquiaadiag miḷne rne naa, ni rioxco zho rban zhow zigne naca, rrieequia nac zho ga zig tib zha ndzielguic ne bzaa lidz zaatne nac tib lo quie. ²⁵ Niicle riab guiedox per peet racd lidz zho, niicle rriee medox, nis naal ne raclo rded zaatne zoba ga, per rbixcheda.

²⁶ 'Laa grë zha ne rquiaadiag xtidz naa, ni rioxcod zho gban zhow zigne naca, ziaad gac zho ga zig tib zha nxen ne güeyzoob lidz zaatne nac tib lo yuzh. ²⁷ Znuse bñitlo lidz zho, sac zeene biab guiedox, lo medox ne brieë, lo nis naal ne goclo bded zaatne zoba, znuse bixchew, ni stib lëw biaand.

²⁸ Zeene blozh bnee Jesús, grë miech ne noquiaadiag ga, per nli rzee zdoo zho gon zho zha rseed me, ²⁹ sac rlu men rñabey nac me, led yed me rseed miech zig rseed grë maistr ley.

8

Biac tib mgui ne rlan lepr

(Mr. 1:40-45; Lc. 5:12-16)

¹ Laa Jesús ziad-zëëb cho gui win co, miech guizhiu ne naļ zhits me, ² tibaque brieëquia tib mgui ne rlan guiedzdox ne lë lepr, wbig me pquitsgzhìb me lo Jesús, rëb me:

—Tebaa siguieel luu gunguiac luu naa.

³ Dzigo pxobnia Jesús guic mgui, rëb Jesús:

—Zunguiac naa luu. ¡Niinagazh laa luu guiaanmbe!

Horcogazha laa grë guiedz co bñitlo. ⁴ Dzigo rëbchaa Jesús lo me:

—Bina ganle, choot lo gzodiidzd luu gon zha biac luu; sinque güey lo pxoz güeyšan gon ne rieguial gdeed luu zigne rñabey ley ne psan Moisés, zeena gan zho ganle laa luu biacle.

Biac tib zha ne rquia dziin tib lo menguiib

(Lc. 7:1-10)

⁵ Loxaque bdziñ Jesús guiedz Capernaum, laa tib men ne rñabey lo xmenguiib zha Roma bdziñle lo me, rñab men co gunguiac Jesús tib zha ne quia xtsiñ me, rëb me:

⁶—Been̄ tib guieḷnzaac beenguīac tib zha ne rquia xtsin̄ naa, laa zho nix lidz naa ib gacd grial̄ zho, mban rac zho yoobdox ne rquia zho.

⁷ Dzigo rēbchaa Jesús:

—Peet nacda, na sē naa guio ne gunguiac naa zho.

⁸—Coo —rēb menguiib co—, rieguaḷd csodziin naa luu sēē luu haxta lidz naa. Nan̄paa naa zrieelo luu nugazh gnabey luu guiac zho. ⁹ Sac zig nac naa no zha ne rnabey lo naa, ni ron naa mine rnabey zho; scagaa tel̄ guiep naa tib lo zhaguiib ne rnabey naa: “Güey nu”, rie zho; rnegaa naa: “Dē nu”, riaad zho; zha ne run̄gaa dziin lo naaw, mine rnabeytaa naa zho, run̄ zhow. Scaque luu nagon̄ nan̄paa naa zrieelo sca gnabey luu guiac xmoz naa.

¹⁰ Zeene gon̄ Jesús sca rnee men̄ co, rley me, rēb me lo grē zha ne zienal̄ zhits me ga:

—Lo grē zha Israel, gard̄ gon̄ gan̄ naa tib zha ne squitaa dib zdoo rnalo Dios. ¹¹ Ni gol̄quiaadiaga gan̄le, zdziḷ dze grēle zha zit ne squi gnalo Dios, zha co yгаа sobnie Abraham, sobnie Isaac ni Jacob zaatne rnabey Dios. ¹² Laa grē zha Israel, niicle nac zho zha ne nac diidz gdziḷ ga, lel̄ lo ncow nēz ley guiaan̄ zho, ga tso zho goonnē zho, haxta gow lay zho lo guieḷnēdox co.

¹³ Blozh ga rēbchaa me lo menguiib co:

—Bzē nasca, gocnan̄ gan̄le zigne bliladzse luu guiac xmoz luu, sca gaca.

Horcogazha laa moz co biac.

Biac xniadzoop Pedr

(Mr. 1:29-34; Lc. 4:38-41)

¹⁴ Laa zeene bdziḷ Jesús lidz Pedr, gon̄ me laa xniadzoop Pedr nix rlan̄ xlēē. ¹⁵ Dzigo bded me zaatne nix zhuz co, zigne bzhen̄ me nia zhuz laa xlēē co blēz. Horcogazh guche zhuz been̄lo zhuz ncuaaḷe dow zho.

¹⁶ Ziedzele dzew, laa ngbidz rzëëblew, zeene bdziñ grë miech co, nzian grë zha ne nosacsi mendox bdziñnie zho lo me. Grëse zho beenguiac me, goctox me lo grë mendox ne nosacsi zho ga, beñcxoon me ma; ni zha ne rlangaa pe stib guielguidz, grëse zho beenguiac me. ¹⁷ Ga brieequia minë bzeet Isá, men ne biadteed xtiidz Dios lo miech padzeela, zeene rëb me: “Grëse xquielñë ne, grëse guielguidz ne rziaac ne, me biw.”

Zha ne racladz sëëb xnëz Jesús

(Mr. 4:35-41; Lc. 8:22-25; 9:57-62)

¹⁸ Zeene gon Jesús scataa ndal miech ne goclo lo me ga, dzigo bnabey me xpëëdscuel me gzhixcuaa zho, sac laa zho no tedquia stib nëz ro nisdoo co. ¹⁹ Dzigo wbig tib men ne nac maistr ley lo me, rëb maistr co:

—Zaatne tsietaa luu gon, sënal naa zhits luu.

²⁰ Dzigo rëbchaa me:

—Gocnana ganle, naa ne nac naa Mgui ne pxeel Dios, peet rapd naa nu, mazd zig nac grë mëz, grë mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

²¹ Wbigaque stib zha ne rzënalë zhits me, rëb zho:

—Ye naa gon sënal naa zhits luu, per bzhiguiel bneedz diidzbey cuëz naa gangazh naa tsoliu pxoz naa.

²² Pquiab me rëb me:

—Dënal zhits naa. Psaan, nzian grë zha gut no, tsow tsiequeets zho samengut zho.

²³ Dzigo laa me bzëëbnie xpëëdscuel me tib len barcw, laa zho zie. ²⁴⁻²⁵ Laa zho zie lo nis co, tibaque zeene psilo brieë tib medox, masaque rlis me lo nis co, laaw psilo rzëëb len barcw. Dzigo lëëlëd güey zho güeycuaan zho me, sac lëëtaque nixguies me.

—Ligier ganle —rëb zho—, blee mcaal lo luu. ¡Bui ganle laa ne nitlo lo nis rii, csaand luu guet ne nu!

²⁶ Dzigo rëbchaa me lo zho:

—¡Pe nacne squitaa rdzieb to? ¡Gardaque dzigo lëë gliladz to cho nac naa!

Dzigo guche me, bnee me lo me co, bnee me lo nis co cuedzew. Horcogazha blëz me co, niicle nis cow laaw bredze. ²⁷ Zeene gon zhow, bzee zdoo zho.

—Bay chozhe waa nac men rii —rnee zho—. ¡Zha nac ne haxta me, haxta nis ron xtiidz me?

Men Gadar ne nosacsi mendox

(*Mr. 5:1-20; Lc. 8:26-39*)

²⁸ Laa zho bdziñdze stib nëz ro nisdoo co, zaatne nac xtan zha Gadar, zeene brieequia chop mgui ne nosacsi mendox, bdziñ lo Jesús ga. Zha ntseeba, rdzieb miech zho, choot rdete nëz co. Len baa brieë grop mgui co bdziñ zho ga, ²⁹ nguietz roptsie zho rnee zho:

—¡Peet gund luu no Jesús, psaan no! Rdziunbey no luu, Xpëed Dios nac luu. Ne nligaa been guieñzaac csacsid luu no niinaga.

³⁰⁻³¹ Zitlaaque ga ndxie tib dzoon nguts notop lag, dzigo bnab grë mendox co lo Jesús rëb ma:

—Telne cuee luu no nu, bzhiguiel bneedz diidz lose grë nguts qui gdziin no.

³² —Niinaga sca gołtsie —rëb me.

Zigne psaan mendox co grop mgui co, güey ma bdziñ ma lo grë nguts co. Horco psilo grë nguts co, rquiaa ma corr güeypix ma tib ro yeedox ne quia ro nisdoo co, bliaal ma lo nis, grëse ma gut.

³³ Zha ne quianap grë nguts co, gzase zho bzhoon. Güey zho lad guiedz güeyzodiidz zho zha goc grë nguts co, ni bzodiidz zho zha biac grop mgui ne nosacsi mendox ga.

³⁴ Grëse miech co, brieë zho zieso zho. Zeene bdziñ zho

gon zho laa Jesús zo ga, dzigo bñab zho lo me siguiel me gbi me xtan zho.

9

Biac tib men ne gutoo

(Mr. 2:1-12; Lc. 5:17-26)

¹ Dzigo wbiireque bzëeb zho len barcw, bdziñ zho guiedz Capernaum stib, sac ga nac zaatne rbëz Jesús len dze co. ² Zhisaque goc bdziñ me, laa zho bdziñniele tib men rzacñe lo me, dipse men co gutoo, ib gacd së me. Lo yag zhoob me bdziñnie zho me ga.

Zeene gon Jesús dib zdoo grë zha co rnalo zho ne me gunguiac men rzacñe co, rëbchaa me lo men rzacñe co:

—¡Nley bloo zdoo luu xin! ¡Laa naa benle perdon grëse xtol luu!

³ Ga zob blalaa maistr ley, zeene gon zho sca bnee me, bza zdoo zho rëb zho: “¡Quiaguitnie men qui Dios gon squi rzë xtiidz me!” ⁴ Bienga Jesús sca rza zdoo zho, dzigo rëbchaa me:

—Lëda i gon squi rza zdoo to. ⁵ Nli nganda guiab ne lo miech: “Laa naa benle perdon grëse xtol luu”; per grieelod lega guiab ne laa ne gunguiac zho. ⁶ Gacnan to sca ganle naa ne nac naa Mgui ne pxeel Dios, ible rap naa poder par gun naa miech perdon.

Dzigo rëbchaa me lo men rzacñe co:

—¡Niinagazh guche i, bi yag ne bzhoob luu i, zeen bzë!

⁷ Zigne sca bnee me, laa mgui co bzoli, laa me zey. ⁸ Grë miech guizhiu ne ndxie ga, zeene gon zho sca beenguiac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

Bredz Jesús Matew

(Mr. 2:13-17; Lc. 5:27-32)

⁹ Blozh ga laa Jesús brieeg ga. Ro nöz zieded me gon me tib men lë Matew, lëëtaque laa men co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal me zhits Jesús. Ga guso me, laa me zienal.

¹⁰ Bded ga güeynie me Jesús tib wagw lidz me. Grë zha ne rcaania dimi ne razh lo zha Roma, grë zha ne zëëb diidz nac zha ntseeb, tipse brenie Jesús zho grë xpëëdscuel me.

¹¹ Blalaa zha farisé, gon zho sca tipse zobnie me grë zha co, bded ga, rëbchaa zho lo xpëëdscuel me:

—¡Mod scataa na rownie xmaistr to grë zha ngoopdol, grë zha beed ne nac recaudador!

¹² Bin Jesús sca quianee zho, dzigo rëbchaa me lo zho:

—Nanle to ganle, zha ne run rmed, zaatne no zha rzacne ga rquiin zho, ¿niacxe squiin zho zaatne no zha ne ndip ndaan? ¹³ Golsoladz ganle znu rnee Dios: “Laa naa racladz gacndooladz miech, yquia zdoo zho samiech zho, racladzdaxe naa waa guiaad zho dieen peraa guiaadlogon zho lo naa.” Mazd ganle goltsie, tsow golsob golguien dien zha nacne sca rnee me. Tel naa, zialguibd naa miech wen, sinque laa naa zialguib grë zha ngoopdol.

¿Pe nacne rcuand xpëëdscuel Jesús?

(Mr. 2:18-22; Lc. 5:33-39)

¹⁴ Bdzinaque xpëëdscuel Juan Bautist, bnabdiidz zho lo Jesús, rëb zho:

—¿Pe nac waa ib rcuand xpëëdscuel luu? Ni no grë no zha farisé, zhiga zhiga laa no rcuanle.

¹⁵ Pquiab me rëb me lo zho:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielnë, ycuan zho, ni ran zho laa mgui ne notsieelnia zo lo zho? Per dzin dze

zeene laa mgui co gbiche, ni zeene laa dze co gdziñ, dzigosi nagon rieguial tso zho guielñë, rieguial ycuñ zho.

¹⁶ 'Ranle to ganle, zha ne rquiaabdie tib lë lar, yquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëëw gunnat zaatne nriez lar gox. ¹⁷ Scaque tsod zha ne cotsow vin cub tib len guid ne padzeela noquiin, sac stsiez nziu cuba; dzigo niicle guid cow, niicle nziugaaw laaw nitlo ga. Gacxe, tel nziu cuba none len guid cubaque tsotsowa.

Brieaban tib mëdwnaa yeen

(Mr. 5:21-43; Lc. 8:40-56)

¹⁸ Lëëtaaque sca quianee Jesús lo xpëëdscuel Juan Bautist, zeene bdziñ tib mgui ne nac zha non yadoo. Zigne bdziñ me pquiitgzhil me lo Jesús, rëb me:

—Been tib guielñzaac së luu guio ne lidz naa. Laa tib xpëdwnaa naa blozh niina, per nanpaa naa telne cxobnia luu guic win, zbeeban luu win.

¹⁹ Dzigo bio Jesús nëz zienal me zhits men co, gza xpëëdscuel me. ²⁰ Lad grë miech ne zienal ga, lad co no tib men wnaa, gogle tsiipchop iz rlan me tib guielguidz, rzac me zigne rzac grë men wnaa gzob mëë, tibaque rlan mew ib rbëzda.

Ga zie me, zeene wbig me nëz zhits Jesús, bzhen me ro lar ne mbix Jesús, ²¹ sac tibaque güeynie guic me, ziac me totsaque ygaa xab Jesús nia me. ²² Dzigo wbire lo Jesús, dze bui Jesús lo me.

—Xin —rëb Jesús—, peet tsienied guic luu. Laa luu biac sacne bililadz luu naa.

Gataa laa wnaa co biac lo guielguidz co.

²³ Laa zeene bdziñ Jesús lidz men rnabey co, laa zha ne rool ndxiele, noquiaa zho grë di ne rac lo ngutoo, grëraa zha ne ndxie ga, nguiedz zëëb tsi zho roon zho, tib ruid ne rac. ²⁴ Dzigo rëbchaa me lo zho:

—Gol_rree nēz ley, sac gon_n gute mēēd qui, nixguiesse win.

Zha ne rlēē, zha ne rzhidzniegaa me, laa zho brieē ley.
²⁵ Dzigo laa me bzēēb len_n yu zaatne nix mēēd co, bzhen_n me nia win. ¡Horcogazha laa win guche!

²⁶ Grēse guiedz ne ndxie dib gax ga, gocna_n miech scataa milagr nroob ne been_n me, bleeban me mēēd co.

*Biac chop zha ne ro*_l*d lo ni tib zha ngop*

²⁷ Zeene laa Jesús wbi ga, nēz zie me brieena_l chop zha ne ro_ld lo zhits me, nguiedz rbedz zho rnee zho:

—¡Jesús, xingan David, pquia zdoo no!

²⁸ Bdzin_n Jesús yu ne rbēz me, laa zho wbig lo me. Dzigo rēbchaa me lo zho:

—¿Dib zdoo to dzigo lēē riladz to zrieelo gunguiac naa to?

—Dib zdoo now —rēb zho.

²⁹ Dzigo pquiaania me zhits bziaalo zho, ni rēb me:

—Mi_ne bliladz to i nasca, laaw gac niina zigne bliladz tow.

³⁰ ¡Horcogazha laa lo grop zha co biac!

Dzigo pso Jesús diidz lo zho choot lo gzodiidzd zho zha biac zho, ³¹ ni zigne brieē zho ga, laa zho bzodiidzlew. Blozh ga, grēse guiedz ne ndxie dib gax ga, gocna_n miech scataa nac milagr ne ru_n me.

³² Loxaque wbi grop zha ne biac lo ga, laa bla zho bdzin_nlaque, bdzin_nnie zho tib me_n ne nosacsi me_ndox, psan_ngop ma me_n co. ³³ Dzigo ben_ncxoon_n Jesús me_ndox co, zeene laa ma bzhoon_n laa me_n co psilo bnee. Grē miech guizhiu ne ndxie ga, per nli rzee zdoo zho, rnee zho:

—¡Wlaltaa gard dzian_n ne tib me_n ne squitaa gu_n grē milagr qui!

³⁴ Laa grē zha farisé rnee:

—Ma ne rnabey lo men̄dox nacie men̄ qui, gane rrieelo run̄cxoon̄ me men̄dox.

³⁵ Grëse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseed me miech. Zaatne rdziñtaa me, rie me xyadoo zho rnee me lo zho zha racladz Dios gban zho, ni run̄guiac me zho tel̄ pe nactaa guiel̄guidz ne rzac zho.

³⁶ Zeene ran̄ me grë miech guizhiu ne rcaalsa lo me, rquia zdoo me zho, sac ran̄ me mban rac zho guien̄d cho tib zha ne gacnie zho, rac zho zig grë mëcwxiiil yeen̄ ne guien̄d xbaxtor.

³⁷⁻³⁸ Tib vuelt haxta rëb me lo xpëëdsuel me:

—Gol̄nab lo Dios cxeel̄raa me zha ne gun̄ xtsiin̄ me. Gol̄wi gan̄le pe zhidaa grë miech qui, quiambëz zho dien̄ cho gnee Xtiidz Dios lo zho. Masaque nac zho niina, zig tib guiel̄gon ne golle gliiap.

10

Bzo Jesús zha ne tsienee xtiidz me

(Mr. 3:13-19; Lc. 6:12-16)

¹ Blozhse sca bnee Jesús, dzigo bredz me gza tsiipchop zha ne nac xpëëdsuel me ga, bzo me zho tsienee zho Xtiidz Dios lo miech, bdeed me poder lo zho gun̄cxoon̄ zho men̄dox zaatne nosacsi ma miech, ni gun̄guiac zho grë men̄ rzacñë.

²⁻⁴ Znu lë gza tsiipchop zha co:

Simón (zha ne rneeque zho Pedr),

Ndrés (bets Simón),

Jacob ni Juan (zha co nac xingan Zebedé),

Lip,

Bartol,

Mazh,

Matew (zha ne ptop dimi ne razh lo zha Roma),

Jacob (xingan Alfé),

Lebeo (zha ne rneeque zho Tadó),
 Simón (zha ne no lo partid ne racladz griece zha Roma
 Israel),
 ni Judas Iscariot (zha ne güeyto Jesús).

Pxee Jesús zha ne tsienee xtiidz me
 (*Mr. 6:7-13; Lc. 9:1-6*)

⁵ Blozhse ga, pso me diidz lo zho zha tsie zho, rëb me lo zho:

—Nanle to nagon, tsiede to zaatne no grë zha ne nacd zha Israel, niicle sëëbde to grë guiedz ne ndxie xtan zha Samar. ⁶ Zaatne no grë zha Israel, gase goltsie; lëë grë mëcwxiil ne nonziaab ga.

⁷ 'Goltsie, goltsienee lo zho gacnan zho ganle laa dze ziaadgaxle zeene laa Dios csilo gnabey.

⁸ 'Grëse zha ne rzacnë, golgunguiac zho; zha ne rlan guiedz lepr, golsanmbe zho; zaatne nix zha ne gutle, golcueeban zho; grë zha ne nosacsi mëndox, golguncxoon ma. Peet gnabde to lo miech, golguien ganle lega bnedz naa poder qui lo to, bzhiide tow.

⁹⁻¹⁰ 'Peet güeyde to, xab tow, lab tow, minë nacwse to, minë quiase ni to, mincose goltsienie. Güeyde to dimi, per ni tib quiet güeyde to; sac zaatne tsiegun to dziin rii, ib ga none gneedz zho ncuaane gow to.

¹¹ 'Guiedz ne gdziñtaa to, golguib dien pa lo no tib zha ne ndzinli, dzigo lidz zha co goltsiebëz, haxta gza dze ne laa to gbi guiedz co. ¹² Zeene noguib to pa cuëz to, yu ne tsie to, zaacse golgac, golquiaabdiuzh zha ne no yu co, ¹³ golnab gunlay Dios zho. Telne wen gac zho lo to, zunlay me zho, togo guncasdgaa zho to, dzigo toque gunlay me. ¹⁴ Zha ne sca siguield ycaania to, golrieegazh lidz zho; guiedz ne siguield zho yquiaadiag zho minë nonee to, golbigazh guiedz co; gollit grë yudie co ni to, gollu lo zho ganle led xtoldraa to ga tel laa zho nitlo. ¹⁵ Gneli naa lo

to ganle zeene gal dze ne laa Dios gun xquielwxtis me, bii lëëtaa gac guielnë ne yгаа grë miech ne bio guiedz Sodom, guiedz Gomorr, lëdle guielnë ro ne yгаа grë miech ne sca siguield ycaania to.

¹⁶ 'Nsin golso, golguien ganle rrieequia tib mëcwxiiil yeense nac to, ni laa naa rxel to zaatne no grë coyot dox. Ndoooladz golgac, niowse golgac lo miech zig rac grë palom, per scagaa con cuidad goltsie, golgan ganle zha rzë meel. ¹⁷ Nligaa nsin golso, sac gon ib ziezo miech to lo wxtis, ni lëëque len yadoo ga quin zho to, ¹⁸ haxta ziezo zho to lo grëraa zha nroob ne rnabey. Laa zho guna, loxaque ne nac to zha ne no xnëz naa, ni gagaa nagon gdeeda diidz gnee to xtidz naa lo grë zha co, ni lo grëragaa miech ne nacd zha Israel.

¹⁹ 'Zeene sca tsiezo zho to lo grë zha rnabey co, tsode to zhgab dien pe gnee to, dien zhagaa gnee tow; sac zeene sca tsiegala, Dios gneedz diidz ne gnee to. ²⁰ Led tod gnee, sinque, ¡zhiEspíritu PxoZ to men ne zob gbaa, men co gnee gal!

²¹ 'Zlëëniedox miech zha ne no xnëz naa. Zio zha ne lëëque bets zho, zha ne lëëque pxoz zho, zha ne lëëque xpëed zho ctsidiil zho, tsielo zho zho lадznia zha ne gut zho. ²² Tel to, guiets yag gan miech to, per telne dziits so to tel pe nactaa lo guielnë ne ted to, ib zгаа to tib guielmban ndzon ne gdzindraa dze lozh. ²³ Guiedz ne no to, zeene laa miech csilo yquiaanaI to, golriee ga, goltsie stib guiedz. Gneli naa lo to ganle, niicle stib guiedz stib guiedz tsie to, gardaque lozh tsieted to grë guiedz ne ndxie Israel zeene gal dze ne laa Mgui ne pxeel Dios guiaad stib.

²⁴ 'Golwi ganle zha ne nac mëëdscuel, tsod zha ne ndziibraa non lo maistr, zha ne rquiagaa dziin, tsod zha ne nonraa lo zha ne rree zho. ²⁵ Tel zha gun miech maistr, scaque gun zho mëëdscuel; tel pe cteed zho bizhuan dziin,

mincoque cteed zho zha ne quia dziin. Gacxe waa peet tsienied guic to, tel pe nactaa ncuuane gnee miech to, sac gon niicxe naa name ne nac naa Dad, mendox rnee zho nac naa.

²⁶ 'Gdziebde to, zdzin dze ne glu ganle cho zienal mine nac diidzli, chogaa zienal guieIntseeb, gal dze co gresew xoobnen.

²⁷ 'Grese mine rne naa lo to zeene nese rziodiidza, golneew lo miech, haxta glaa guic yu golso, nguiedz golneew. ²⁸ Gdziebde to miech, golguien ganle no tib men nroobraa, lee men co nac Dios. Tel miecha, loxaque cuerpse zrieelo zho csacsi zho, sangue Dios, zrieelo me gnitlo me miech dib xcuerp zho, dib xalm zho len gabil.

²⁹ 'Nligaa gdziebde to, csaand Dios lega pe gac to. Golwi ganle, zig nac gre mguin niicle ne rzac miech peet nond ma, haxta chop ma rdeed zho por tib gaay centav; per PxoZ to gon men ne zob gbaa rsaanladzd me ma, ni tib ma guete telne gdeete me diidz. ³⁰ Pelel to dzigo csaan me, haxta guits guic tow, gresew ngaba lo me. ³¹ Gdziebde to sca, golguien ganle nonraa to lo tib dzoon mguin.

³² 'Gneli naa lo to ganle, zha ne glu lo miech nacie zho naa, scaque naa zeen gal dze co zlu naa lo PxoZ naa men ne zob gbaa, nacie naa zho. ³³ Sangue zha ne ctoladznie naa lo miech, scaque naa ziep naa lo me runbeyd naa zho.

³⁴ 'jGuiabde to togo laa naa zial loxaque par cuin wense miech! Leda gon, ye zial naa zialgunctil naa zho. ³⁵ Sac zha ne seeb xnEZ naa, zleenie xpEed zho zho, tel meedgaaw, zleenie pxoz zho zho; scaque men wnaaw, zleenie xinzhizh zho zho, zha ne nacgaa nguzhizha, zleenie xnIaa tsieel zho zho. ³⁶ jLeeque menlidz miech gac zha ne glEe gan zho!

³⁷ 'Zha ne mazdraa rquia zdoo glEenie pxoz zho zho, glEenie xnIaa zho zho, glEeniegaa xpEed zho zho, porne

gun zho mine rnabey naa, peet xtsiind zha co par ygab zho xnöz naa. ³⁸ Scaque zha ne yquia zdoo cueeladz zho zho guiaadnal zho zhits naa, grieelod ygab zho lo naa. ³⁹ Sac gröse zha ne rquia zdoo guielmban ne rap zho lo guidzliu rii, ygaad zho guielmban ndzon ne gneedz Dios; sangue zha ne cueeladz xquielmban, niicle tel csacsi miech zho loxaque ne no zho xnöz naa, ib zgaa zho guielmban ndzon co.

⁴⁰ Niina gon ne squi tsie to, gröse zha ne zaacse ycaania to, zaacse gnee zho lo to, rrieequia naa ga sca ycaania zho; ni zha ne sca ycaania naa, rrieequia men ne pxeelle naa ga sca ycaania zho. ⁴¹ Zha ne cuözlo tib men ne noteed xtiidz Dios lo miech, guielnzaac ne gdeed Dios lo men co, ye zho ygaa guielnzaac co. Zha ne cuözlo tib miech ndzinli, guielnzaac ne gdeed Dios lo zha co, ye zho ygaaw. ⁴² Ni zha ne gneedz maase tib zhigaque nis yag lo cho tib zha win ne nac to ne nac to xpëedscuel naa, ib tedsod zdeed Dios guielnzaac ne tsieguial zho.

11

Zha ne pxeel Juan Bautist
(Lc. 7:18-35)

¹ Zeene blozh pso Jesús diidz lo gza tsiipchop zha co, dzigo laa zho zie. Blozh ga laa me brieeque, güey me grë guiedz ne ndxie gax ga, güeyseed me grë miech co.

²⁻³ Len dze co no Juan Bautist ladzguiib, ga no Juan bin Juan zha nactaa grë milagr ne run Jesús, dzigo pxeel Juan bla xpëedscuel Juan güeynabdiidz zho lo me, dien pe lëele Men ne zëëble diidz cxeel Dios lo guidzliu ga nac me, te dzigora gdzin men co ye. ⁴ Dzigo rëbchaa me lo zho:

—Grë ncuaa~~ne~~ bin to rne naa, grëgaa ncuaa~~ne~~ gon to run naa, goltsie golzodiidza lo Juan. ⁵ Ran to ganle grë zha ne rold lo, grë zha ne gacd së, grë zha ne rlan guiedz lepr,

grë zha ne rcuaat, laa zho riac; haxta grë zha ne gutle, laa zho rrieeban. Xtiidz Diosa, laaw quiagaaz lo grëse zha ne rquiina. Grësew, golzodiidza. ⁶ Ni golguiab lo me, dichos zha ne racchopd guic, sinque tibluc rac zho rliladz zho cho nac naa.

⁷⁻⁸ Zeene laa xpëedscuel Juan zey, dzigo psilo me bzeet me Juan lo miech guizhiu ne ndxie lo me ga, rëb me:

—Zeene güey to dan ngan co, güey to lo Juan, ¿zha dien güeynie guic to nian to me? ¿Pe rëb to rlu me zig tib goobgui ne nëzrii nëzrec rey me, te rëb to ye masaque grë lar niazh ne racw zha non nacw me? Per nanle to ganle zha ne scataa racwxab riod zho dan. ⁹ Nligaa cho dien güeynie guic to nac me, ¿te rëb to ye tib men ne noteed xtiidz Diosa? Gacnan to ganle tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co. ¹⁰ Me ga raquiet lo Xtiidz Dios zaatne znu rnee:

Sxel naa tib zha ne tednerga lo luu,

zha co gzhixcuaa nëz ne ted luu.

¹¹ Ne nligaa lo grëse mguí ne zieded lo guidzliu gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

¹² Desde psilo Juan noseed me miech zhapaa racladz Dios gban zho, ni rchoobnis me zho, hor co psiloque brieequia zha ne rlëenie zhiwseed Dios, gacxe waa zha ne nlipaa rdiebd, zha cose rcaaniaw, rzëëb zho xnëz me.

¹³ Mazd glo tibaque raquiet ne laa men ne cxeel Dios ga guiaad, zigtaa lo leya, zigtagaa grë zha ne biadteed xtiidz Diosa, bzeet zhow. Ni niina ne laa Juan biaad, laa men co blanso. ¹⁴ Juan gon biaad niina zig no diidz guiaad Lí; golgacnan sca ganle cho nac me. ¹⁵ Zha ne racladz guien zho zha nac grë mine none naa nu, ¡yquiaadiag zhow!

16-17 'Nac grë miech rii, riend zho pe racladz zho. ¿Cho ganle run zig run zho? Lëë zho run mine run mëédlas ne rio wguít ro nêz, niicle rool xcompañer win di nguieel rieed win, niicle roolga zho di ngan, roond win. 18 Sac gon biaad Juan, ran zho rowd me tel pe ncuane row zho, ried me ncuane rie zho, dzigo laa zho rnee mendox nacie me. 19 Blozh ga ziaad Mgui ne pxeel Dios, ran zho row me, rie me, laa zho rneeque, lega rowcho me, lega riecho me, ib riend me cho rtsieelsa me, haxta grë zha ngoopdol, haxta grë zha yozh ne rtop dimi ne razh lo zha Roma rzënie me. Sca rnee zho, sangue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

*Miech ne bzhiguel*d ncaania xtiidz Jesús

(Lc. 10:13-15, 21-22)

20 Blozhse ga, dzigo psilo Jesús bzeet me mine yгаа grë zha ne pcaaniad xtiidz me; sac nzian guiedz ne güey me niicle gon zho grëtaa milagr ne been me, per ib psaand zho xquielntseeb zho, rëb me:

21 —jProbsaxe grë men guiedz Corazín, grë men guiedz Betsaid! Sac gon gonpaa zho grë poder ne rap Dios, per ib psaand zho xquielntseeb zho. Tel niaca mine nian grë men guiedz Tiro, grë men guiedz Sidón, grë milagr ne gon zho ben naa, ib ndedsod mban niac grë zha co nio zho guielnë, zëëb nsaan zho xquielntseeb zho, mbig zho lo Dios. 22 Gacnan zha Corazín, gacnan zha Betsaid sca ganle, gal dze ne gun Dios guielwxtis, lëëtaa caxtigw ne yгаа zha Tiro ni zha Sidón, mazdraa mine yгаа zho. 23 Scaque zha Capernaum, masaque rzac zho niina zha nziuuraa lo Dios, per gacnan zho ganle haxta quiet lo ncowdoo ne guey mendox ga guey zho; sac gon tel niaca mine nian zha Sodom grë milagr ne ran zho noyun naa, ible nsaan zha co xquielntseeb zho, nitlod zho. 24 jGacnan zha Capernaum

ganle gal dze ne gun Dios guielwxtis, lëëtaa caxtigw ne yгаа zha Sodom, mazdraa mine yгаа zho!

²⁵ Dzigo bzodiidznie Jesús Dios, rëb me:

—Dios luu ne nac luu Pxoз naa, luu rnabey gbaa luu rnabey guidzliu, rnedz naa xquizh lo luu sac grë mine noyun luu nu niina bdeete luu diidz niacnan grë zha raca, sinque laaw blu luu lo grë zha ne nac zig grë mëëdlas.

²⁶ Sca quiaayun luu, sac ib scale racladz luu gaca.

²⁷ Blozh ga rëb me lo grë miech ne ndxie ga:

—Grëse ncuaane ran to quiaayun naa, Dios men ne nac Pxoз naa, me bneedz poder rii lo naa; sac ib laa me bzo naa, naa guna. Xpëëd me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa gunbey me, zunbey zho me.

²⁸ Grëse to ne nac to zha ne në noded, rdib rdzag to quiaguib to dien zha guiaanwen zdoo to, goltë lo naa, naa gneedz tib wdziiladz ndzon lo to. ²⁹ Nligaa golbig lo naa, goltënal zhiwseed naa, golgac tib miech tibliladz, tib miech ndooladz zigne nac naa; zeena gap to descans co. ³⁰ Nacda ncuaane ngan, nacda ncuaane guiab to glëbde to gun tow.

12

*Dze ne rdziiladz zha Israel lo dziin
(Mr. 2:23-28; Lc. 6:1-5)*

¹ Len dze coquew, tib dze lëëtaque dze ne rdziiladz zha Israel lo dziina, bded Jesús zaatne zëëb zhobxtil grë xpëëdscuel me. Ga zie zho rcaabedz zho, dzigo psilo zho ptop zho mzion co dow zho zhobxtil co. ² Gon bla zha farisew, dzigo rëb zho:

—jLëda i gon noyun to, noguiits to ley i! Golguien ganle dze nda nac dze rii.

³ Pquiabchaa me rëb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? ⁴ Rneew, bzëëb me len yadoo güey nab me guietxtil ne nac gon, downie me grë zha ne ziegza me ga, ni loxaque zha ne nacse pxoz row guietxtil co, ¿pe led bdiitsd me ley ga? ⁵ Lo xley Moisés name zhobnee ganle zha haxta dze ne rdziiladz to lo dziin run grë pxoz dziin len yadoo, ni rneeda dol ga sca run zho. ⁶ Golwi ganle zha rats ley par gac dziin len yadoo, ni yadoose ga, gacnan to ganle lo to nu zo men ne mazdraa non lo yadoo.

⁷ Rnee Dios lo Xtiidz me, quiambëzd me dien peraa gun miech, dien peraa cogon zho lo me, sinque mine racladz me guien zho yquia zdoo zho samiech zho. Tel niaca mine nli rien to min co, zien to gdziibdolde to zha ne rapd dol. ⁸ Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia

(Mr. 3:1-6; Lc. 6:6-11)

⁹ Bded ga, gol stib dze ne rdziiladz zho lo dziina, güey Jesús len yadoo win ne zob lad guiedz co. ¹⁰ Lad grë miech ne ndxie len yadoo co, no tib mgui ne mband tib nia; porque laa zha farisé bnabdiidzlaque lo me dien pe nonguiela gunguiac me miech dze ne rdziiladz zho lo dziin. Sca bnabdiidz zho, sac quiaguib zho dien pe yquiaaqui zho me tsiezo zho me lo wxtis.

¹¹ Dzigo pquiab me rëb me lo zho:

—Togase dien, zha run to zeene lëëtse dze rii rietsobe tib xpëcwxiiil to tib len blë nroob, ¿led zëëb lëë rie to riebee to ma? ¹² Tel sca rquia zdoo to mëcwxiiil, jgolguien ganle mazdraa gon non miech lo tib mëcwxiiil! Gacxe waa

ible nonguiela guñ ne xyudar samiech ne, niicle maase dze nda nac dze co.

¹³ Dzigo rëbchaa me lo mgui ne në nia ga:

—¡Bzigaa nia luu!

Zigne bzigaa mgui nia mgui, biacgazha, biaana zig nac stib miñe ndaantaque ga.

¹⁴ Grë zha farisé co, zigne brieë zho ga laa zho psilo bnediidz dien zha gdeeda diidz gut zho Jesús. ¹⁵ Bien Jesús sca no guic zho, dzigo mazd brieë me ga. Miech guizhiu ne zianał zhits me, grëse meñ rzacné ne zianał ga, beñguiac me zho; ¹⁶ per pso me diidz lo zho, choot lo gzodiidzd zhow.

¹⁷ Ga brieëquia miñe pquiaa Isá, tib meñ ne biadteed xtiidz Dios padzeela, zeene rëb me:

¹⁸ Lëë meñ rii bzooblo naa guñ xtsiñ naa, rleynie naa me, rzac zdoo naa grë ncuaane ruñ me. Zded naa zhiEspíritu naa gacnie me, me nac meñ ne cxobneñ xtidz naa lo grëse miech.

¹⁹ Tiñnied me miech, sedzd yañ me lo zho, sod me ro nëz goptsie me.

²⁰ Grë zha ne gzhe gzhele rac, zig tib goobgui ne quiaxweele, zig tib lë guier ne noyiidiele,

csand me zdoo zho;

zha ne mban rac lo xliaadz zho,

csaand me zho.

Min co tsoxco me, haxta gañ me grëse miech gacnan miñe nac diidzli, ni tsianał zhow.

²¹ Haxta zeene gañ me ye grë zha ne nacdraa zha Israel, laa zho gnalo me.

*Rëb zho men*dox nacie Jesús

(Mr. 3:20-30; Lc. 6:43-45; 11:14-23; 12:10)

²² Dzigo güeynie zho tib mgui lo Jesús rold lo mgui ni gacdaque gnee mgui, sac nosacsi mendox mgui. Znuse

beenguiac me mgui, gagazh psilo gon mgui, psilo bnee mgui. ²³ Grë miech ne ndxie lo me ga, per nli bzee zdoo zho, rnee zho:

—¡Bay pe lëë men qui naye nac Men ne zëëble diidz ga cxeel Dios!

²⁴ Zeene gon zha farisé sca rnee grë miech co, rzachaa zdoo zho rnee zho: “Pe Dios nazho cxeel me, ma ne rnabey lo mendox ma co nacie me, gane rrielo runcxoon me mendox.”

²⁵ Bien Jesús sca rza guic zho, dzigo rëbchaa me lo zho:

—¡Ncuane gacd gon rnee to! Tel tib wxtis nadien lëëque zha ne nacie zho csilo tilnie zho, ¿niacxe zac gnabey zho? Tib guiedza, tel lëëque zha guiedz co tilnie menladz zho, led znuse lozh guiedz co; tib diigaa miecha, tel lëëque zha tilnie menlidz zho, ¿niacxe nitlod dii co?

²⁶ Scaque mendox nagon, telne lëëque lëë ma guncxoon samendox ma, ¡pe nale na bnitlo ma! ²⁷ Nana ne squi rnee to Beelzebú nacie naa gane rrielo runcxoon naa mendox, ¿zha ne nacgrë to dzigo, cho nacie zho ne ye zho runcxoon ma? Gase naganle rlu dollox i quiayun to, squi rnee to. ²⁸ Sangue tel naa zhiEspíritu Dios nacie naa gane runcxoon naa mendox, ni ga rlu ganle laa Dios psilo quianabeyle nu.

²⁹ ¡Masaque nac mendox zig tib zha ne no xfuers, zha ne gacladz cuee grë ncuane no lidz zha co, none cxidoogazh zho zho! ³⁰ Tel mendoxa rlëënie ma naa, ni nanle to ganle zha ne rlëë lo ne, gacnied zho ne.

³¹⁻³² ‘Gacnan to ganle, grëse dol ne run miech, grë tel zha rguie zho, rdzibdee zho, niicle tel haxta gneenë zho naa, bii zun Dios zho perdon min co; sangue zha ne gneenë zhiEspíritu me, ib gundraa me zho perdon.

³³ ‘Nanle to ganle zig nac yag nex, mine nac yag, min co nac nex ne rdeeda. Tel yag wena nex wen rquia low, togo

yag ncuangaaw, nex ncuanaaque rquia low. ³⁴ ¡Scaque to nagon zhin mendox! ¿Zha nan to nadien gac to miech wen, tel desde zdoos to ntseeb? Miech ntseeb to gane squi rzë xtiidz to, sac gon, ¡grëse diidz ne rriee ro miech, zdoos zho rzaw! ³⁵ Gacxe waa, zha ne mbe zdoos, niapse diidz wen, diidz ndooladz nac xtiidz zho. Sangue zha ne ntseeb zdoos, niapse diidz ntseeb, niapse diidznë rrieeche ro zho. ³⁶ Ni gal dze ne gon gun Dios guielwxtis, ib tedsod zunquizh me miech tib tib diidz ntseeb, tib tib diidznë ne sca rriee ro zho. ³⁷ Sac gon zigne rzë xtiidz zho niina, min co cueequia zho gal dze co, o mincogaa cteedquie zho.

Racladz zha farisé gan zho milagr

(Mr. 3:31-35; 8:12; Lc. 8:19-21; 11:24-26, 29-32)

³⁸ Tib dze wbig zla zha farisé lo Jesús gza zho zla maistr ley, rëb zho lo me:

—Maestro, racladz no dzian no gun luu tib milagr, milagr ne glu nli Dios pxeel luu.

³⁹ Pquiab me rëb me lo zho:

—Nazdpaa ntseeb to, squitaa gocndip zdoos to nëz lo Dios, ¿zha nacraa milagr ne racladz to gan to? ⁴⁰ Stibaque milagr gon gan to, lëë min co gac zeen gal dze ne laa Mgui ne pxeel Dios, tso leñ liu tson dze, tson guieel zigne bio Jonás leñ mel nroob co tson dze ni tson guieel. ⁴¹ Ni gal dze ne gon gun Dios xquielwxtis me, ib steedquie zha Nínive miech ntseeb ne nac to i; sac gon zeene güeynee Jonás lo zho, grëse zho psaan xquielntseeb zho wbig zho nëz lo Dios, laa to nëde to gon to diidz niicle ne lo to nu zo tib men ne mazdraa non lo Jonás. ⁴² Scaque rein ne bzob nëz Sabá, steedquie me to gal dze co, sac tel rein co golwi ganle pa lo guidzliu ne brie me biaadgan me rey Salomón, biadquiaadiag me grë xtiidz Salomón. Ni to lo

to nu zo men ne mazdraa non lo Salomón, ni ib ronde to xtiidz me.

⁴³ 'Telne csaande to xquielntseeb to i gon, low lozh to. Sac to zig bzhaac tib zha ne psacsi mendox. Zeene brieë ma zdoo zho, güey ma güeyquianzë ma grë dan zit güeyguib ma dieñ pa cuëz ma. Gonse ma rdzielz zaatne cuëz ma, ⁴⁴ rëb ma: “Mazd laa naa gbireque guia naa zaatne brie naa ga.” Zeene biire ma bdziñ ma zdoo zha co, gon ma nroob lugar no, pale tib yu dets, ⁴⁵ nacne güeyaque ma güeyxi ma zgadz samendox ma, ma ne mazdraa ntseeb blëznie ma zdoo zha co. ¡Dzigole mazdraa mban biaan zha co, lëdlegaa zigne goc zho glo! Scadaa nagon gdzieelo to.

⁴⁶ Laa me bii noneeque, zeene laa xniaa me ni zha bets me bdziñ, racladz zho gzodiidznie zho me. Per brieelod nzëëb zho haxta len yu, sac scataa miech guizhiu ne ndxie lo me ga. ⁴⁷ Dzigo rëb tib zho lo me:

—Laa xniaa luu gon ni zha bets luu quiambëz luu nëz ley, racladz zho gzodiidznie zho luu.

⁴⁸ Pquiab me rëb me:

—¡Xnia naa ye, bets naa ye?

⁴⁹ Blis nia me, blu me grë xpëëdscuel me, dzigo rëbchaa me:

—Zha ne gon nac zig zha rii, lëë xnia naa ga, lëë bets naa ga. ⁵⁰ ¡Sac grëse zha ne run mine rnabey PxoZ naa men ne zob gbaa, grëse zha co nac bets naa, nac bzian naa, nac xnia naa!

13

Nac Xtiidz Dios zig zhobxtil

(Mr. 4:1-20; Lc. 8:4-15)

¹ Blozh ga brieë Jesús güey me ro nisdoo. Ga zob me, ² zeene gon me nzian miech ne nocaalsa lo me ga, nacne

biep me güeysob me tib len̄ barcw zo gax ro nis co, psilo me pseed me zho.

³⁻⁴ Ndal grē ncuaañe pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

—Tib zha name güey gon zhobxtil. Zeene laa zho quialaal̄ zhob co, now bliaal̄ gax ro nëz, now bliaal̄ lad quie, now bliaal̄ len̄ yag guiets. Mine bliaal̄ gax ro nëz ga, güey grē mguin̄ znuse dow maw. ⁵ Mine bliaal̄ zaatne nac lad quie, znuse znuse blana, ⁶ per zeene laa lo ngbidz brieë, znusaque bgool̄a, bidzgaw; sac guiend̄ nroob low. ⁷ Mine bliaal̄ zaatne nac len̄ yag guiets co, zeene laa yag guiets pxii, bnitlogaw. ⁸ Sangue mine bliaal̄ zaatne nac lo liu naal, blana, brooba ni goca; lo tib tib zhob co no zhimziona brieë galptsii zhob, now brieë tsongala, nogaaw brieë haxta tib gayoow.

⁹ Blozh ga, rëbcha me:

—Zha ne racladz guien̄ mine rne naa nu, yquiaadiag zhow.

¹⁰ Zeene laa grē miech co zey, dzigo wbig xpëëdsuel me bnabdiidz zho lo me dien̄ pe nac ne sca niapse con cuent rseed me grē miech. ¹¹ Pquiab me rëb me:

—Tel̄ to, Dioszhal rlu lo to zha rnabey me, niicle ncuaañe mazdraa ngueetsa; laa grëraa miech ne gard gbig lo me, grieelod guien̄ zhow. ¹² Sac zha ne noxcole dien̄ zha rnabey me, zdedraa me guiel̄biini lo zho guien̄ zhow, laa zha ne noxcoda, mine riense zho, stiche mew. ¹³ Sca rseed naa zho parne tsoguic zho zha rnabey Dios, per nac zho niicle nzhial lo zho rwi zho, per peet ran̄d zho; niicle nzhial diag zho per peet rond zho; ib peet riend̄ zho. ¹⁴ Lëë mine nac zho i bzeet Isá, zeene znu rëb me:

Nac miech qui, niicle peraa ron zho, per peet riend̄ zho; niicle rwiraa zho, per peet ran̄d zho.

¹⁵ Ne nlipaa miech nad, miech ndip zdoo nac zho, rriequia ntse zho diag zho, ntse zho lo zho; parne peet gond zho, peet gand zho. Ib riend zho zha gbig zho lo naa, ygab zho xnëz naa, parne csilaa naa zho.

¹⁶ 'Sangue to —rëb Jesús lo zho—. ¡Dichos to porne rien to pe ran to, ni riengaa to mine ron to! ¹⁷ Blactaa zha ne biadteed xtiidz Dios padzeela, blactaa zha ne güeynal mine nac diidzli, bzoobladz zho nian zho grë ncuaane ran to niina, per bgaad zho nian zhow; bzoobladz zho nquiaadiag zho grë ncuaane noquiaadiag to, per bgaad zho nion zhow.

¹⁸ 'Golquiaadiag sca ganle zha nac xcuent zha ne güey gon ga. ¹⁹ Ro nëz ne sca bliaal zhob co, sca nac palal miech ne riepaa zha ne rienee Xtiidz Dios lo zho, per rioguicd zhow, rlozh ga rdzinaque mendox, rietiche ma tel palalse mine rien zho. ²⁰ Lad quie ne bliaal spalal zhob co, sca nac grë zha ne rley rcaania Xtiidz Dios; ²¹ per led dib zdood zho rcaania zhow, gane zeene laa miech rsilo rlëë lo zho, laa miech rtsidil zho porne rliladz zhow, rsaanga zhow. ²² Nogaa zho nac zig nac len yag guiets co. Rquiaadiag zho Xtiidz Dios, per rsilo zho lel grë ncuaane no lo guidzliu rii mazdraa rionie guic zho, rquidie grë dimi zho. Grë ncuaan co rioxcoraa zho, laa ne tsonie Xtiidz Dios guic zho, min co rquiaqui ib rund zho mine rnabey me. ²³ Laa liu naal ne bliaal mine scataa goc ga, sca nac grë zha ne dib zdoo rquiaadiag Xtiidz Dios, rien zho zha naca, ni rban zhow zigne rnabeya. Rriequia grë ncuaane run zho, no zho nac zig mzion ne brieë galptsii zhob ga, no zho nac zig mine brieë tsongala, nogaa zho nac zig mine brieë tib gayoow ga.

*Zha nac xquie|rnabey Dios
(Mr. 4:30-34; Lc. 13:18-21)*

²⁴ Biire pcaalsa miech lo me stib, dzigo psiloque me pseed me zho con stib cuent, rëb me:

—Ziaad gac xquielrnabey Dios lo guidzliu rii zig bzhaac tib men ne gon zhobxtil. Niapse zhob wen, zhob nal gon me, ²⁵ per no tib zha ne rlëe lo me, gol tib pcow liu, horne grëse miech nixguies, güey zho güeylaal zho xmidz guizh ncuaan zaatne gon me.

²⁶ Zeene laa zhobxtil co psilo blan mzion, hor coraa blu laa guizh ncuaan co no lada. ²⁷ Grë zha ne quia xtsiin me, zeene gon zhow güey zho rëb zho lo me: “Tebaa gan luu ganle, dipse lad xoob luu zëeb guizh ncuaan, ¿dieen pa brieew gocbniw ga?” ²⁸ Dzigo rëb me: “Rien naa no cho tib zha ne rlëe lo naa, zha co been dziin co.”

’Gocladz zho, hor cogazh nielaadz zhow per bzhiguield me, ²⁹ rëb me lo zho: “Tsielaadzde tow, sac tel glaadz tow niina ye zhobxtil gliaadzniew. ³⁰ Golsaan sca zëeba ga, na zeene laa wlaap gac, hor co gnabey naa zha ne quiits zhob, ctopgazh zhow gdziin zhow tib lad tseca; lozhraa ga quiits zho zhob, tsasa ga, glansow ro yu.”

³¹ Blozh ga bzeet me midz moxtaz, rëb me:

—Nac xquielrnabey Dios zig nac tib midz moxtaz ne ran miech dan rii. Nan to ganle midz moxtaz nac midz ne mazdraa win, ³² ni tel gacbniw, rrooba ni lëew rroobraa lo grë guizh ne ran zho ro yu, raca lal tib yag nex, haxta rdzin grë mguin rzhixcuaa ma zhiptsieez ma lo grë zhicwa.

³³ Rëbaque me:

—Nac xquielrnabey Dios zig nac ncobi ne rquiaa men wnaa lad ncob ne ríaa quietxtil. Niipaque ncobi riots tson lmud rin, ni dib nacse ncob co rzibe.

³⁴ Grëse mine pseed Jesús grë miech co, niapse con cuent bnee mew lo zho. ³⁵ Ga brieequia mine bzeet zha ne biadteed xtiidz Dios padzeela, zeene rëb zho: “Niapse

con cuent cseed naa miech, sca gnee naa lo zho grëtaa ncuaañe gard gacnañ miech wlal ne bre guidzliu.”

Zha nac xcuent guizh ncuaañ co

³⁶ Blozhse bnee Jesús lo grë miech co guey zho, yeque me laa me zey gza xpëëdscuel me. Bdziñ zho ro yu, ga bñab zho lo me siguiel me gnee me lo zho dien zha nac xcuent guizh ncuaañ ne bzeet me ga. ³⁷ Dzigo rëbchaa me lo zho:

—Golgona sca, znu gon nac cuent co. Rrieequia gon naa ga nac meñ ne gon zhob co. ³⁸ Liu ne bñiaaw ga, nac lo guidzliu, zhobxtil co nac grë miech ne nole xnëz Dios, laa guizh ncuaañ co nac grë zha ne no ladhnia menox. ³⁹ Zha ne güeygan guizh ncuaañ co, lëë menox ga. Dze lo wlaap co, gac dze ne gun Dios xquielwxtis me, zha ne tsie wlaap ga, lëë anjl ga. ⁴⁰ Ni zigne sca cuee zho guizh ncuaañ co lad zhobxtil, gzëëg zhow, scapaa nagon gal dze ne gac xquielwxtis Dios, ⁴¹ sxel naa grë xanj naa tsie zho tsiebee zho grë zha ntseeb, zha ne sca runctal xtol grëraa miech, lad zha ne no xnëz naa. ⁴² ;Grëse zha ntseeb co, hor co laa zho guey lo guidox ne rieguial zho! Ga tso zho goonnë zho, haxta gow lay zho lo guielñëdoh co. ⁴³ Laa grë zha ne güeynal mine nac diidzli, zha co gdziñ zaatne rnabey Pxoza naa, masaque zig xbiini ngbidz glu zho ga. ;Zha ne racladz guiena yquiaadiag zhow!

⁴⁴ 'Ziaad gac xquielrnabey Dios zig tib ncuaañ non ne noliu tib lo xcuaa miech. Zha ne gdziel tib ncuaañe sca non, ib tedsod zie zho sto zho grëse ncuaañe rap zho grieedimi si zho liu co, parne guncheñ zho ncuaañ non co.

⁴⁵ 'Zha ne rzëëb lo xquielrnabey Dios ziaad gac zho zig tib zha ne rzi quie perl mine mazdraa niazh. ⁴⁶ Zeene ron zho pa no tib perl co, rto zho grëse ncuaañe rap zho, rie zho rzi zhow.

⁴⁷ 'Nacaque xquielrnabey Dios, zig tib guiex nroob ne rgaá me_l niina, zeene rsëeb ngooz me_la lo nis grë lose me_l rtopa. ⁴⁸ Rlozhse riodzëw, dzigo rbeequia zhow ro nis, garaa rzob zho rbe zho grë me_l co; ma ne rquiin laa tib chicuid zole rio ma, laa ma ne rquiind rsëeb zho. ⁴⁹ Scapaa nagon gac miech gal dze ne gun Dios xquielwxtis me, ziaad grë xanj_l me cuee zho grë zha ntseeb lo zha ne no xnëz me, ⁵⁰ tseron zho zho lo guidox ne rieguial zho. Ga tso zho goonnë zho, haxta gow lay zho lo guielnëd_ox co.

⁵¹ Blozhse ga, rëb me lo zho:

—¿Pe bien to na zha nac grë minë blozh bne naa lo to nu?

Grëse zho pquiab rëb zho:

—Bien now.

⁵² Dzigo rëbchaa me:

—Tib zha ne rienle zha nac grë ley ne psan Moisés, ni squi guien zho zha nac zhiwseed Dios minë zialnie naa niina, masaque nac zho zig tib zha gol ne quianie chop lo ncuuan non lidz zho, quianie zho grë min gol-le ni quianiequegaa zho min cub.

Güey Jesús ladz me

(Mr. 6:1-6; Lc. 4:16-30)

⁵³ Blozhse sca bzodiidz me grë cuent co lo zho, laa me brieë ga zie me nëz ladz me.

⁵⁴ Bdzin me ga güey me yadoo, psilo me pseed me grë miech co. Per nli rzee zdoo zho ron zho grë minë rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbini ne squitaa rap me i, ne rnee miech ndal grë milagr ne run me? ⁵⁵ Tib zhinse ngurëëyag name nac me. Led lëë xingan Marí i, bets me name nac Jacob, nac José, nac Simón ni Judas; ⁵⁶ grë bzian mew, nu no zho grë zho. ¿Pa dzigo güey me wseed qui?

⁵⁷ Ib been_{casd} zho me, haxta rlëë zho lo me. Zeene gon me sca rac zho, rëb_{chaa} me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho ni men_{lidz} zho ni men_{ladz} zho nëd gun_{bey} zho.

⁵⁸ Beend me nzian milagr ga, sac sca ndip zdoo grë miech co ib nëd zho nliladz zho cho nac me.

14

Gut Juan Bautist

(Mr. 6:14-29; Lc. 9:7-9)

¹ Len dze co bin rey Herod (men ne rnabey Galilé) grë ncuane run Jesús, sac tel pa lotaaw zëëb xtiidz me; ² dzigo rëb Herod lo grë zha ne run dziin lo me:

—Rien naa lëë Juan Bautist ga quiayun grë min co, segur brieaban me.

³ Sca rnee Herod sac nanwen me zha been me Juan. Me bnabey bgaa Juan bzoob zho Juan caden bio Juan ladzguiib, ⁴ loxaque ne rnee Juan lo me nonguiel_{da} ga lëëque Herodí ptsieelnia me, sac tsielpaa bets me Lip nac Herodí. ⁵ Gocladz Herod niut me Juan, per bdzieb me menguiedz, sac rleynie zho Juan, rien zho xtiidz Dios ziadteed Juan lo miech.

⁶ Laa tibtaa dzew, lëëtaque noyac zhilni Herod dze ne bloozh me stib iz, bded tib xindzoo_p Herodí squi ndxie grë zha ne zobnie me psilo ndzoo_p biee ndzoo_p. Bdziladz me gon me zha biee ndzoo_p, ⁷ haxta brie_e ro me rëb me: “Ncuane gacladztaa luu gnab luu, znedz naaw.” ⁸ Per glole pquiil Herodí ndzoo_p, nacte rëb ndzoo_p lo me: “Mine racladz naa, xoob guic Juan tib len_{de}j gneedz luuw lo naa niinagazh.”

⁹⁻¹⁰ Zeene bin Herod sca rëb ndzoo_p, mbanse rac me; per rdeetraaw diidz niab me grieeloda, sac grëse zha ne

zobnie me ga, bin zho rëb me zdeed me ncuaaṅe gnabtaa ndzooṑ. Dzigo racse me pxeel me zha ne güeychug guic Juan len ladzguiib. ¹¹ Zeene wbire zho, zhoobse guic Juan tib len bandej bdeed zhow lo ndzooṑ, dzigo güey ndzooṑ güeydeed ndzooṑa lo xniaa ndzooṑ.

¹² Zeene gocnaṅ xpëedscuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

Bguiaaṅ Jesús gaay mil miech
(*Mr. 6:30-44; Lc. 9:10-17; Jn. 6:1-14*)

¹³ Zeene bin Jesús sca bzhaac Juan, dzigo brieē me ga bzëēb me barcw zie me tib zaatne guiēṅd miech. Per znuse biēṅ diidza, nzian grē guiedz co zha ne gocnaṅa, tib ro nis güey zho, glole zho bdziṅ zaatne no gdziṅ me ga.

¹⁴ Laa me noyet len barcw, zeene blis lo me goṅ me laa grē miech guizhiu co ndxiele ga; pquia zdoo me zho, beēṅguiac me grē mguidz ne zienie zho.

¹⁵ Laa dze ziedzelew, wbig xpëedscuel me rëb zho lo me:
—Mazd gudz lo grē miech qui guey zho na, zeena guiob tsie zho grē guiedz win ne ndxie gax i tsiesi zho ncuaaṅe gow zho; sac goṅ laa dze bdzele.

¹⁶ Pquiab me rëb me lo zho:
—¿Pe nacne guey zho squise? To none gdeed ncuaaṅe gow zho.

¹⁷ Rëbchaa zho:
—¿Per pe diēṅ yguiaaṅ no zho? Pe rnase gaay quietxtil ni chop mel ne ziaadnie no nu, lo grëtaa miech qui.

¹⁸ Dzigo bnabey me zho güeynie zho quietxtil co, güeynie zho mel co lo me, ¹⁹ ni bnabey me grē miech co bzob zho lo grē guizh nguia ne zëēb ga. Horco bzheṅ me gza quietxtil co ni grop mel co, blis lo me nēz gbaa, bdeed me xquizh lo Dios. Blozhse bdeed me xquizh, beēṅgroṑ me gza quietxtil co, mel co ne, zigse rdeed mew lo xpëedscuel

me scase scase bdiiz zhow lo grë miech co. ²⁰⁻²¹ Grëse zho dow zho haxta zaatne bieltaa zdoo zho. Miech tafa, zha bguise rgaa zig gaay mil, nan_udragaa grë men_u wnaa, grë mëédlas; ni zeene blozh dow zho, scase ncuaa_une nroob biaan, biodzë tsiipchop chicuid bio grë guietxtil co, bio grë mel_u co.

Rzë Jesús lo nisdoo

(Mr. 6:45-56; Jn. 6:16-21)

²² Zeene blozh ga, bnabey Jesús xpëédscuel me bzëëb zho len_u barcw, zeena zienerga zho tedquia zho stib nëz ro nis co; laa me bii blëz ga, nozonëz me grë miech co.

²³ Blozhse bzonëz me zho, dzigo güey me tib guic gui zob gax ga, güeyzodiidznie me Dios, tipse me zo ga laa liu pcow.

²⁴ Horco laa barcw ne zie xpëédscuel me ga no lo nis co, ib gacd csëëniob zhow, sac rree me rtsire mew, nëzrii nëzrec raca lo nis. ²⁵ Merle guini liuw, tibaque zeene laa me bdzi_un zaatne zie zho ga, tib lo nis co ziezë me.

²⁶ Zeene gon_u zho laa men_u co sca ziaad-zë lo nis co, bdzieb zho, broptsie zho rnee zho:

—¡Tib ndziin i gon_u ziaad i!

²⁷ Dzigo bnee me lo zho rëb me:

—¡Gdziebde to, naa zia_u nu!

²⁸⁻²⁹ Pquiab Pedr rëb Pedr:

—Tel_une luu i ziaad i, bneedz diidz së naa lo nis glanso naa lo luu i.

—¡Dë sca! —rëb me.

Lëëled biet Pedr len_u barcw, laa Pedr ziezële lo nis co ³⁰ zeene gon_u Pedr scataa rlis me low, bdzieb Pedr. Tibaque zeene bien_u Pedr laa Pedr nodedquiele low, hor co broptsiedan Pedr, rbedz Pedr me, tsiebee me Pedr ga.

³¹ Dzigo wbig me bzhen_u me nia Pedr, bzoli me Pedr lo nis co.

—¡Aque luu gon̄ Pedr! —rëb me—. ¿Pe nacne gocchop guic luu? ¿Gard gon̄ gliladz wen luu cho nac naa?

³² Zeene laa me biepnie Pedr len̄ barcw, laa me co blöz.

³³ Grëraa zha ne no len̄ barcw ga, rleynie zho me, rzee zdo zho rnee zho:

—¡Nasi nagon̄ ndion̄ no nli Xpëed Dios nac luu!

³⁴ Zeene bdziñ zho stib nöz ro nis co, zaatne rnee zho Genesaret, ga biet zho barcw. ³⁵ Grë miech co zeene gocnan̄ zho laa me bdziñ ga, znuse znuse pxoon̄ zho diidz grëraa guiedz ne ndxie gax ga. Dzigo brieë grë miech co, güeynie zho grë men̄ rzacnë lo me, ³⁶ r nab zho lo me siguiel̄ me maase ni xabse me xen̄ grë men̄ rzacnë co. Grëse zha ne bzheñ ni xab me, biac zho.

15

Ncuaane runctal xtol̄ miech

(Mr. 7:1-23)

¹ Tib dze, bdziñ bla zha farisé ni zla maistr ley ne ziaad nöz Jerusalén, lo Jesús; rëb zho lo me:

² —¿Pe nacne dien̄ zienald̄ xpëedscuel luu min̄e blu xmengol ne, pe nacne zeene laa zho row, ib rguibd zho nia zho zigne nopaa tsara?

³ Pquiab me rëb me lo zho:

—¿To waa, pe nacne quiaguiits to xley Dios? Golguien̄ ganle laa ne gun̄ to min̄e rnabey Dios zigne naca, lel̄ ncuaane blu xmengol to, min̄ co zienal̄ to. ⁴ Led znu gon̄ rnee lo xley Dios: “Gon̄ pxoz luu, gon̄ xniaa luu”, ni rneew: “Zha ne quie pxoz, quiegaa zho xniaa zho, ib none guet zho.” ⁵ Laa to gon̄ rnee to: “Peet nacda gund̄ zho xyudar xmengol zho niicle no me liaadz, totsaque gdeed zho gon̄.” ⁶ Tib lad rsan̄ to xley Dios, min̄e blu xmengol to min̄ co noxcora to. ⁷ ¡Loxaque guiel̄wquidie qui no to!

Rquiaalo to miech wen nac to, per lëepaa minē run to i ga bzeet Isá zeene rëb me:

⁸ Grë miech rii, rquiaalose zho runnon zho naa, rond zho diidz gun zho minē rnabey naa.

⁹ Zhlēse nac grë ncuaane run zho, rnee zho laa zho riaadgan naa; sac niapse guicle zho riab grë wseed ne quialu zho lo miech.

¹⁰ Dzigo bnee me lo grë miech ne ndxie lo me ga, rëb me:

—Golquiaadiag minē gni naa lo to nu, ni goltsoxco guien to zha naca. ¹¹ Golgacnan ganle, grë ncuaane rdzin zdoo miech, led mincod runctal xtol zho; sinque grë ncuaan ntseeb ne rza guic zho, diidz ntseeb ne rrie ro zho, min co runctal xtol zho.

¹² Horco wbig xpëedscuel me, rëb zho:

—¿Pe bien luu ganle blëe zha farisé gon zho sca rëb luu lo zho?

¹³ Pquiab me rëb me:

—Grëse yag ne squi beenbnid Pxoz naa men ne zob gbaa, ib none laaw gliaadz zolo zolow. ¹⁴ Golsaan zho, nli zha noseed miech per nac zho zig nac zha ne rold lo. Ni nanle to ganle, tel tib zha ne sca roldle lo ni xenaque zho nia stib zha ne ran, zaatne nac tib len blë, ib tedsod grop xcuaa zho tsietsobe ga.

¹⁵ Bdedse ga, wbig Pedr lo me rëb Pedr:

—Bzhiguiel bnë lo no dien zha nac diidz ne në luu ga, ne rnee luu led ncuaane rowd miech runctal xtol zho.

¹⁶ Pquiab me rëb me:

—¿Pe niicle to riendaquew dzigo lëe? ¹⁷ ¿Pe riende to grë ncuaane row miech, led mincod runctal xtol zho? Sac grë ncuaane row zho rdzinda len zdoomban zho, zhaa zaatne rdzina; tib rietedsew xcuerp zho, rlozh ga rrieegaw. ¹⁸ Sangue grë diidznë ne rrie ro zho, zdoomban

zho ga rzaw, ni lëë min co nac mine runctal xtol zho.
 19 Zdoomban zho nac zaatne rza grë ncuaañ ntseeb ne run
 zho, zig nac:

zeene rio zho grë zhgab yozh,
 zeene rut zho samiech zho,
 zeene rionie zho zha ne nole tsieel,
 zeene rionie zho zha ne nacd tsieel zho,
 zeene run zho guielgbaan,
 zeene lega rnexuu zho samiech zho,
 zeene rneenë zho samiech zho.

20 Grë ncuaañ ntseeb co nagon nac mine runctal xtol
 miech, gunctald zho xtol zho niicle tsard nia zho zigne
 nacpaa grë zhiwseed mengol.

Biac xpëed tib wnaa zit

(Mr. 7:24-30)

21 Ga brieë Jesús, güey me haxta nëz Tiro ni nëz Sidón.

22 Nëz co no me güey tib wnaa ne ziaad lo xtii zha
 Canaán lo me, nguiedz zëëb tsi wnaa co rnab me lo
 Jesús siguiel Jesús tsiegunguiac tib xpëdwana me nosacsi
 mendox. 23 Per ib pquiabd Jesús lo xtiidz wnaa co, dzigo
 wbig xpëedscuel me, rëb zho:

—Mazd bzhiguiel pquiaadiag mine rnee wnaa qui, bui
 ganle zha ncuëtaa zëëb tsi me nal me zhits ne.

24 Pquiab Jesús rëb me:

—Ziald naa par gun naa xyudar zha zit, sinque laa Pxo
 naa pxeel naa par gun naa xyudar grë zha Israel ne rzac
 zig grë mëcwxiiil ne zonziaab lo xbaxtor.

25 Scaque nonee me laa wnaa co wbig pquitsgzhib lo
 me.

—Bzhiguiel —rëb me—, been tib guielnzaac been xyu-
 dar naa.

26 Rëbchaa Jesús lo me:

—Nonguilda gon, cob ne guiet ne no nia meed gdeed new lo mecw.

²⁷ —Nliw, scaw —pquiab wnaa co—, per niicle mecwa name rsaanaque bizhuan ma rbig ma row ma mine rrieen-gaa nia meed.

²⁸ Horco pquiab Jesss reb me:

—jSquiw nagon! jRlu nli dib zdoo luu rnalo luu naa! Gacxe waa mine rnab luu i gun naa, niinagazh laaw gac.
Horcogazh biac xpeed wnaa co.

Nzian miech ne beenguiac Jesss
(*Mr. 8:1-10*)

²⁹ Nez co wbi Jesss bdzin me ro Nisdoo Galile.

Ro nis co no me, miech guizhiu ne pcaalsa lo me. Tib dze gon me scataa nzian miech co, dzigo guey me gueysob me tib guic gui win zob gax ga. ³⁰ Ga zob me rdzin gre miech co rdzinnie zho gre zhimguidz zho lo me, no zho zienie gre zha ne ne ni, no zho zienie gre zha ne rold lo, gre zha ne guiend tib nia, gre zha ne guiend tib ni, gre zha ngop, ni greragaa zha ne rlan pe stib guielguidz; grese zho beenguiac me. ³¹ jNcuaane gzee zdoo ne goc ga! Gre zha ne ni tib diidz gard gnee, per nli rley zho laa zho psilo rnee; gre zha ne guiend tib ni, guiend tib nia, laa ni zho laa nia zho biaan zigne no gaca; gre zha ne rgob ni, haxta rias zho laa ni zho goc-wen; gre zha ne rold lo, rlozhd gzee zdoo zho gre ncuaane ran zho. Grese miech ne ndxie ga, rzee zdoo zho, rley zho roolnie zho Dios.

³² Dzigo bredz me xpeedscuel me reb me lo zho:

—Rquia zdoo naa gre miech rii. Nadzele rac tson ngbidz blanso zho lo ne nu, ni na quianiedraa zho pe gow zho. Telne squise gzonez naa zho, nend pa lo zie zho nez ycow zho.

³³ Pquiab zho reb zho:

—¿Per pe yguiaan ne zho? ¿Pa guioxi ne guielwagw ne yquiiin grëtaa miech qui dan rii, naca zaatne guieñd miech?

³⁴ Dzigo bnabdiidz me lo zho, rëb me:

—¿Bla guietxtil ziaadnie to i?

—Gadzaquew no —rëb zho—, ni chop tson mel win.

³⁵⁻³⁶ Dzigo bnabey me grëse miech co bzob zho lo liu. Blozh bzheñ me gza gadz guietxtil co, ni gza mel co, bdeed me xquizh lo Dios; blozhse bdeed me xquizh, zigse rungroñ me guietxtil co scase scase rdeed mew lo xpëëdscuel me rguiz zhow lo grë miech co; scaque been me gza mel co.

³⁷⁻³⁸ Grëse miech co dow zho haxta zaatne bieltaa zdo zho. Miech guizhiuw, zha bguise rgaa zho maase tap mil, nan dragaa grë men wnaa, grë mëëdla; ni zeene blozh ga bii biodzë gadz chicuid bio grë mine biaan.

³⁹ Blozhse bnee me lo grë miech co, blozhse bzonëz me zho, dzigo laa me bzëëb leñ barcw zie ne nëz xtan zha Magdal.

16

Gocladz zha farisé niungüet zho Jesús

(Mr. 8:11-21; Lc. 12:54-56)

¹ Magdal no Jesús, bdziñ bla zha farisé ni zla zha saducé lo me, gocladz zho niungüet zho me dieñ pe nxiñd me tib diidz, pe tib ncuaañe nonguiel dgaa niuñ me. Rquiaaalo zho rnab zho lo me guñ me pe tib milagr, zeena gliladz zho nli Dios pxeñ me.

²⁻³ Dzigo pquiab me rëb me lo zho:

—¿Pe nlipaa rnee to riende to zha nac grë ncuaañe noyac leñ dze rii! Zha zëëb dzigo runbey to pe rlu lo xcow. Zeene ran to rquia xcow nizhnie bdze dze, rienle to guiet stib dze co zriee lo ngbidz. Sil ne rangaa to quia xcow nizhnie, quia xcow nlaan zhan gbaa, rienle to guioxoo

guiab dze co. ⁴ Nazdpaa ntseeb to, squitaa gocndip zdo to nëz lo Dios, ¿zha rnaraa milagr ne racladz to gan to? Stibaque milagr gon gan to, tib miñe gac zigne bzhaac Jonás.

Blozhse sca rëb me lo zho, zoque zho ga, ziega me.

⁵ Zeene brieë zho ga, zoladz xpëedscuel me ney zho guietxtil ne niow zho. ⁶ Lega nacle psilo me nonee me lo zho, rëb me:

—Golguien gon, napaa noyab to lo zhincobi zha farisé, lo zhincobigaa zha saducé.

⁷ Zeene gon zho sca rëb me, rneechaa zho:

—Porne nagon ziaadnied ne guietxtil, gane squi rnee me lo ne.

⁸ Bien me sca nonee zho, dzigo rëb me lo zho:

—¿Gardaque lëë guien to cho nac naa! ¿Pe nacle tso to zhizhgab guietxtil? ⁹ ¿Ni lalnu lëë peet riende to! ¿Pe rsoladzde to zeene gaayaque guietxtil bguiaan ne gaay mil miech, bla chicuida biaan? ¹⁰ Scaque zeene gadzaque guietxtil ni bgaaw dow tap mil miech, ¿pe niicle min co rsoladzdraa to? ¹¹ ¿Zha nac dzigo rzac to guietxtil nozet naa? Golguien ganle zhincobi zha farisé, zhincobi zha saducé ni naa.

¹² Dzigoraa bien zho led ncobidpaa rzeet me, sinque rëb me lo zho gap zho cuidad lo zhiwseed zha farisé, lo zhiwseedgaa zha saducé.

Bnee Pedr cho nac Jesús

(Mr. 8:27-30; Lc. 9:18-21)

¹³ Bdzin Jesús nëz xtan zha Cesarea de Filipo grë xpëedscuel me, nëz co no me bnabdiidz me lo zho rëb me:

—¿Cho dien ron to rnee miech nac naa?

¹⁴ Pquiab zho rëb zho:

—No zho rnee Juan Bautista, no zho rnee Lív, no zho rnee Jeremíw, meñ ne biadteed xtiidz Dios padzeela;

nogaa zho rnee no cho stib meṅ ne ziadteed xtiidz Diosa zig baaad zha ne baaad padzeela.

¹⁵ Dzigo rëb me lo zho:

—¿To waa? ¿Cho rzac to nac naa?

¹⁶ Pquiab Pedr, rëb Pedr:

—¿Luu nac Meṅ ne zëëble diidz ga cxeel Dios! ¿Xpëed Dios nac luu!

¹⁷ Dzigo rëbchaa me:

—Dichos luu Simón (xingan Jonás) brieed diidz qui ro luu, sac gon Pxoos naa meṅ ne no gbaa, meṅ co bneedz guielbiini qui lo luu, nacda ncuaane cho miech nêw lo luu. ¹⁸ Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuaa naa xyadoo naa; tsod zha ne grieelo gnitlo yadoo co, per ni guielgut gnitloda. ¹⁹ Laa naa rzo luu, luu gnee Xtidz naa lo miech zeena gacnaṅ zho zha grieelo yгаа zho zaatne rnabey Dios; luu gac zig tib zha ne rey liow, tel zha cow, zha zac cxal ro yu, ni zha zac csiooga.

²⁰ Dzigo pso me diidz lo zho choot lo gneed zho, me nac Meṅ ne zëëble diidz ga cxeel Dios.

Bzeet Jesús zha gun miech me

(Mr. 8:31-9:1; Lc. 9:22-27)

²¹ Leṅ dze co psilo Jesús bzeet me lo xpëedscuel me zha csacsi miech me. Rëb me nroob ncuaane cteed zho me, zeene laa me tsie Jerusalén; grë zha non lo menguedz, grë pxoos ne rnabey, grë maistr ley, ible stsidil zho me ni haxta zut zho me; per zeene gac tson ngbidz gut me, laa me grieeban.

²² Gon Pedr zha rnee me, dzigo bredzaque Pedr me blisqui Pedr lo me dien pe nacie rnee me laa me guet.

²³ Zeene bin mew, zoque Pedr ga, biecw me rëb me:

—¡Biche lo naa nu mendox! ¡Loxaque no luu par gungüet luu naa! Zienied guic luu miñe rnabey Dios, sinque miñe rleynie miech, miñ co zienie guic luu.

²⁴ Dzigo bnee me lo zho, rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho miñe rnabey naa, niicle tel miñ co yquiaaqui csacsi miech zho. Nodne yquia zdo zho xquielmban zho, ²⁵ sac zha ne yquia zdo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zгаа zho tib guielmban ndzon ne gdziñd dze lozh. ²⁶ Zha ne zienie guic loxaque gapcheñ, ¿pa dieñ yquiina lo zho, tel lëew yquiaaqui guey zho gabil? ¿Niacxe zrieelo gdziib zho dimi, laa zho len gabil? ²⁷ Naa ne nac naa Mgui ne pxeel Dios, zdziñ dze ne gbiire guial naa stib, guialnie naa grë xanjla naa, glu naa ganle pa lotaa men nroob nac Pxoza naa; dze co gded naa miñe tsieguial tib tib miech, tel zha wban zho. ²⁸ Ib tedsod lo grë zha ne ndxie nu niina, bii no zha ne gan ganle, zeene laa naa csilo gnabey lo guidzliu rii.

17

Bdzëëlo Jesús

(Mr. 9:2-13; Lc. 9:28-36)

¹ Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

² Guic gui co no zho, zeene gon zho laa me bdzëëlo. Masaque biinidoo rriee lo me, pale lo ngbidz; xab mew, per nli rquiabniw, masaque biini ne rrona. ³ Tibaque zeene gon zho laa Moisés ni Lí men ne biadteed xtiidz Dios padzeela, nozodiidznie me. ⁴ Rdzieb zho, lo dzeb co brie ro Pedr rëb Pedr:

—Maestro, ꞑtebaa zha grielo guiaan ne nu! Telne racladz luu, na maase gzaa no tson yu yag xiid nu, tiba cuëz luu, tiba cuëz Moisés, stiba cuëz Lí.

⁵ Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëëb tsi tib men co, rnee me:

—Lëë xpëëd naa i gon, rlyenie naa me, rzac zdoonaa mine quiayun me. Mine rnee me, golgona.

⁶ Mazdraa bdzieb zho bin zho sca rnee men co, lëëled pquitsgzhib zho haxta bdzin lo zho lo liu. ⁷ Dzigo wbig Jesús, pcaannia me zho, rëb me:

—Golsoli, gdziebde to.

⁸ Zeene blis lo zho bui zho, mese zo ga, gondraa zho schop men co.

⁹ Blozhse ga, laa zho wbi ga. Cho gui co ziad-zëëbnie me zho, pso me diidz lo zho mine gon zho ga, choot lo gzodiidzd zhow, nieeda gal dze ne laa me brieaban.

¹⁰ Dzigo bnabdiidz zho lo me, rëb zho:

—ꞑBay zha nacne rnee maistr ley, glo Lí no guiaad stib, dzigora guiaad Men ne zëëble diidz ga cxeel Dios?

¹¹ Rëbchaa me:

—Nliw, ible nacle diidz ne glo Lí guiadseed miech gon zho xtiidz Dios. ¹² Ni gacnan to ganle laa me biaadle, per beenbeyd miech me, lel psacsi zho me been zho me mine gocladztaa zho; ni ib tedsod gon, scaque csacsi zho Mgui ne pxeel Dios.

¹³ Zeene blozh sca rëb me, dzigo bien zho Juan Bautist ga rzeet me.

Biac tib mëëd ne nosacsi mendox

(Mr. 9:14-29; Lc. 9:37-43)

¹⁴ Zeene blozh biet zho cho gui co, gon zho miech guizhiu ndxie ga quiambëz Jesús. Lad co brieet tib mgui, wbig me lo Jesús, pquitsgzhib me lo Jesús, rëb me:

¹⁵ —Laa naa rnab lo luu, bzhiguiel beenguiac xpëed naa, nrooble nosacsi guidz gutye win. Blactaa ziyobe win lo gui, ziyobe win lo nis ne. ¹⁶ Blansonie naa win lo xpëedscuel luu nu, per rriyelod zho gunguiac zho win.

¹⁷ Dzigo rëbchaa Jesús lo xpëedscuel me:

—¡Pe na squitaa miech ntseeb nac to, ib nëde to gnalo to Dios! ¿Palal tiemp ne so naa gne naa lo to? ¡Ncuaane cxecwdraa naa lo to squi nac to! ¡Goltënie mëed qui nu!

¹⁸ Dzigo goctox Jesús lo mendox ne nosacsi mëed co, benxoon me ma, hor cogazh laa mëed co biac.

¹⁹ Haxta wbiraa zho ga, wbig zho lo me bnabdiidz zho dien pe nacne brieelod zho niunxoon zho mendox ne nosacsi mëed co. ²⁰⁻²¹ Dzigo rëbchaa me:

—Brieelode to niunxoon to ma, sacne rnalode to Dios. Teļ niaca miñe rnalole to Dios siquier palal yeen, gzoob ne siquier lal tib midz moxtaz, niicxe ncuaane mazdraa ngan gnab to lo me, zun mew; tsod ncuaane grieelod gun to.

Bzeet Jesús laa miech csacsi me

(Mr. 9:30-32; Lc. 9:43-45)

²² Xtan zha Galilé no zho, tib dzew rëb me lo zho:

—Naa ne nac Mgui ne pxeel Dios, ib znaaz miech naa, ²³ haxta zut zho naa; per zeene gac tson ngbidz gut naa, zriebaanaa.

Zeene bin zho sca rnee me, bio zho guielnë, mbanse rac zho.

²⁴ Bdzin me guiedz Capernaum, loxaque bzëeb me lad guiedz, laa zha ne rtop dimi ne razh yadoo wbigle lo Pedr, bnabdiidz zho dien pe rguizh me dimi co. Pquiab Pedr rëb Pedr lo zho:

²⁵ —Rguizh mew, ¿pe nacne quizhd mew?

Zeene bdzin zho len yu ne rbëz me, gardle guiab Pedra lo me, glole me bnabdiidz rëb me lo Pedr:

—Zig nac dimi ne razh lo men ne nac rey dien, ¿pe ye xpëed me rguizha, te loxaque zha zit rguizha ye?

²⁶ Pquiab Pedr rëb Pedr:

—Zha zitse rguizha.

—Nligaa sca naca —rëb Jesús—. Zha ne nac mëed nodne quizh zho, ²⁷ per par guiabd zho rdziond ne diidz, güey güeyron xanzuel luu lo nis. Meḷ ne gloopaa yгаа low, bzheḷ ma pxal ro ma, ga gdziel luu dimi; dimi co güeynie bdiizh miḷe no dizh ne grop ne.

18

¿Cho nonraa?

(Mr. 9:33-37, 42-48; Lc. 9:46-48; 15:3-7; 17:1-3)

¹ Leḷ dze co bnabdiidz xpëedscuel Jesús lo me, dien cho tib zho gac zha ne mazdraa gacnon lo grë zha ne no xnëz Dios.

² Dzigo bredz me tib mëëdbgui win, bzo me win glowtaa lo zho, ³ rëb me:

—Gneli naa lo to ganḷe, teḷne csaande to xquieḷntseeb to, teḷne gacnguudzlazde to, gac to zig mëëdwini rii, per ni xnëz Dios grieelod sëëb to. ⁴ Zha ne racladz gac zho zha non, none gac zho tib miech ndooladz, none gac zho zig tib mëëdḷas. ⁵ Miech ne gacnie zha ne sca nac, zha ne rḷeynie naa, rrieequia naale ga racnie zho.

⁶ Per miech ne yquiiḷ zho gunḷtal zho xtoḷ zho, ¿probsaxe zha co! Mazd zhi guieḷnëw lo zho ygadoo tib quie molin zhobxtiḷ yan zho tsieron zho zho nisdoo. ⁷ ¿Nac lo guidzliu rii, runḷfalte guieḷntseeb low! Runḷfalte ncuaaḷe gunḷtal xtoḷ miech, ¿per probsaxe zha ne yquiiḷ zha ne noḷe xnëz naa, gunḷtal zho xtoḷ zho!

⁸ Golḷguieḷ teḷne tib nia to, tib nigaa to rquiaqui runḷtal to xtoḷ to, goḷtichegazha. Peet nacda maase tibaque ni to, tibaque nia to zob totsaque yгаа to guieḷmban ndzon

ne gdziṅd dze lozh, lëdle zob gropa ni laa to guey gabil, lo beldox ne gdziṅd dze guuu. ⁹ Scaque bziaalo to, miṅe rquiaqui runctal to xtol to, gołtichegazha, peet nacd maase tibaque lo to zob totsaque ygaa to guiełmban ndzon ne gdziṅd dze lozh, lëdle zob gropa ni laa to guey lo beldox ne nac gabil.

¹⁰ 'Ib gunde to csanwin to grëraa zha ne no xnëz naa, zha ne nac zha mban, sac gon non zho lo Dios, anjl ne quianap zho, tibaque zo me lo Pxoz naa meṅ ne zob gbaa.

¹¹ 'Nziuu miech lo Dios, tel naa ne nac naa Mgui ne pxeel me, ib laa naa zial zialsilaa naa grë zha ne zonziaab lo me.

¹² 'Rzac Dios miech zig tib meṅ ne rquianë zdo xpcwxiil. Telne quianie zho tib gayoo ma, ni gziaab tib ma, led zëeb lëe rsan zho stapgal tsiimtap ma ne zo lo zho, rbire zho rieguib zho ma ne bziaab ga. ¹³ Zeene rdziel ma lo zho, rlozhd gleyne zho ma, lëe ma rac guiełbley que grëraa xcompañer ma. ¹⁴ Scadaa nagon rzac Pxoz naa miech, grë zha ne nole xnëz me, ib racladzd me gziaab zho.

¹⁵ 'Golguien sca, tib tib to zeene cho tib zha ne nacgrë to gun pe tib falt lo to, gołtsie gołtsienee lo zho; gropse to gołzodiidz pe nac miṅe pxin zho. Telne siguiel zho guiaan to mpas, laa to beenle gan ga gneewen to stib. ¹⁶ Laa telne nëd zho, dzigo golguib tib zha ne së, chopgaa zha ne së gan ganle zha rac zho. ¹⁷ Tel niicle scaw nëdaque zho guiaan to mpas, dzigo mazd golguiab lo grëse zha ne nacgrë to gnee zho lo zho. Telne niicle xtiidz zha co nëd zho gon zho, dzigotaa mazd golsaan zho, sacdraa to bets to ga, golcuee zho lad to, golsac zho zig rzac miech grë zha ne zianal guiełntseeb.

¹⁸ 'Gneli naa lo to ganle, grëse zha ne gon xtiidz to zeene rnee to lo zho gac-wen zho, scagaa Dios scaania me zho; per zha ne gonda, ycaaniad me zho.

¹⁹ 'Ni racladz naa gacnan to ganle, grë zha ne no xnëz naa, niicle tib nëzaque zho, per telne tipse rac zho, ncuaañe gnabtaa zho lo Pxo^z naa men ne zob gbaa, zdeed mew. ²⁰ Sac zeene rcaalsa zho roolnie zho naa, ga zo naa lo zho; niicle maase chopaque, tsonaque zho.

²¹ Dzigo wbig Pedr rëb Pedr lo me:

—Zha ne sca dzigo gun falt lo naa, ¿blataa vuelt no gun naa zho perdon? ¿Gadztaaw lëë?

²² Pquiab me rëb me:

—Lëda gon Pedr, led loxaque gadzdse vuelta. Tel blataa vuelt gun zho falt lo luu, none gun luu zho perdon.

Zha ne beend perdon

²³ 'Grë zha ne no xnëz Dios, ib none gun zho perdon samiech zho.

'Tib rey name, tib dzew bredz me grë zha ne rquia dziin lo me, par dien zha quiayun zho dziin. ²⁴ Loxaque psilo me, zeene laa xcuent tib zha co blozh brieë, nroob brieëquia zho lo me; ²⁵ par quizh zhow, peet nzhend zho. Dzigo bnabey me to zho grop tsieel zho, xpëed zho ne, ni grëse ncuaañe rap zho, parne grieelo gazh xquielqui zho. ²⁶ Zeene gon zho sca rëb me, pquiitsgzhib zho lo me, rëb zho: “¿Been guielnzaac, gop tib paciens, na dien zha gun naa quizh naa xquielqui naa lo luu!” ²⁷ Gon me zha rac zho, pquia zdoo me zho, psilaa me zho, beenquizhdaque me zho xquielqui zho.

²⁸ 'Loxaque brieë zho ga, bdzieel zho tib zha ne nzëeb palal yeen dimi lo zho, tib zha ne rquiaque xtsiin rey cow. Zigne gon zho zha co, zolinëz wbig zho bdie zho yan zho, rnab zho gagazh quizh zho xtimi zho. ²⁹ Dzigo pquiitsgzhib zha co lo zho, rnab zho siguiel zho gap zho paciens, dien zha gaclo dimi co quizh zhow. ³⁰ Pe nquiaadiag zho ga, bnab zho bio zha co ladzguiib, haxta

bdiizh zho dimi ne zëeb zho ga. ³¹ Grëraa zha ne rquia dziin lo rey co, zeen gocnañ zhow, bdeednë zho, güey zho güeyzodiidz zhow lo me. ³² Zeene bin mew, bnabey me gocredz zho, goctox me lo zho rëb me: “¿Pe clas miech nac luu! Pe rsoladzd luu zha rac luu bna luu pquia zdoo naa luu, haxta beenquizhd naa luu guielquidox ne zëeb luu ga. ³³ ¿Pe nacre pquiad zdoo luu zha co, zigne pquia zdoo naa luu?” ³⁴ Blëe me gon me sca been zho, bnabey me bio zho ladzguiib, haxta blozh bdiizh zho grëse xquielqui zho.

³⁵ 'Scadaa nagon gun Pxoz naa to, telne gunde to samiech to perdon, tel pe nac falt ne gun zho lo to.

19

Zha ne rsëbtsieel (Mr. 10:1-12; Lc. 16:18)

¹ Blozhse sca bnee Jesús lo zho, brieenie me zho ga güeyted zho grë guiedz ne ndxie xtan zha Judé, grë mine riaan nëz dan ro guiubee Jordán, nëz ne rlan ngbidz.

² Miech guizhiu ne rrie grë guiedz co, rdziñ lo me; grë men rzacnë ne rdziñnie zho, beenguiac me zho.

³ Ga no me, bdziñ bla zha farisé gocladz zho niungüet zho me, par dien pe nxiñd me tib diidz; bnabdiidz zho lo me rëb zho:

—Pe gnë luu dien, ¿pe wena csëbtsieel zha bgui ne gacladztaa csëbtsieel?

⁴ Pquiab me rëb me:

—¿Mod rande to zha zhobnee lo Xtiidz Dios? Lo co zhobnee ganle zeene psañ me miech, tib nëz zho psañ me, tib mgui ni tib wnaa. ⁵ Ni rneew, ib none grieexhaa mgui lo pxoz zho, lo xnгаа zho par gbannie zho wnaa ne nac tsieel zho, gac zho tibaque miech grop zho. ⁶ Nligaa nacdraa zho chop miech, sinque laa zho rac tibaque. Dios nac men ne

psan̄ ycatsieel miech, cho dzigo nac miech par quiits zho min̄e rnabey me.

⁷ Dzigo rēb zho lo me:

—¿Pex nac dzigo waa bdeed Moisés diidz csēbtsieel m̄gui ne racladz csēbtsieel? Rēb Moisés, zac csēbtsieel zho, totsaque yquia tib guits gdeed zho lo wnaa zaatne raquiet laa zho psaan wnaa.

⁸ Pquiabchaa me rēb me:

—Ne squitaaxe waa miech nad, miech ndip zdooc x̄mengol to, gane bdeed Moisés diidz csēbtsieel zho; sangue Dios psan̄d me diidz csēbtsieel miech. ⁹ Gacnan̄ to gan̄le, zha ne csēēb wnaa ne nac tsieel zho, ni tel̄ peet guiel̄yozh beend̄ wnaa co, dol̄ ga gun̄ zho csēēb zho tsieel zho ycaa zho stib wnaa. Scaquegaa m̄gui ne ycaa wnaa ne psēēb zho ga, dol̄ ga gun̄ zho sac gon̄ no tsieel wnaa co.

¹⁰ Dzigo rēbchaa xpēēdscuel me:

—Tel̄ scataa nac xcuent guiel̄tsieel, mazd lēēquew dzigo ctsieelniad ne.

¹¹ Pquiab me rēb me:

—Nligaa no m̄gui ne rtsieelniad, per zhis zho, ni no pe nacne sca riaan̄ zho. ¹² No zho desde rac zho mēēd, nacd zho zha ne grieelo tsonie wnaa; no zho ib miech sca rsan̄ zho. Nogaa zha ne ib zha rbeeladz zho ctsieelniad zho, parne grieelo tsoxcoraa zho gun̄ zho xtsiin̄ Dios. Zha ne sca rquiabladz ctsieelniad, maase ctsieelniad zho.

Been̄lay Jesús mēēdlas

(Mr. 10:13-16; Lc. 18:15-17)

¹³ Ga no Jesús, ndal zha ne bdziñ̄ bdziñ̄nie zho xpēēdlas zho lo me, parne cxobnia me guic win̄ gun̄lay me win̄. Grē zha ne nac xpēēdscuel me, lel̄ psilo zho rtsidiñ̄ zho pe nacne nodziñ̄nie zho grē mēēdlas co lo me.

¹⁴ Zeene gon̄ me sca quiayun̄ zho, rēbchaa me lo zho:

—Ctsirede to grē mēēdlas yeen̄ qui, golsaan guiaad win lo naa. Sac gon̄ grē mēēdlas yeen̄, ni zha ne nac zig nac win, zha co nac zha ne sēēb ygab lo Dios.

¹⁵ Dzigo psilo me pxobnia me guic grē mēēdlas yeen̄ co, been̄lay me win. Blozhse ga, laa me brieē ga.

Bzodiidznie tib zha ricw Jesús

(Mr. 10:17-31; Lc. 18:18-30)

¹⁶ Laa me zierieē ga, zeene bdzin̄ tib mgui nguieg, tib zha ricwa, rēb zho lo me:

—Nan̄ naa luu nac tib men̄ ne noseed miech, ni tib men̄ wen nac luu. Bnē dien̄, ¿pe nac minē gun̄ naa parne grieelo ygaa naa guielmban ndzon ne gdziṅd dze lozh?

¹⁷ Pquiab Jesús rēb me:

—Rnee luu lēē tib men̄ wen nac naa. ¡Nligaaw, Diosse nac men̄ wen! Teṅne nli racladz luu ygaa luu guielmban co, none tsoxco luu gban luu minē rnabey Dios.

¹⁸ Pquiab zho rēb zho lo me:

—¿Pa miṅ waa?

Rēbchaā me:

—Miṅe rnee:

Gute luu samiech luu,
teṅne nole tsiel luu, tsonied luu zha ne led tsiel luu,
cuand luu samiech luu,
yquiadiidzguizhd luu samiech luu,

¹⁹ gon̄ pxoz luu, gon̄ xnīaa luu, cueed luu xquielto me.
Bleynie samiech luu, zigne rleynie luu luu.

²⁰ Dzigo rēbchaā zho:

—Ni tib minē rnee luu i gard quits naa, grēsew zanaṅ naaw zigne naca. Racladz naa gacnan̄ naa, dien̄ peraa no gun̄ naa.

²¹ Horco rēb me lo zho:

—Teṅ racladz luu gac luu tib zha ne gban grēse minē rnabey Dios, güey sca güeyto grēse ncuane rap luu, dzigo güeytiiz dimi co lo grē zha ne guieṅd pe yquiin. Lozh ga,

dë dēnal zhits naa. Min co nagon guṇ luu, dzigo zgaa luu guielmban ndzon co; ni scagaa nroob guielnzaac ne ygaa luu nēz lo Dios.

²² Zeene bin zho sca rēb me, mbanse rac zho laa zho zey, sac nroob ncuaane quianie zho.

²³ Dzigo rēbchaa Jesús lo xpēedscuel me:

—Gneli naa lo to ganle, grē zha ne squi rapchen rzacxuu zho par sēeb zho xnēz Dios gnabey me zho. ²⁴ Ne nligaa ngan rzac zhow! Mazd ngandse rded tib camell guieer guzh lēdle sēeb tib zha ne squi rapchen xnēz Dios.

²⁵ Zeene bin zho sca rēb me, rzee zdo zho, rnee zho:

—Bay, ḷchomezhe dzigo waa nac zha ne zrieelo sēeb xnēz Dios?

²⁶ Dze bui me lo zho, dzigo rēbchaa me:

—Nligaa par miech zootle tsod zha ne grieelo sēeb xnēz me; sangue me nan me no zho. Sac tel me, tsod ncuaane grieelod guṇ me.

²⁷ Horco pquiab Pedr rēb Pedr lo me:

—No dzigo waa, ḷpe nac mine ygaa no? Nanle luu ganle, tel no grēse ncuaane rdziaap no, laa no psana, ziaadnal no zhits luu.

²⁸ Pquiab me rēb me:

—Golgona ganle, dze ne gacncub grēse ncuaane no, zeene laa Mgui ne pxeel Dios zob lo xcan ne zo zaatne nac lo guielndzon ne no me, dze co lo gza to ne nac to zha ne biaadnal zhits naa, sob to lo gza tsiipchop xcan ne rieguial to. To gac zha ne guṇ guielwxtis lo gza tsiipchop dii ne nac zha Israel. ²⁹ Grēragaa zha ne psan lidz, psan zho bets zho, bzian zho, xnial zho, pxoz zho, tsiel zho, xpēed zho, liun zho porne noyun zho xtsin naa, na lo guielmban riique laa zho gana stib tib gayoogaw tib tiba; ni ib tedsod zgaa zho tib guielmban ndzon ne gdzindraa dze lozh.

³⁰ 'Nli zig nac niina, nzian zha ne rzac zha non nac zho, nogaa zha ne rzac zho peet nond, per zeene gal dze co lalga gac zho grë zho.

20

Lalga nac grë zha ne no xnëz Dios

¹ Grë zha ne no xnëz Dios, zac zho lo me zig bzhaac grë zha ne güey xtsiin tib men co.

'Tib men co name nroob dziin quianie me, tib dzew zigne biini liu brieë me güeyguib me zha ne tsielaap xuv me. ² Bdziel me palal zho, biaan zho diidz palal quizh me zho dze, laa zho bzëëb lo dziin. ³ Glaale ngbidza brieë me güeyted me len guiedz, lëëtse güeytsib me lo bla zha ne zob ga racladz dziin. ⁴ Dzigo bree me zho, rëb me: "Goltsie xtsin naa, na quizh naa to mine non xtse to."

⁵ 'Rwe ngbidza, biire me güey me güeyguib me spalal zho. Maase las treza güeyaque me stib.

⁶ 'Zhile sëëb ngbidza, biire me güey me len guiedz. Ga bdzieel me zla zho, gon me scase zob zho ga. Dzigo rëbchaa me lo zho: "¿Pe nacne squise noded dze to?" ⁷ Pquiab zho rëb zho: "Choot rneedzdaxe dziin waa yquiaa no." Rëbchaa me: "Nasca zeena tsie to lo xtsin naa, maase quizh naa xtse to." Dzigo laa zho zie.

⁸ 'Zeene laa dze blozh bdze, bnee me lo zha ne zo lo xtsiin me, rëb me: "Bredz grë zha qui na, bdiizh xtse zho grëse zho. Zha ne bza bzëëb lo dziin, zha co glo bdiizh, lozhraa ga quizh luu zha ne glo bzëëb." ⁹ Dzigo bded zha ne bdzele dze bzëëb lo dziin ga, tib tib zho pcaase zho mine non zho tib dze. ¹⁰ Grë zha ne glo bzëëb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

¹¹ 'Zeene gon zho lalga pcaa zho grë zho, blëë zho, güey zho güeyltsiqui zhow lo men ne nacchen dziin ga, rëb zho:

¹² “Psacsi luu no i gon squi been luu. Bui ganle gdipse dze ptsuu ngbidz no pquiaa no xtisiin luu, ¿zha nac dzigo lalga quizh luu no grë no zha qui, ni niipyeenaque been zho dziin?” ¹³ Pquiab me rëb me: “Bets, nosacsid naa to, biaanle ne diidz name palal quizh naa xtse to. ¹⁴ Nana sca golgüey xtimi to i, zeena golsë. Ib zdoo naa rala lalga quizh naa to grëse to. ¹⁵ ¿Stiba, xtimi naaw, zrielo gundziin naaw zigne racladz naa! ¿Te në rac zdoo to ye, ran to rquia zdoo naa miech?”

¹⁶ ‘Scapaa nagon gac zha ne no xnëz Dios. Lal gacnon zho, zigtaa zha ne glo bzëëb xnëz mew, zigtagaa zha ne sëëb bzaw.

Bzeet Jesús tib laa miech csacsi me

(Mr. 10:32-45; Lc. 18:31-34)

¹⁷ Nëz no Jesús zie me nëz Jerusalén, tibaque bredz me gza tsiipchop xpëëdscuel me, ¹⁸ bzeet me lo zho zha gun miech me zeene laa zho gdzin Jerusalén, rëb me:

—Ib ziaab naa ladznia grë pxoz ne rnabey grë zho maistr ley, zha gnab guet naa. ¹⁹ Zha co naa ladznia zha zit, parne gunnguzee zha co naa, parne quin zho naa, ni haxta squiaa zho naa lo cruz. Per zeene gac tson ngbidza, zriebaanaa.

²⁰ Tibaque zeene wbig tsieel Zebedé wbignie me grop xingan me Jacob ni Juan, pquiitsgzhil me lo Jesús rnab me gun Jesús tib favor ne racladz me. ²¹ Dzigo bnabdiidz Jesús lo me, pe nac favor ne racladz me. Pquiab me rëb me:

—Racladz naa gneedz luu diidz sob tibga xpëëd rii naa cue luu zeene gdzin dze ne laa luu zob zobnabey luu; tib zho nëz derech, tib zho nëz revés.

²² Pquiab Jesús rëb me lo wnaa co:

—¿Ni luu gon riend pe rnab luu! ¿Niacxe zleb zho gan zho grë guieinë ne gan naa, tedgaa zho grë mine teed naa?

Pquiab zho rëb zho:

—Zlëëb no.

²³ Rëbchaa me lo zho:

—Nli nenda zan to grë guielnë ne gan naa, ni zdedgaa to mine teed naa; per ne gnedz naa diidz sob to cue naa nëz derech, nëz revésgaa, led naad ragual min co; sac laa lugar co biaanle par zha ne tsieguiala, ni Pxoza naa men ne zob gbaa men cose nan dien chow.

²⁴ Grëraa xpëedscuel me, zeene bin zho pe nac mine r nab Jacob grop Juan, blëë zho lo zho. ²⁵ Dzigo bredz Jesús zho grë zho, rëb me lo zho:

—Ran to ganle zha run grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladztaa zho. ²⁶ Sangue to gon gunscade to. Zha ne racladz gac zho zha non lo to, laa ne glu zho zha non zho, none glo zho guiaanwin, gac zho zig tib ngundziin lo to. ²⁷ Scaquegaa zha ne racladz gnabey zho lo to, none glo cseed zho gun zho mine gnabey to zho. ²⁸ Golgan ganle, niicle naa ne nac naa Mgui ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuaane ngadoo zho. Ni nanpaa naa miech guizhiu ne laa.

Biac chop zha ne rold lo

(Mr. 10:46-52; Lc. 18:35-43)

²⁹ Miech guizhiu nal zhits Jesús, laa me zieriee guiedz Jericó. ³⁰ Ro nëz co zob chop zha ne rold lo, zeene bin zho laa me ziaad ga, psilo zho nguiedz rbedz zho rnee zho:

—¡Jesús, men xtii rey David, pquia zdoo no!

³¹ Blalaa zha ne zie ga, psilo zho ndox zho lo grop zha co parne guioog ro zho, per lel hor cole nguiedzraa rbedz zho me. ³² Nacne zeene bdziñ me zaatne zob zho, blëz me, bnabdiidz me lo zho rëb me:

—jPe nadien_u gun_u to naa?

³³ Pquiab zho rëb zho:

—jRacladz no guiac lo no!

³⁴ Pquia zdoo me zho gon_u me sca rac zho, dzigo pquiaa-
nia me zhits guidlo zho. Horcogazh laa lo zho biac, laa zho
ziena_l zhits me.

21

Bdzin Jesús Jerusalén

(*Mr. 11:1-11; Lc. 19:28-40; Jn. 12:12-19*)

¹ Sca no Jesús nëz grë xpëëdsuel me, laa me bdzin
guedz Betfagé. Gaxle ga riaan_u Jerusalén, nëz danse squi
riaan_u Gui Oliv. Dzigo pxeel_u me chop xpëëdsuel me, rëb
me lo zho:

² —Goltsie guiedz win ne ndxie danse lo ne i. Ga gdzin_u
to zaatne quiadoo tib burr gus grop xpëëd, dzigo golxadz
ma goltënie ma nu. ³ Tel_u cho gnabdiidz pe nacne noxadz
to ma, golguiab lo zho: Men_u ne rnabey ne, men_u co rquiin
ma, na zigne lozh xtsiin_u ma guiaadsan_u no ma.

⁴ Ga brieequia minë bnee tib men_u ne biadteed xtiidz
Dios lo miech padzeela, zeene rëb me:

⁵ Golguiab lo men_u Jerusalén:

“Golwi ganle, laa men_u ne nac zhirey to ziaad i.
Tib men_u ligase rlu me, zob me lad tib burr win,
tib ladse ma ne rey yo zob me.”

⁶ Laa zho zie, zigne bnabeyse me zho ga, scase been_u zho.

⁷ Zeene wbire zho, laa zho bdzinnie burr co grop xpëëd
ma. Pxob zho lar ne rbix zho lad xpëëd ma, laa me bzob
ma. ⁸ Zigse zie me, no grë miech guizhiu co, rta zho lar
ne rbix zho ro nëz rded burr ne zob me ga; nogaa zha
ne rchoo nia grë yag nguia, rdziin_u zhow ro nëz rded me.

⁹ Grëse zho, zigtaa zha ne nera, zigtaa zha ne nala, nguiedz
roptsie zho rnee zho:

—¡Golḡotsaa co ne xviv xingan David! ¡Golḡotsaa gleynie ne me! ¡Zha ndzontaa Dios, pxeel me meḡ nroob qui lo ne!

¹⁰ Zeene bdziḡ me Jerusalén, rlozhd gzee zdoo grē miech ne ndxie ga, rnabdiidzlsa zho rnee zho:

—¿Bay cho nac meḡ qui?

¹¹ Rquiab grē zha ne naḡ zhits me ga, rnee zho:

—¡Lëë Jesús i! ¡Lëë meḡ Galilé qui, noteed xtiidz Dios lo miech!

Blee Jesús miech leḡ yadoo

(Mr. 11:15-19; Lc. 19:45-48; Jn. 2:13-22)

¹² Biini liu co, zeene bdziḡ Jesús Jerusalén stib, güey me yadoo nroob ne zob lad guiedz co. Bdziḡ me goḡ me nzian miech ne ndxie ga, masaque tib lgui quiayun zho, zha ne no wto, zha ne no wzi. Nacne güey me ptiixche me xmezha zha ne notsëë dimi, ptiixche me xmezha zha ne no wto palom; blee me zho ga grëse zho, ¹³ rëb me lo zho:

—Led znu goḡ zhobnee lo Xtiidz Dios: “Zaatne nac lidz naa nu, nu none guiaad grëse miech sodiidznie zho naa.” Laa to goḡ, quiayun to lugar rii zig tib zhibliee ngbaan.

¹⁴ Ga no me bdziḡ bla zha ne roḡd lo, zla zha ne në ni, wbig zho lo me. Gzase zho beenguiac me. ¹⁵ Nzian mëëdlas yeḡ ne ndxie leḡ yadoo ga, psilo win nguiedz rnee win: “¡Zha ndzontaa xingan rey David!”

Grē zha ne nac pxoz ne rnabey, ni grē maistr ley, zeene goḡ zho milagr ne been me ga, ni goḡ zho zha rnee grē mëëdlas co, rlëë zho, ¹⁶ rëb zho lo me:

—¿Pe ib rond luu ganle pe nonee grē mëëdlas qui?

Pquiab me rëb me:

—Ron naaw. ¿To waa, pe rande to ganle zha zhobnee lo Xtiidz Dios, zaatne raquiet miḡe noyac nu? Led rneew lëë:

Haxta grē mëëdlas ne bii radz,

ye win rley win roolnie win me.

¹⁷ Blozhse sca rëb me, zoque zho ga, laa me bio nëz zie me nëz Betain. Ga blëz me wdze co.

Wbidz tib yag guigw

(Mr. 11:12-14, 20-33; Lc. 20:1-8)

¹⁸ Sil co zeene no me nëz gdziñ me Jerusalén, pcaabedz me. ¹⁹ Goñ me zob tib yag guigw gax ro nëz, dzigo güey me güeyso me low dieñ pe ndzielid tib nex low niow me. Bdziñ me goñ me loxaque zhiblagsew zëëb, nacne rëb me low:

—¿Lëë blozh xtse luu nu goñ! ¿Gdziñdraa dze ne yquia nex lo luu!

²⁰ Biini liu, zeene laa zho zie Jerusalén stib, goñ xpëéd-scuél me, laa yag guigw co bidzle. Bzee zdoo zho, bnabdiidz zho lo me rëb zho:

—¿Bui ganle, bay zha nacne squi znuse wbidz yag guigw qui?

²¹ Pquiab me rëb me:

—Gneli naa lo to ganle, telne dib zdoo to rnalo to Dios, niicle ncuaane mazdraa ngan gnab to lo me, zun mew. Lëëraasi none dib zdoo to gliladz to zaca, ni palal gacchopd guic to. ²² Grëse ncuaane gnab to zeene rzodiidznie to me, zneedz mew, totsaque dib zdoo gliladz to laa to ycaaniaw.

²³ Bdziñ me Jerusalén, wbiire güey me len yadoo. Ga noseed me miech, zeene bdziñ bla zha ne nac pxoz ne rnabey ni zla zha ne nac men non lo menguedz, bnabdiidz zho lo me rëb zho:

—¿Cho dzigo nac luu ne squitaa ziaadnabey luu len yadoo? ¿Cho rnabey luu?

²⁴ Pquiab me rëb me lo zho:

—Ye naa laa naa gun tib wbnabdiidz lo to. Telne stsire to low, dzigo gni naa lo to ganle cho rnabey naa ne laa

naa noyūn grē ncuaañe noyūn naa. ²⁵ Golñē dien, ¿cho pxeel Juan Bautist biaad me pchoobnis me miech? ¿Pe Dios pxeel me, te miechsew ye?

Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnē: “¿Pex nac dzigo waa bliladzde to minē bnee me?” ²⁶ Tel na dzieetsgaa ne, miechse pxeel Juan, greeequiadaque ne.

Rdzieb zho niab zho miechse pxeel Juan, sac nan menguietz nli Dios pxeel Juan biadteed Juan xtiidz me lo miech.

²⁷ Dzigo mazd minē been zho rēb zho lo me:

—Ndiond no dien cho pxeel Juan.

Dzigo rēbchaa me lo zho:

—Niicle naagaa nagon, grieelod gni naa lo to cho rnabey naa quiayūn naa grē min rii.

Zha nac zha ne rond diidz

²⁸ Golquiaadiaga ganle. Tib mgui, quianie me chop mēēdbgui. Tib dzew, bredz me tib zho rēb me lo zho: “Xin, none gon tsie luu nadze, tsietop luu uv xcuaa ne.”

²⁹ Pquiab zho rēb zho: “¿Gad naa!” Wdzeelaaw, bien zho nonguielda ga sca gun zho, dzigo bio zho nēz güey zho.

³⁰ Laa stib zho, zeene bredz me zho bnabey me zho tsie zho lo dziin, rēb zho: “Peet nacda, na maase ga naa.” Blozh ga pasē zho nie.

³¹ Golñē dien, lo grop mēēd co, ¿cho nac zha ne bin xtiidz pxoz?

Pquiab zho rēb zho:

—Zha glo cow.

Dzigo rēbchaa me:

—Gneli naa lo to ganle, mincodaa quiayac nu niina: Grē zha ne rzac to mazdraa ngoopdol, zig nac grē zha ne rtop dimi ne razh lo zha Roma, zig nac grē wnaa ro nēz, mazd

glole zha co nozëeb xnëz Dios, lëdle to. ³² Biaadpaa Juan Bautist name biadseed me miech csaan zho xquieIntseeb zho, gban zho zigne racladz Dios, ni pe liaadz to nion to minë rnee me. Mazd grë wnaa ro nëz, grë zha ne rtop dimi ne razh lo zha Roma, znuse psaan zho xquieIntseeb zho. Laa to, niicle ran to nosaan grë zha co xquieIntseeb zho, per ib rsaande to minë nac to.

Xcuent zha ne pquianap liu

(Mr. 12:1-12; Lc. 20:9-19)

³³ Dzigo bzodiidz me stib cuent lo zho rëb me:

—Tib meñ name, nroob lbë uv beenbni me lo liuñ me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieë, laa me zey zit.

³⁴ 'Zeene gol mëë ne laa nex co gol, pxeel me bla zha ne quia xtsiin me zie lo zha ne quianap liuñ me ga, parne gdeed zha co uv ne rieguaal me ycaa me. ³⁵ Per lel bnaaz zho zho, zha ne blooquie zho, zha ne bdeedgolp zho, haxta beet zho tib zho. ³⁶ Wbiire pxeel me zla zho, hor cole nzianraa zho pxeel me, per niapse sca psacsi zha co zho.

³⁷ 'Tibaque zeene pxeelaque me xpëed me, bza guic me rëb me: "Ganse zho xpëed naaw, zon zho minë gnee me."

³⁸ 'Pex nion zho diidz, zeene gon zho xpëed me, rëbchaa zho: "jLëë zha qui nagon guiaannie liu rii! jGolgotsaa dziuut ne zho, zeena guiaana lo ne!" ³⁹ Dzigo bnaaz zho xpëed me, güeynie zho me zaatne nac tib lad lo liu co, ga güeygut zho me.

⁴⁰ 'jZha sca dien rzac to gun bizhuan liu co gza zha co, zeene laa me gbire?

⁴¹ Pquiab grë zha ne nac pxoz ne rnabey, ni zha ne nac zha non lo menguedz ga, rëb zho:

—Ni lalnu yquiad zdoo me zho, znitlogazh me zho. Lozhse ga, cuediinga me liun me lo zla zha ne gundziina, zha ne guien gdeed nex ne riegual me ycaa me.

⁴² Dzigo rëbchaa me lo zho:

—Haxta lo Xtiidz Dios no tib zaatne znu rnee, ¿pe gard ganle glab tow? Rneew:

Quie ne psëeb zha ne nozaa yu,

ni nanđ zho lëepaa quie co nac mine rnazdziits yu.

¡Ncuaane gzee zdoo new! Sac Dios bnabey sca goca.

⁴³ 'Gacnan to ganle, scadaa nagon gree to lad grë zha ne ngab lo Dios, parne gbig zha ne tsoxcopaa gun xtsiin me, zha cole guiaan xlugar to. ⁴⁴ Zha ne tsietsobe lo quie ne raquiet ga, zac zho zig tib ncuaane rac tson tap lë; laa tel lëegaaw tsobe lad zho, zac zho zig tib ncuaane die die rac.

⁴⁵ Grë zha ne nac pxoz rnabey ga, ni grë zha farisé, zeene blozh pquiaadiag zho cuent ne bzodiidz me lo zho ga, bien zho zha ga rzeet me. ⁴⁶ Nacne gocladz zho naaz zho me, per bdziebaque zho; sac ndal miech rleynie me, niicle ne rzac zho tib zha ne noteedse xtiidz Dios nac me.

22

Zha ne nëd sëeb xnëz Dios

¹ Bzodiidz Jesús stib cuent lo zho, rëb me:

² —Grë zha ne rbedz Dios ygab zho xnëz me, none tsoxco zho gon zho mine rnee me; sac nenda gdzieelo zho zig bdzieelo zha ne bredz tib rey co nie zho lo zhilni xpëed me.

³ 'Tib rey name, ziaadyob ctsieelnia xpëed me, nzian zha ne bredz me tsie lo lni. Zeene laa dze co bdiin, pxeel me zha ne quia dziin lo me zietsedz grë zha ne bredz me lo lni ga, per nëd zho nienal zho. ⁴ Wbiire me pxeel me zla zho rëb me: “Goltsietsedz zho, golguiab, laa guielwagw ne yquiin goclole, siguiel zho na guiaad zho.” ⁵ Per ib

been_{ca}sd zho zha ne pxeel_l me ga, no zho brie_e zie lo xcu_{aa}, no zho brie_e zie zhiw_{to}, ⁶ nogaa zho le_l bnaaz zho zha co, psacsi zho zho, beet zho zho. ⁷ Zeen_e gon_n me sca been_n zho, blë_ë me, bnabey me grë xmenguiib me güey zho güeygut zho grë zha ntseeb ne psacsi xmandad me ga, ni bnabey me bzë_ëg zho guiedz co. ⁸⁻⁹ Blozh ga biire pxeel_l me zla zho, rëb_l me: “Laa guiel_wagw rii goclole, min_e naca gol_tsie tib nëz yu, zha ne gdzieeltaa to, gol_cuedz zho guiaad zho lo lni; sac grë zha ne bredz naa ga niaad, laa zho blule gan_le riegui_ald zho guiaad zho nu.”

¹⁰ 'Dzigo brie_e zho güey zho, miech ne bdzieeltaa zho, zigtaa zha ndzinliw, zigtaa zha ntseeba, grëse zho bredz zho bdzi_nnie zho zho lo lni. Gol_l hor wagw, biodzëse len_n yu ndxie miech. ¹¹ Zeen_e laa rey bzë_ëb zienee me lo zho, gon_n me lad co no tib zha co nacwxabd zho zigne riegui_al gacwxab zha ne sca rie tib lo guiel_tsiel. ¹² Dzigo rëb_lchaa me lo zho: “Bets, çpe nacne squise luu bzë_ëb luu nu, bui gan_le nacwd luu lar ne bneedz zho niacw luu?”

'Dzese zob zho, rdziel_d zho pe guiab zho lo me. Gon_{se} me sca rac zho, ¹³ bnabey me zha ne nodziib lo mezh rëb me: “Gol_zobdoo zha rii, gol_xidoo grop nia zho, grop ni zho, gol_cuee zho nu gol_tsieron_n zho lo ncow nëz ley. çGa nac zaatne riegui_al zho, ga gan_n zho guiel_nëd_ox ne no ted zho, goonnë zho, haxta gow lay zho!”

¹⁴ 'Min_codaa nagon_n rac len_n dze rii —rëb Jesús—, ndal zha ne racredz sëëb xnëz Dios, per zhis nac zha ne rioxco rzëëb.

Pe nongui_l quizh miech contribucion

(Mr. 12:13-17; Lc. 20:20-26)

¹⁵ Blalaa zha farisé ne ndxie ga güey zho bnedi_idz zho dien_n zha gun_güet zho Jesús cxi_n me tib diidz, zeena min_n co yquiaaqui tsiezo zho me lo wxtis. ¹⁶ Dzigo pxeel_l zho bla

zha ne nacgrë zho, ni güey zla zha ne racnie Herod gocgza zho. Bdziñ zho rëb zho lo me:

—Maestro, ndion no niapse diidzli ziana_l luu, ni scagaa zeene rseed luu miech, rdziebd luu mine nac diidzli min co rnee luu lo zho. ¹⁷ Gane niina, racladz no gnë luu dien pe nonguiela ga rdeed no dimi ne razh lo rey ne zob Roma, te nonguiel_{da} ye.

¹⁸⁻¹⁹ Bienga me racladz zho gungüet zho me, dzigo rëbchaa me lo zho:

—¿Pe nan_l to na riend naa pe no guic to? Masaque rëb to na lëë, znuse gungüet to naa. Go_lneedz tib pes ne rguizh to nu gan_{le}.

Dzigo bdeed zho tib pes plat lo me. ²⁰ Blozh ga, rëbchaa me lo zho:

—¿Cho nu, cho lë nu quia lo pes rii?

²¹ Pquiab zho rëb zho:

—Lëë rey i, lëë lë me i quia lo qui.

Dzigo rëb me lo zho:

—Mine riegua_l sca ycaa rey, goldeeda lo rey; scaquegaa mine riegua_l ycaa Dios, lo Dios goldeeda.

²² Zeene gon_l zho sca ptsire me lo xtiidz zho, bzee zdoos zho, mazd mine been_l zho laa zho wbichese ga, laa zho zey.

¿Pe nli zrieeban miech?

(Mr. 12:18-27; Lc. 20:27-40)

²³ Dze coquew, güey bla zha saducé lo Jesús. Nac zha saducé rliladzd zho zdziñ dze grieeban miech. Dzigo bdziñ zho, ²⁴ rëb zho lo me:

—Maestro, znu psan_l Moisés diidz: Tel_{ne} glo mgui guet lo wnaa ne nac tsiel mgui, ni gopd wnaa mëëd, dzigo none betsaque zho ctsieelnia wnaa co stib, zeena gap wnaa mëëd ne guiaa_n xlugar xpëëd zha ne gut ga.

²⁵ Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut biaand

xpëed zho. Dzigo ptsieelnia stib bets zho wnaa co. ²⁶ Blozh ga gutaque zha co, pa sē zho nsaṅ mēēd. Ptsieelniaque me stib zho, goc zho tson, niicle zha co psandaque mēēd. Sca sca haxta bza gza gadzse zho ptsieelnia me, ²⁷ tibaque zeene yeque me laa me gut. ²⁸ Miṅe racladz no gacndion no, ¿chopaa dzigo gac tsiel wnaa co zeene laa zho grieaban? Sac gza gadzse zho ptsieelnia me.

²⁹ Pquiab Jesús rēb me lo zho:

—I nagon laa to rxin, miṅe naca riende to zha nac Xtiidz Dios, niicle rliladzde to zrieelo me gon me ncuaan ro ne gard gan miech. ³⁰ Sac gon zeene gal dze ne laa grē miech grieaban, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac grē anjl ne no gbaa. ³¹ Stiba, ib nli zrieaban mengut. Mod ranḁe to zha zhobnee zaatne raquiet zeene rēb Dios: ³² “Naa nac Dios ne rliladz Abraham, naa nac Dios ne rliladz Isaac, naa nac Dios ne rliladz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel Dios, jnacḁ me xDios mengut, sinque xDios zha mban nac me!

³³ Grē miech ne ndxie ga, zeene gon zho sca ptsire me lo xtiidz zha saducé co, rzee zdoo zho.

Xley Dios miṅe mazdraa non

(Mr. 12:28-34)

³⁴ Grē zha farisé ne ndxie ga, gon zho sca psioog Jesús ro grē zha saducé co.

Horco biire grē zha farisé co bzodiidz zho stib. ³⁵⁻³⁶ Lad zho no tib maistr ley, dzigo wbig maistr ley co lo Jesús, rēb zho:

—Maestro, lo grē xley Dios, bzhiguiel bnē lo naa dien, ¿pa miṅ nac miṅe mazdraa non?

Sca rēb zho, sac gocladz zho niungüet zho me. ³⁷⁻³⁸ Pquiab me rēb me lo zho:

—Lëë minē mazdraa non nu znu rnee: “Dib zdoō luu, dib guielbiini ne no guic luu, bleyne Dios, meṅ nroob ne rnabey luu.” Lëëw nac minē mazdraa non, ni lëëw gloṗaa raquiet lo grëse ley. ³⁹ No stib minē rnee: “Bleyne samiech luu zigne rleyne luu luu.” Ye miṅ rii nona, meraque lala con miṅ glo. ⁴⁰ Zha ne gban zigne rnabey grop ley rii, lëële grë ley ne psan Moisés ga, lëële grë zhiwseed zha ne biadteed xtiidz Dios ga, zienal zho.

¿Cho xpëëd nac Crist?

(Mr. 12:35-37; Lc. 20:41-44)

⁴¹⁻⁴² Gon Jesús nzian farisé ndxie lo me ga, nacne bnabdiidz me lo zho rëb me:

—¿Zha dieṅ rzac to guiaad Meṅ ne zëëble diidz ga cxeel Dios? ¿Cho lo xtii grieequia me?

Pquiab zho rëb zho:

—Lo xtii David grieequia me.

⁴³ Dzigo rëbchaa me lo zho:

—¿Pe scaw sca? Zha nac waa zeene bdeed Espíritu Sant guielbiini lo David bzeet David meṅ co, rëb David me nac meṅ ne rnabey David. Golgan ganle znu bnee David:

⁴⁴ Rëb Dios lo meṅ ne rnabey naa:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csan naa zho ladznia luu.”

⁴⁵ Gase nagon telne nli zha xtii David gac Meṅ ne cxeel Dios ga, ¿zha nac dzigo rnee David meṅ co rnabey David?

⁴⁶ Ni tib zho ib bdzielz zho zha ntsire zho lo xtiidz me; desde dze co ni stib zho biazhdraa pe nabdiidz zho lo me.

23

Minē nac maistr ley grë zho zha farisé

(Mr. 12:38-40; Lc. 11:37-54; 13:34-35; 20:45-47)

¹ Dzigo psilo Jesús bnee me lo grë miech co, ni lo xpëedscuel me, ² rëb me lo zho:

—Grë maistr ley ni grë zha farisé ib lëë xtsiin zho ga, nac cseed zho miech zha nac ley ne psan Moisés. ³ Golguien golgon xtiidz zho, pper nsin golso, ib gunde to minë run zho! Nac zho, ni lalnu rund zho minë rseed zho miech. ⁴ Rio zho rnee zho lo miech, min rii, min rii rnabey ley gun to, ni per ni zha rioxcod zho siquier csilo zho gun zhow.

⁵ ;Grë ncuaañe run zho, laaw runse zho par ganpaa miecha! Par guiab miech nguzobdiidz zho lo Dios, rio zho led zhid nzhen grë lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieen peraa rquia lada, xab zhow, haxta zhits ni zho rbiba. ⁶ ;Zeene rbedz miech zho tib wagw nroob, rdziladz zho zhapaa rzob groļ mezh, niicle len yadoogaaw, zaatne glupaa zha non nac zho, ga rzob zho! ⁷ Ro nëza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

⁸ ’Sangue to gon yguibde to dien zha gnee miech “zha rac” nac to, sac tibaque men rac no, lëë me ga zëëble diidz cxeel Dios; golguien ganle tel to lalga nac to, rriequia bets to grë to. ⁹ Ib gunde to zig run grëraa miech, runnon zho tib samiech zho rnee zho lëë pxoz zho ga, sac tibaque men ne nac Pxoz to, lëë men co no gbaa. ¹⁰ Yguibde to sac miech topaa gunctsin zho lo Dios, sac loxaque Men ne nole diidz ga cxeel me, men cose zrieelo gunctsin zho lo me. ¹¹⁻¹² Nodne gacglaa to lo samiech to, mazd ndooladz golgac lo zho, sac zha ne racglaa, ziaanwin zho. Gacxe waa, telne racladz to gacnon to, none ndooladz gac to lo samiech to.

13 'j;Probsaxe to maistr ley, probsaxe to zha farisé! Lēda i gon noyūn to, rzac to noxco to sēēb miech xnēz Dios, per lel noca to sēēb zha ne racladz sēēb. Ni stiba, per ni to nod xnēz me. 14 [j;Probsaxe to! Guielntseeb i gon ruṅ to, rio to rlozhd gool to xlay to rzo to ro nēz, ni noque to rla to ncuane rapse grē wnaa viud; ib tedsod gon guielnēdox ne yгаа to.] 15 j;Probsaxe to, rzac to na lēēw ga ruṅ to! Rio to gui dan rbix to, haxta rded to nisdoo, rquiaguib to dien cho sēēb xnēz to ni rlozh ga laa ne ygab zho nēz lo Dios, lel nēz len gabil zienie to zho. 16 j;Probsaxe to, nac diidz name to noseed miech, ni per ni to rienḍ pe rnee to! Rnee to lo miech: “Zha ne rzeet yadoo ni tel gund zho mine rnee zho, peet nacd ga, per tel gzeet zho grē or ne no len yadoo ni gund zhow, dol ga guṅ zho.” 17 j;Nadzpaa nxen to, nadzpaa ncow nac guic to! ¿Niacxe mazdraa non or lo yadoo? Golguien ganle por yadoo, naclay grē or co. 18 Rneequē to: “Zha ne gzeet lo pcoog, led dolda telne gund zho mine rnee zho; per tel gzeet zho gon ne ndziib lo pcoog ni gund zhow, dol ga guṅ zho.” 19 j;Pe nlipaa rnee to peet rienḍe to! ¿Niacxe mazdraa dzigo non gon que lo pcoog? ¿Pe ranḍe to por lo pcoog co raclay gon? 20 Golguien ganle, zha ne rzeet lo pcoog, yele grē ncuane ndziib low ga quiazeet zho; 21 zha ne gzeetгаа yadoo, haxta Diosle ga gon rzeet zho, sac ga rbēz me. 22 Scasaque zha ne gzeet gbaa, zaatne rzoble Dios ga nozeet zho, masaque rrieequia me ga rzeet zho.

23 'j;Probsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta grē guizh bitxtil, guizh nizh, guizh comin ruṅ to tsii lal, rdeed to tib lala mine rieguiāl tsiesan to yadoo, laa ley ne mazdraa non zienied guic to guṅ to mine rnabeya. Nli rieguiāla gdeed to grē gon co, per none scaque tsoxco to guṅ to mine nac diidzli, none yquia zdoo to samiech to, none dib zdoo to

gnalo to Dios. Min̄ rii nac min̄e mazdraa non.

²⁴ ¡Ne nlipaa ib riende to pe quiayun̄ to! Rzac to na noxco to gun̄ctalde to xtol̄ to, masaque ni tib ngurudz rsaande to tso lo ncuane row to, ni riende to rrieequia haxta tib camell rab to. ²⁵ ¡Probsaxe to, masaque nac to zig tib plat, zig tib tas ne n̄z zhitssew mbe rna, laa n̄z leña rnaadraa! Laglaase rquiaalo to miech wen nac to, per tibaque noban to, tibaque nosacsi to samiech to. ²⁶ Golguien̄ none glo csaan to xquiēntseeb to, none gac to zig tib plat zig tib tas ne zigtaa mbe n̄z zhitsa, scagaa mbe n̄z leña. ²⁷ ¡Probsaxe to, nac to gon̄ zig gr̄e baa ne dieen̄ paraa nquitsbie rna! Niow rlu n̄z zhitsa, laa n̄z leña loxaque gr̄e ncuaan̄ biodz, loxaque gr̄e dzit ngutoo nodz̄e. ²⁸ Sca gon̄ nac to, ne rac to zootxe luu waa nli miech ndzinli nac to, per n̄z len̄ zdoo to loxaque zhgab ne dien̄ zha yquidie to miech, zha csacsi to miech no to.

²⁹ ¡Probsaxe to maistr ley, probsaxe to farisé! Ni lalnu guiēlto guiēnd lo to, rio to rzhixcuaa to ro xpāa gr̄e zha ne biadteed xtiidz Dios, ni l̄eepaa gr̄e pxozgol to beet zho. Dieen̄ peraa run̄ to rquiaalo to rsoladz to zho. ³⁰ Rnee to: “Tēlne niaca min̄e nole ne len̄ dze co, ndeete ne diidz nsacsi xm̄engol ne gr̄e men̄ rii.” ³¹ ¡L̄ēeque to gon̄ nobeero ga, zha nactaa lo dii ntseeb ne ziaad to! ³² ¡Scaque nasca golgun̄! ¡Gol̄tsienal̄ gr̄e min̄e been̄ pxozgol to ga! ³³ ¡Miech ngoopdo! ¡Zhin̄ mendox! Tēlne csaande to xquiēntseeb to i, ib tedsod gon̄ gab̄il̄ guey to.

³⁴ Gr̄e zha ne cxel̄ naa, zig nac zha ne guiadteed xtidz naa, zha ne nacie Esp̄iritu Sant, zha ne yгаа guiēl̄biini yquiaa zho min̄e gnabey Esp̄iritu Sant zho, ib tedsod sacsi to zho. No zho gutgazh to, no zho yquiaa to lo cruz, no zho l̄ēeque len̄ xyadoo to gdeed yag to zho, ib gan̄dzede to zho, stib guiedz, stib guiedz tso to ctsid̄il̄ to zho. ³⁵ Blactaa gr̄e miech ne sca peet xtol̄d ziyut to gr̄e xm̄engol to, psilow

desde Abel haxta Zacarí xingan Berequí, men ne beet xmengol to zaatne nac gax lo pcoog len yadoo. Ni ye to gon zëeb xchen grëse zha co. ³⁶ ¡Gneli naa lo to ganle, grë miech ne gon mban len dze rii, grë to zho yгаа guieInëdox ne tsieguial to por grëtaa guieIntseeb co!

³⁷ ¡Aque tow men Jerusalén! ¡Pe nacte squitaa nac to, rut to zha ne ziadteed xtiidz Dios lo to, rgoquie to grë zha ne rxeeI me lo to? Blactaa gocladz naa, niacnie naa to, nquianaap naa to, zig run nguid rgueedz ma xpëed ma, per bzhiguieI de to. ³⁸ Gacnan to sca ganle, nadzetaa gon laa lidz to nu guiaan ngan, ³⁹ sac gandraa to naa, haxta gal dze ne guiab to: “¡Zha ndzontaa men qui pxeel Dios lo ne!”

24

¡Nsin golso!

(Mr. 13:1-23; Lc. 17:22-24; 21:5-24)

¹ Laa Jesús zieriee len yadoo grë xpëedscuel me, zeene pcuëzdze zho me, rëb zho:

—Gotsaa gwi ne ganle zha niaataa yadoo rii.

² Blozhse bui zho low, rëbchaa me lo zho:

—Niicle squitaa nagon niaaw, per zdziñ dze ne nitlow dib nacsew. Ni stib quie qui guiaandraa zigne squi zhobxcuaaw i.

³ Brie me len yadoo ga grë me zho, laa zho zie nëz Gui Oliv. Bdziñ zho cho gui co, ga bzob me grë me zho. Dzigo wbig gax bla zho lo me, bnabdiidz zho rëb zho:

—BzhiguieI bnë lo no dien, ¡pa hor dzigo gac mine bzeet luu ga? ¡Zha glu zeene laa luu ziaadyoble guiaad? Zeene nitlogaa guidzliu, ¡zha gacndion no laa dze co ziaadyoble?

⁴ Pquiab me rëb me lo zho:

—Nsin golso, zeena choot yquidiede to. ⁵ Sac nzian zha ne grieequia guiab zho zha nac Men ne zëëble diidz cxeel Dios; ni nzian miech ne yquidie zho. ⁶ Zeene gon to nêzrii nêzrec noxtseeb csilo dil, guiabde to togo lëële dze ne guial naa ga bdziñ; sac niicle noyacle dila, noxtseebragaa pa csilo gaca, led lëdle ne nitlo guidzliu ga. ⁷ Garaa csilo grë dildox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nêzrii nêzrec csilo gni grë zhodox, nzian zaatne gan miech gbin. ⁸ Ni lega loxaque mine rsilosew ga, sac nroobraa guielnë ne gan miech lozh ga.

⁹ Zeene laa grë ncuaan rii noyac, ðnsin golso! Sac hor co laa miech tsielo to lадznia zha ne csacsi to, haxta zut zho palal to, grëse miech stsidil zho to loxaque ne nac to zha ne no xnëz naa. ¹⁰ Nzian zha ne nole xnëz naa, len dze co laa zho gbiche, laa zho csilo lëëque zha glëënie zha ne nacgrë zho, haxta zielo zho zho lадznia zha ne gut zho. ¹¹ Len dze co zrieequia nzian zha ne yquidie miech guiab zho xtiidz Dios noteed zho, ni nzian zha ne gliladza. ¹² Grë zha ne nole xnëz naa, zeene gan zho grëtaa guielntseeb, grëtaa dol ne quiayun miech len dze co, ndal zho gleyniedraa zho Dios dib zdoo zho. ¹³ Per zha ne tiblifique gac, gbiched zho lo Dios, niicle tel petaa gan zho noyac, zha co gac zha ne gdziñ lo me. ¹⁴ Niicle scataa noyac grë ncuaan co, ib none ygaaz Xtiidz Ndzon Dios lo grëse miech, grëtaa zaatne ndxie miech laa zho gacnaa; lozhraa ga dzigo laa guidzliu rii nitlo.

¹⁵ Zeene gan to zaatne nac Lugar Nda len yadoo, zo tib ncuaane rieguiald so ga, tib ncuaane ziaad gnitlo, zigne bzeet Daniel men ne biadteed xtiidz Dios (zha ne glaba, none guien zho zha naca), hor co golguib dien zha xoon to. ¹⁶ Zha ne no grëraa guiedz ne ngab Judé, none xoon zho tsie zho dan, ga tsietsolan zho. ¹⁷ Zha ne lëëtaque

hor co no glaa guic lidz, none lëälëd xoon zho, ib guiabd zho sëëb zho leñ yu tsiebee zho ncuaañ rap zho. ¹⁸ Zha ne quiagaa lo dziin dan, ib gund zho tsie zho lad guiedz tsixi zho xab zho. ¹⁹ ;Prob grë meñ wnaa ne lëëtse leñ dze co zoney xpëëd, meñ ne quaniegaa mëdyeen ne bii radz! ²⁰ Golnab lo Dios gande to guielnë co leñ mëë ne rac nal, dze ne rdziiladzgaa to lo dziin. ²¹ Ne nligaa guielnëdodoxa. Wlal ne biaan guidzliu haxta lo nadze, gard gan miech tib guielnëdodox sca, ni gandragaa zhow ted ga. ²² Telne csaan Dios nroob dze gac guielnë co, ni stib miech rii guiaandraa; per na por grë zha ne bzooblo me sëëb xnëz me, gdeete me diidz gaca nroob dze.

²³ 'Zigne rne naa ga, leñ dze ne scataa gan miech grë dil co, zha ne gnë lo to: "Goltë nu ganle, lëë Men ne nole cxeel Dios ga blanso nu", gnëgaa zho: "Goltsie nec ganle, laa me bdziñ ga", gliladzde tow. ²⁴ Sac zrieequia zha ne yquidie guiab zho zha nac meñ co, zrieequia zha ne guiab xtiidz Dios ziadteed zho lo miech, zuñ zho grë milagr nroob, parne yquidie zho miech, haxta zha ne nole xnëz Dios, zguib zho dieñ zha gdeeda diidz yquidie zho zho. ²⁵ ;Nsin sca golso! Benque laa naa nilew lo to. ²⁶ Nligaa zha ne gnë lo to laa meñ ne pxeel Dios ga blansole, gliladzde tow. Nenda cxeel zho to tib dan zit, gnë zho: "Goltsie ganle laa me no ga", gnëgaa zho pa tib leñ yu ne no me, ni tib xtiidz zho gliladzde to. ²⁷ Sac zeen gal dze ne guiaad me stib, gacda ncuaan ngueets zhliaan, grëse miech gan me. Zig tel guiab tib belye nroob ne glu zhan gbaa, desde nëz ne rlan ngbidz haxta nëz ne rzëëb ngbidz, ;niacxe gand grëse miecha? ²⁸ Zlupaa zeene laa me guiaad; nanle to ganle zaatne nix ma gut, ga rcaalsa pech.

Ziaad Jesús stib

(Mr. 13:24-37; Lc. 12:41-48; 17:26-30, 34-36; 21:25-33)

²⁹ 'Zeene lozhse gan miech grë guielnëdox co, laa lo ngbidz ycow, gziinidraa mëë. Grë mel ne ndziib gbaa, laa ma gliaal; grëraa ncuaane no gbaa, masaque nëzrii nëzrec gaca. ³⁰ Horco zlu ganle zeene laa Mgui ne pxeel Dios ga, ziad-zëëb lo xcow con grë guielndzon, con grë poder ne rap me, grëse miech mban gac zho, zoon zho gan zho me. ³¹ Grë xanj Dios, hor co laa Dios cxeel zho tsiecuedz zho zhitrompet zho parne ycaalsa grëse zha ne ngab xnëz me, tel pa lotaa lo guidzliu no zho.

³² 'Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëë nëëg ziaadgaxle. ³³ Scaque nagon zeene gan to laa grë mine rne naa lo to nu rsilo noyac, dzigo nanle to laa dze ne guiaad men co ziaadgaxle. ³⁴ Gneli naa lo to ganle, nzian miech ne mban niina bii zan zho zeene laa grë ncuaan co csilo gac; sac ible ncuaane gaca. ³⁵ Zdzin dze ne nitlo gbaa, nitlo guidzliu, sangue mine rne naa lo to nu, nitloda; ible laaw none gac.

³⁶ 'Lëëraasi choot nand dien pa dzew, dien pa horgaaw, per ni grë anjl ne no gbaa, per ni naa nanda, loxaque Pxoze naa nana.

³⁷⁻³⁹ 'Nanle to ganle zha bzhaac miech len dze ne wban Noé, ib bliladzd zho xtiidz me. Guxt no zho lo zhilni zho, zha ne notsieelnia, zha ne nobediingaa xpëëd, laa dze bdzin laa Noé bzëëb len barcw; tibaque zeene biao zho biini laa guiedox co nonitlolo zho. Scadaa nagon sac grë miech nad rii, tibaque zeene tsa zho biini laa Mgui ne pxeel Dios ga ziaadle. ⁴⁰ Horco zaatne quia chop mgui lo dziin dan; tib zho tsienal zhits me, stib zho guiaan. ⁴¹ Zaatne quiayot chop wnaa, tib zho tsienal zhits me, stib zho guiaan.

⁴² 'jNsin sca golso, sac gon nande to dien pa horpaa guiaad me, benque laa vis racle lo to! ⁴³ Golgan ganle,

teḷ niaca miṇe gacnaṇ miech laa ngbaan tsieban lidz zho guieel, per nand zho dieṇ pa horpaaw; ꞥniacxe zaaguies zho? Led sobna zho lëë, nsin nsin so zho. ⁴⁴ Scaque to nagon, none nsin so to, sac gonṇ lega naclew zeenṇ ganṇ to laa me ziaadle.

⁴⁵ 'Golganṇ ganṇle, masaque laa to gac nagonṇ zig tib ngundziin ne riaannie ro lidz menṇ ne quia zho xtsiinṇ.

'Ngundziin ne ndzinli, zeene laa menṇ ne quia zho xtsiinṇ ga gree, ine niowse guiaanṇ zho guiaannie zho grëraa zha ne no lidz me. ⁴⁶ Zha ne sca gunṇ, ꞥwen tsie zho, sac zeene gbire me ganṇ me scataa noxco zho dziin ne pso me zho, ziaṇnziiu zho lo me ⁴⁷ haxta so me zho, zha yquiaanap grëse ncuaane rap me!

⁴⁸ 'Teḷ ngundziin yozhgaaw, miṇe tsienie guic zho guiab zho gbireniobd menṇ ne quia zho xtsiinṇ ga, ⁴⁹ csilo zho csacsi zho grëraa zha ne nac ngundziin, csilo zho ctsieelsa zho grë ngonziu tso zho loxaque gzudz zho, loxaque gowcho zho, ⁵⁰ tibaque zeene ganṇ zho laa me bdziṇle. ⁵¹ Zha ne sca gunṇ, per peraa dieṇ gunṇ me, ib tedsod nroob caxtigw ne cteed me zho, sonëz me zho guey zho zaatne no grëraa zha ne rond diidz, ga tso zho grë zho zha co goonnë zho, haxta gow lay zho lo guieḷnëdox ne ted zho.

25

Zha bzhaac tsii wnaa nguieg

¹ Blozh ga rëbchaa Jesús lo zho:

—Par sëëb miech zaatne rnabey Dios, masaque naca zig rzëëb miech tib lo lni zaatne noyac tib guieḷtsieel.

'Tsii wnaa nguieg name, brieë zho ziexinëz zho mgui ne ctsieelnia, tib tib zho bise zho psin win ne rec nceit ne rziini. ²⁻⁴ Gaay zho goc ligier pcodzëë zho zhipsin zho nceit, ni zhaaque bi zho zniipa; laa zgaay zho gocnroladz,

zigne bzhense zho psin co scase bi zhow, bid zho nceit ne niodzëraaw.

⁵ 'Goc pa hora rio zhimcaalo zho, ni rdziñdaque mgui ne ziexinëz zho ga, tibaque zeen_u laa zho pquia mcaal.

⁶ Gol_l gro_l guieela, zeen_u laa vis rac, laa mgui co ziaadle, zha ne ziexinëz me ga, zac grieë zho tsiedzieel zho me.

⁷ Lëëlëd brieë mcaallo gza wnaa nguieg co, psilo zho nozhixcuaa zho zhipsin zho. ⁸ Zeene gon_u gza zha nroladz co ygaadraa zhinceit zho, dzigo bnab zho lo zgaay zha co, gdeed zho niip nceit yquiin zho, sac laa zhipsin zho noyuule.

⁹ Pquiab zho rëb zho: "Grieeloda, sac mine yquiinse zhipsin no ziaadnie no. Mazd goltsie zaatne rto zhow, ga goltsiexiw." ¹⁰ Per lo lal ne ziexi zho nceit, laa mgui co bdziñ. Zeene wbire zho, laa ro yu nioogle, loxaque gza zha ne nsinle zo ga, zha cose bzëëb len_u yu.

¹¹ Dzigo psilo zho, rcaan_u nia zho ro yu, rbedz zho mgui co cxal me ro yu sëëb zho. ¹² Per bdeete me diidz nzëëb zho, rëb me: "Runbeyd naa to gon_u, nan_d naa dien_u cho nac to."

¹³ 'iNsin sca golso! —rëb Jesús—. Sac gon_u nan_de to pa dzepaa, pa horpagaa gbiire guiaad Mgui ne pxeel_l Dios.

Zha ne biaannie dimi

¹⁴ 'Mgui ne pxeel_l Dios ga, ziaad gac me zig tib men_u ne no grieë tsie tib viaj zit.

'Tib men_u name no grieë me tsie me tib guiedz zit, dzigo bredz me zha ne run_u dziin lo me, bdeed me palalga xtimi me lo zho gundziin zhow len_u dze ne guiend_u me ga. ¹⁵ Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me mine rgobey me grieelo zho gundziin zho, dzigo laa me brieë laa me zie.

¹⁶ 'Zha ne biaannie gaay mil pes plat co, güey zho bloonon zhow, beena gan zgaay mila. ¹⁷ Zha ne biaannie chop mila, ye zho güey zho bloonon zho dimi co, scaque

beena gan schop mila. ¹⁸ Laa zha ne pcaania tib mila ga, leḷ güey zho güeyteen zho tib guieer güeyloliu zhow.

¹⁹ 'Goc bla iza laa meḅ co bdziḅ, dzigo bredz me zho tib tib zho, tsie zho gzodiidz zho dieḅ yo dimi ne biaannie zho ga.

²⁰ 'Bdziḅ zha ne pcaania gaay mil pes plat co, bdziḅnie zho xtimi me, rēb zho: "Laa xtimi luu nu gon, lēē gaay mil pes ne psan luu lo naa nu, laa zgaay mil miḅ rii nac miḅ bdziniaaw." ²¹ Rley me rēb me lo zho: "ḷZha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa miḅ gnedz naa gundziin luu. ḷNa bded, zeena ygaa luu grē guieḷbley ne quiayac nu!"

²² 'Blozh ga, bdzinaque zha ne biaannie chop mila ga, ye zho laa zho bdziḅnie xtimi me, rēb zho: "Laa xtimi luu nu gon, lēē chop mil pes ne psan luu lo naa nu, laa schop mil miḅ rii nac miḅ bdziniaaw." ²³ Pquiab me rēb me: "ḷSquiw nagon! Rley naa ran naa squitaa ndzinli luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa miḅ gnedz naa gundziin luu. ḷNa bded, zeena ygaa luu grē guieḷbley ne quiayac nu!"

²⁴ 'Zeene bdziinta zha ne biaannie tib mila ga, rēb zho lo me: "Nli bendziind naa xtimi luu, sac nanle naa zha nac luu, niicle paraa niundziin naaw, grēse miḅ niuna gan lo luu niana; ²⁵ gane mazd bialoliu naaw. Tib mil naca bneedz luuw, ledaaw nu." ²⁶ Blēē guic me, rēb me lo zho: "ḷBiche nu, paat rquiind naa miech yozh, miech nroladz ne squi nac! Conque nanle luu sca nac naa, ²⁷ ḷpex nac dzigo waa bioxcod luu maase mbediḅ luu dimi qui, ndziniaaw palal ncaania naaw niina?" ²⁸ Dzigo rēbchaa me lo zha ne ndxie ga: "Niinagazh goḷcob tib mil pes qui

lo zha qui, goldeeda lo zha ne ziaadnie tsiw i. ²⁹ Sac zha ne rioxco rundziin ncuaaṅe rcaania zho, zacnroobraa ncuaaṅe yquianie zho. Laa zha ne squi nac, haxta miṅe pcaaniale zho, zdiooba lo zho. ³⁰ Golxen zha yozh qui, goltsiesan zho lo ncow nēz ley. Ga gan zho guiēlnēdox ne tsieguial zho, ga goon zho haxta gow lay zho.”

Zha gan Jesús guiēlwxtis

³¹ Blozhse bzodiidz Jesús cuent co lo zho, rēbchaa me:

—Naa ne nac naa Mgui ne pxeel Dios, zeen gal dze ne laa naa guial stib, zialnie naa grē xanj naa, zlu grētaa guiēlndzon ne rap naa, laa naa sob lo xcan ne raguial naa soob naa. ³² Grēse miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpēcwxiiil zho. ³³ Zha ne no xnēz naa, zha co gdziṅ naa cue naa nēz derech, laa zha ne nod xnēz naa, cue nēz revés.

³⁴ Lozhse ga, naa ne nac naa meṅ ne rnabey, hor co laa naa cuedz zha ne no xnēz naa, guiep naa lo zho: “Golṭē grēse to, to ne nac to zha ne nziuu lo Pxoz naa. Golṭed zeēna ycaania to zaatne cuēz to, ible par to bzaa mew desde zeēne bzaa me guidzliu. ³⁵ Sac zeēne pcaabedz naa, bneedz to ncuaaṅe dow naa; zeēne bnab zhis naa, bneedz to ncuaaṅe go naa; zeēne bial naa ladz to, bneedz to lidz to blēz naa; ³⁶ zeēne goṅ to guiēnd xab naa, bgacwxab to naa; zeēne bzhaecnē naa, zeēne bio naa ladzguiib, biaad to biaadgan to naa.” ³⁷⁻³⁹ See zdoo zho gnē zho: “¿Per pa hor bneedz no ncuaaṅe doow luu, ncuaaṅe go luu, pa hor bneedz no zaatne blēz luu, pa horgaa bneedz no lar ne gotxab luu, ib bdziōnd no nzhaacnē luu, bdziōnd no niogaa luu ladzguiib?”

⁴⁰ Dzigo guiep naa lo zho: “Gzobtaa hor ne goṅ beēn to xyudar zha ne nacgrē to, güeygan to zho, pcaaniagaa

to zho, niicle zha ne bzoob miech peet nonda, rriequia xyudar naa ga been to, rriequia naa ga bиаadgan to.”

⁴¹ 'Laa zha ne ndxie nēz revés, hor co laa naa gzonēz zho, guiep naa lo zho: “¡Golbiche lo naa nu, miech ndziibdee! ¡Golsē lo guidox ne rieguiāl to, zaatne no guey mendox grē xanj! ma! ⁴² Sac gon, bio dze pcaabedz naa ni bneedzde to ncuane niow naa; bnab zhis naa, ni bneedzde to pe nie naa. ⁴³ Bial naa ladz to, ni bneedzde to zaatne mbēz naa; gon to guiend xab naa, ni ni tib lē lar bneedzde to niacw naa. Bio naa ladzguiib, bzhacnē naa, ni pe liaadz to niaadgan to naa.”

⁴⁴ 'Squiab zho gnē zho lo naa: “Per pa hor bdzion no luu rcaabedz luu, rnabгаа zhis luu; pa hor bdzion no guiend pa cuēz luu, guiend lar ne gacw luu; pa horgaa bdzion no no luu ladzguiib, nixгаа luu rzacnē luu.”

⁴⁵ 'Dzigo guiep naa lo zho: “Grēse vuelte ne bzoliaadz to niun to xyudar zha ne no xnēz naa, bzoliaadz to niegan to zho niicle zha ne mazdraa wina, rriequia naa ga sca been to.”

⁴⁶ 'Horco grēse zha co laa zho guey lo guidox ne gdzindraa dze grieē zho; laa zha ne bioxco wban zigne rnabey naa, grēse zho laa zho yгаа tib guielmban ndzon ne gdzindraa dze lozh.

26

Bnediidz zho dien zha gnaaz zho Jesús
(Mr. 14:1-2; Lc. 22:1-2; Jn. 11:45-53)

¹ Zeene blozh sca bnee Jesús lo grē miech co, dzigo rēbchaa me lo xpēdscuel me:

² —Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios, lo lni co gon gnaaz miech rii naa, tsielo zho naa ladznia zha ne yquiaa naa lo cruz.

³ Grë zha ne nac pxoz ne rnabey, grë maistr ley ni grë zha ne nac men non lo men guiedz Israel, lëëtaque hor co laa zho ndxie lidz Caifás, men ne nac pxoz nroob. ⁴ Laa zho ndxie ga, nonediidz zho dien zha grieelo gnaaz zho Jesús, gut zho me, per tib mod ne grieelod glisqui men guiedza. ⁵ Rnee zho: “Lëëraasi choot gnabeyd ygaa me merpaa dze lni, zeena gacntseebd menguedz.”

Pchoob tib wnaa nceit nex guic Jesús

(Mr. 14:3-9; Jn. 12:1-8)

⁶ Betain ga no tib men ne biac lo guiedz lepr, lë Simón. Lëëtaaque no Jesús lidz men co, ⁷ zeene bdzin tib wnaa bdzinne tiblo nceit nex, nosew tib len ncuuan win niaa niapse quie rbebni, tiblo nceit niazha. Squi zob Jesús lo mezh, güey wnaa co güeychoob me nceit co guic Jesús. ⁸ Zeene gon xpëedscuel Jesús sca been wnaa co, blëë zho, rnee zho:

—¡Pa rieguiala squi pxin zhlë wnaa qui nceit qui!
⁹ Tel niaca mine ndow, pe zhidaa dimi ne nguizh zhow, nquiinpaa dimi co ngaaza lo grë zha ne guiend pe yquiin.

¹⁰ Gon Jesús sca rac zho, dzigo rëbchaa me lo zho:

—¿Pe nacne rlëë to lo wnaa qui? Golsaan me. Par naa nroob non mine been me i. ¹¹ Tel nli lëë racladz to gun to xyudar zha ne guiend pe yquiin, zac ygad to lo zho stib dze, sac tibaque ran to zho; sangue naa zhile laa naa gbiche lo to. ¹² Led pxin zhlëd wnaa rii zhinceit me, sac gon rrieequia laa me bzhixcuaale xcuerp naa nu gal dze ne ygueetsa. ¹³ Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

Güeyto Judas Jesús

(Mr. 14:10-11; Lc. 22:3-6)

¹⁴ Lo gza tsiipchop zha ne nac xpëëdsuel Jesús ga, brie zha ne lë Judas Iscariot güeyzodiidznie Judas grë zha ne nac pxoz ne rnabey, ¹⁵ rëb Judas lo zho:

—¿Palal quizh to naa telne gun naa Jesús ntregar lo to?

Dzigo biaan zho diidz quizh zho Judas galptsii pes plat.

¹⁶ Nacne psilo Judas noguib Judas dien zha gdeeda diidz csan Judas me ladznia zho.

Dowxtseenie Jesús xpëëdsuel me

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Mer dze ne rsilo lni Pascwa, len dze ne sca row zho quietxtil ne riotsd ncobi ga, bnabdiidz xpëëdsuel Jesús lo me dien pa lo racladz me tsiegunlo zho ncuane gowxtseenie me zho wdze co. ¹⁸ Dzigo rëbcha me lo zho:

—Nanle to ganle cho lidz zrieelo gdziñ ne. Goltsie Jerusalén golguiab lo zho: “Znu në xmaistr no: Gneedz luu lidz luu me dioow no xtsee Pascw rii. Niinataa laa xtse me bdziñ, gane racladz me lidz luu nu diowxtsee no nawdze grë no me.”

¹⁹ Dzigo laa zho zie. Güey zho zaatne pxeel me zho ga, ga beenlo zho xtsee co.

²⁰⁻²¹ Wdze co, laa me no xtsee grë me zho, zeene bnee me lo zho rëb me:

—Gacnan to ganle, lëëque tib to gon tsielo naa ladznia zha ne gnaaz naa nawdze rii.

²² Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnë dien, ¿cho gun min co? ¿Pe naaw?

²³ Pquiab me rëb me lo zho:

—Zha ne gan to csëëb xcuun len xquien naa, lëë zho ga.

²⁴ Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, ¿probsaxe zha ne tsielo naa ladznia zho! ¿Mazd wen nie zho, ib niacd zho miech lo guidzliu!

²⁵ Yeze Judas rnabdiidz lo me rnee Judas:

—Maestro, ¿pe goon naaw ye?

Rëbchaa me lo Judas:

—Luuw gon Judas, luu güeyto naa.

²⁶ Laa zho noyow, zeene bzhen Jesús tib guietxtil, bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Golquiina, lëë xcuerp naa i gon.

²⁷ Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo pteed me cop co lo zho grëse zho, rëb me:

—Golguie vin qui, ²⁸ sac lëë xchen naa i, miñe no gzhiee par guiaanmbe grë miech lo xtol zho sëëb zho xnëz Pxo^z naa, sac lëë stib mod cub nu psan me parne sëëb miech xnëz me. ²⁹ Lëë lultm vuel^t nu guie naa vin rii, sac zhaale stib vin cub ne guie naa gal dze ne guienie naa tow zaatne rnabey Pxo^z naa.

Dzigo psilo me biilnie me Dios gza me zho.

Bzeet Jesús zha gon Pedr

(Mr. 14:26-31; Lc. 22:31-34; Jn. 13:36-38)

³⁰ Blozhse biilnie zho Dios, laa me brie^e ga gza me zho, laa me zienie zho nëz Gui Oliv.

³¹ —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxiiil.”

³² Mincopaa nagon gon miech naa, per zeene laa naa grie^eban glole naa ga Galilé, ga cuëz naa to.

³³ Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

³⁴ Pquiab me rëb me lo Pedr:

—Gneli naa lo luu ganle, guieel riigazh, gardle ycuedz gall, laa luu csale tson vuel^t guiab luu runbeyd luu naa.

³⁵ Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa.
¿Pe nacne guiep naa runbeyd naa luu?

Scaque rnee grëraa xpëëdscuel me.

Bzodiidznie Jesús Pxoꝝ me Getsemaní

(Mr. 14:32-42; Lc. 22:39-46)

³⁶ Zeene bdzinnie Jesús zho zaatne lë Getsemaní, dzigo rëbchaa me lo zho:

—Nuse nagon golsob, laa naa ga gazodiidznie naa Pxoꝝ naa.

³⁷ Horco psilo mban rac zdoo me, riabguieinë me, dzigo bredz me Pedr, ni grop xingan Zebedé, bzënie me zho palal ³⁸ dzigo rëbchaa me lo zho:

—Mban rac zdoo naa, zootle zig zet naa lo guieinë rii. Nuse nagon golguiaan, per golsobna.

³⁹ Bzë me spalal, dzigo pquiitsgzhib me haxta bdziñ lo me lo liu; psilo me bñab me lo Dios, rëb me:

—Papá, laa naa rñab lo luu, telne zala zdoo luu, bzhiguiel psilaa naa lo grë guieinë rii. Miñ rii rñab naa lo luu, per telne grieeloda, miñe gnëtaa luu, miñ co gac.

⁴⁰ Zeene guso me, güey me zaatne biaan gza tson zha co, gon me laa zho nixguiesle; dzigo rëbchaa me lo Pedr:

—¿Pe ni palal blëbde to nzobna to? ⁴¹ Golsobna, golñab lo Dios zeena yquiild menox to. Niicle ne squi lëbdraa xcuerp to sobna to, per golñab lo Dios, sac gon miñ co nac miñe racladz zhiespíritu to.

⁴² Dzigo güey me stib, güeyzodiidznie me Dios; scaque miñe bñab me glo miñcoque bñab me. ⁴³ Zeene wbiire me bdziñ me lo zho, gon me laa zho nixguieslaque, sac lëbdraa zho mcaal. ⁴⁴ Wbiire güey me güeyñab me lo Dios, scaque miñcoque bñab me. ⁴⁵ Zeene laa me wbiretaa bion vuilt co, rëbchaa me lo zho:

—Lëew nagon, zacle na gagueies to, zacle gdziiladz to. Naa ne nac naa Mgui ne pxeel Dios, laa hor nagon bdzin zeene laa grë miech ntseeb rii guiadnaaz naa. ⁴⁶ Gołtsieso, zeena zio ne; sac gon laa zha ne glu naa lo zho ziaadle nu.

Bnaaz zho Jesús

(Mr. 14:43-50; Lc. 22:47-53; Jn. 18:2-11)

⁴⁷ Laa Jesús bii quianeeque, zeene laa Judas (tib zha ne nac xpëedscuel me) bdzin, bdzinnie Judas tib dzoon zha ne pxeel grë pxoz ne rnabey, ni grë zha ne nac zha non lo men guiedz Israel. No zho nzhen spad, nogaa zho nzhen yag. ⁴⁸ Biaanniele Judas zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas, lëe me ga, ligier so zho gnaaz zho me. ⁴⁹ Zigne bdzin Judas pqiaabdiuzh Judas me, blozhse ga wbig Judas dow Judas bzhid cuas me. ⁵⁰ Dzigo rëbchaa me lo Judas:

—Judas, ¿pe ziaadgun luu nu?

Lëëlëd wbig be grë zha co, bzhen zho me. ⁵¹ Horco biet tib zha ne rzënie me ga, bdoob zho zhispad zho psilaa zho tib niaw, bliengaa zho diag tib zha ne rquia xtsiin men ne nac pxoz nroob. ⁵² Dzigo rëb Jesús lo zha ne pqiaaaw ga:

—Blootsow zhispad luu, ib gundraa luu squi cob luuw. Sac gon zha ne rdil con spad, noxtseeb ne low guet zho. ⁵³ ¿Niacxe nan to na grieelod gnab naa lo Pxoz naa niina cxeel me tsiipchop partid xanjł me guiaadla ne nu? ⁵⁴ Per telne sca gun naa, ¿zha dzigo gac mine zhobnee lo Xtiidz Dios, zaatne raquiet mine noyac nu?

⁵⁵ Dzigo rëbchaa me lo grë zha ne bdzin ga:

—¿Pe nacne squitaa rac to? ¿Niacxe naa cho zha ntseeb, ne squitaa nzhen to spad, nzhen to yag ziadnaaz to naa? Blactaa name gon to noseed naa miech len yadoo, ¿pe nacne bnaazde to naa ga? ⁵⁶ Per ible laa grë ncuuan

rii gon noyac, zeena grieequia grë mine bzeet grë zha ne biadteed xtiidz Dios lo miech padzeela.

Horco grëse zha ne nac xpëedscuel me laa zho bzhooñ, tipse me psan zho ga.

Güeynie zho Jesús lo zhiwxtis zha Israel

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ga brieenie zho Jesús bdziñnie zho me lidz Caifás, men ne nac pxoz nroob. Grë zha ne rnabey lo menguietz Israel, laa zho ndxiele ga. ⁵⁸ Ye Pedr maase zit zit nal Pedr laa Pedr bdziñ xley men co. Bdziñ Pedr güeysobga Pedr lo grë zha ne ndxienap, quiambëz Pedr dien zha gun zho Jesús.

⁵⁹ Grë pxoz ne rnabey, grë zha ne nac zha non lo menguietz, grëse zha ne nac wxtis, laa zho ndxie nëz len yu co, quiaguib zho zha ne gzhixcuua maase diidzguizh ycaadz zho Jesús, parne gdeeda diidz gnab zho guet me.

⁶⁰ Ndal zha ne sca been, per brieequiad xtiidz zho, sac zhaase zhaase rnee zho. Tibaque zeene guso chop zho, ⁶¹ rëb zho:

—Bdzion no gon rnee me laa me ctixche yadoo ne zob lad guiedz nu, zaatne riodziañ ne Dios, lozh ga tsonaque ngbidz gzaalo me stiba.

⁶² Dzigo hor co bzoli men ne nac pxoz nroob, rëb me lo Jesús:

—¿Pe nacre rquiabd luu? ¿Pe nli sca rnee luu, te nlida ye?

⁶³ Gon pxoz nroob co rquiabdaque Jesús, rëbcha me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tel nli Xpëed Dios nac luu, Men ne zëëble diidz ga cxeel me.

⁶⁴ Dzigo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zoob cue Dios

něz derech, ni zeene laa naa guieet gbaa zialzëëb naa lo xcow.

⁶⁵ Horco ptsiez pxoz nroob co xab me, sac blëë me bin me sca rëb Jesús.

—¿Pe mazdraa textigw ne racladz ne? —rëb me—. Laa to binle ganle zha rzëtaa xtiidz me noguitnie me Dios.

⁶⁶ Nana waa, ¿pe gnë to zha dziuun ne me?

Pquiab be zho rëb zho:

—¿Ib rieguial guet me!

⁶⁷ Dzigo hor co psilo zho nosacsi zho me. Zha ne rtsuc lo me, zha ne rdeed puñet me, nogaa zho rgap lo me, ⁶⁸ rlozh ga rzhidznie zho me rnee zho:

—Luu ne nac luu men ne pxeel Dios, ¿bnë dien cho ga bdiñ luu?

Rëb Pedr runbeyd Pedr Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Horco laa Pedr bii zob něz ley. Ga zob Pedr, güey tib ndzoop ne quia dziin lidz men rnbey co; rëb ndzoop lo Pedr:

—¿Ye luu lëë rzënie Jesús, men Galilé ne bdziñnie zho i?

⁷⁰ Per bneelid Pedr. Squi zob grë zha co, rëb Pedr:

—Riend naa dien cho men rnee luu.

⁷¹ Laa Pedr ziele něz ro puert ne quia ro něz, zeene gon stib ndzoop ne rquia dziin ga Pedr, rëb ndzoop lo zha ne ndxie ga:

—Ye mgui qui gon nacgrë men Nazaret ne bdziñnie zho i.

⁷² Scaque bneelid Pedr, haxta rzeet Pedr Dios rëb Pedr runbeyd Pedr me. ⁷³ Wdzeepaaw, rëb zha ne ndxie ga lo Pedr:

—Ne nligaa ye luu rzënie men ne bdziñ i. ¿Rlupaa name zig rnee zha něz Galilé rnee luu!

⁷⁴ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidzlid nu rne naa, maase cuibdee naa.

Loxaque blozh sca brie ro Pedr zeene laa tib gall pcuedz. ⁷⁵ Horco psoladz Pedr xtiidz Jesús zeene rëb me lo Pedr: “Gardle ycuedz gall, tsonle vuelt rëb luu runbeyd luu naa.” Dzigo mbanse rac Pedr. Brie Pedr ga, psilo Pedr biin Pedr guielnë co.

27

¹ Ziadyiinile liuw, wbiire pcaalsa grë pxoz rnabey, grë zha non lo menquiedz, bnediidz zho dien zha gnabey zho guet Jesús. ² Blozhse bzodiidz zho, dzigo laa zho bzobdoo me blee zho me ga ziesan zho me lo Pilat, men ne nac gobernador.

Gut Judas

(Mr. 15:1; Lc. 23:1-2; Jn. 18:28-32)

³ Laa Judas Iscariot zha ne pto Jesús ga, zeene bin Judas laa zho rnab guet me, lëëlëd güey Judas lo grë pxoz rnabey co, lo grë zha non lo menquiedz ga, zietsire Judas dimi ne bdiizh zho Judas ga. Mban rac Judas, ⁴ bdzin Judas rëb Judas lo zho:

—Naraa rien naa lëda nu ben naa. ¡Tib dol nrooble nu, znu bialto naa tib men ne peet xtold!

Pquiab zho rëb zho:

—¡Mincotaa gon ndiond no! ¡Xcuentzhe luu ga!

⁵ Horco pchel Judas dimi co len yadoo. Lo guielnë co brie Judas ga güey Judas lëëque Judas pxiiyan Judas.

⁶ Grë zha ne nac pxoz rnabey ga, güey zho ptop zho dimi co. Per blozh ga, riend zho dien zha gun zhow.

—¡Zha dziuun ne dimi rii? —rëb zho—. Telne guiaana yadoo, per rdzieelda, sac gon xchen tib miech bdzëew.

⁷ Dzigo bzodiidz zho dien zha gaca, nacne mazd pquiin zhow bzhii zho tib lë liu, zaatne rdieen yu ne ríaa grë ncuuan psin ne rquiin; parne lo liu co ygueets grë zha zit ne guet Jerusalén. ⁸ Nacne brieelë liu co “Liu ren”, ni sca runbey zhow len dze rii. ⁹⁻¹⁰ Ga brieequia mine bzeet zha ne biadteed xtiidz Dios padzeela, zeene rëb zho: “Galptsii pes plat ne bzhii zha Israel men nziuu co, dimi co bzhii zho tib lë liu, zaatne rdieen yu ne ríaa grë ncuuan psin ne rquiin. Sca në Dios lo naa.”

Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

¹¹ Bdzinne zho Jesús lo Pilat, ga bnabdiidz Pilat lo Jesús rëb Pilat:

—Bnë dien, ¿pe nli luu nac zhirey zha Israel?

Pquiab me rëb me:

—Nliw.

¹² Grë zha ne nac pxoz rnabey ga, ni grë zha ne nac zha non lo menguietz, rzadraa ncuane rquiaqui zho me; per ni tib diidz rtsired me lo zho. ¹³ Dzigo rëbchaá Pilat lo me:

—¿Pe nacne rquiabd luu? ¿Pe ib rond luu grëtaa ncuane rquiaqui zho luu i?

¹⁴ Bzee zdoo Pilat gon Pilat, ible rquiabd me.

¹⁵ Gzobse iz, zeene ral lni Pascw rnabey Pilat rlaa tib zha ne no ladzguiib, zha ne gnabtaa menguietz laa. ¹⁶ Len dze co no tib zha ntseeb ladzguiib lë Barrabás, zëëb xtiidz zho.

¹⁷ Nacne rëb Pilat lo grë zha ne ndxie ga:

—¿Cho racladz to csilaa naa? ¿Pe silaa naa Barrabás, te silaa naa Jesús ye, men ne nac diidz pxeel Dios lo to?

¹⁸ Sca rëb Pilat sac bien Pilat loxaque porne ndal miech nobig lo Jesús min co ne rlëenie zho me, bnabey zho bgaa me.

¹⁹ Laa Pilat zob lo xcan ne run me guielwxtis, zeene bdzin tib mandad rëb lo me:

—Znu në tseeel luu: bzhiguiel me peet gund luu men qui, rlu peet xtold me; sac nieewdze me nroob ptseb mcaal tseeel luu.

²⁰Grë zha rnabey co, bio zho pquiil zho menguiiedz gnab zho csilaa Pilat Barrabás, ni gnab zho guet Jesús. ²¹Zeene wbiire Pilat bnabdiidz Pilat stib, dien chopaa racladz zho laa, grëse zho nguiiedz pquiab be zho, rëb zho:

—¡Barrabás psilaa!

²²Dzigo rëbchaa Pilat:

—Men ne waa nac diidz pxeel Dios lo to nu, ¿zha gun naa me?

Pquiab zho rëb zho:

—¡Bnabey yquia me lo cruz!

²³—¿Per pe nacne yquia men rii lo cruz? —rëb Pilat—. ¡Ni tib dol rapd me!

Biireque zho nguiiedz roptsie zho rnab zho yquia me lo cruz. ²⁴Gonse Pilat rquiaadiagd zho xtiidz me, lel mazdraa rac zho, dzigo bnab me nis, squi ndxie zho bdiib me nia me, rëb me lo zho:

—¡Nanle to nasca, led xtoldraa naa nu ne laa xchen men rii gzhiee, sac nanpaa naa peet falt rapd me!

²⁵Pquiab be zho rëb zho:

—¡Peet nacd ga! ¡Zhits no grë xpëed no cuib dol co, na no guiotizha!

²⁶Dzigo bnabey Pilat blaa Barrabás, laa Jesús racse me bnabey me zha ne bdiin Jesús, blozhse ga laa me psan Jesús ladznia menguiib ne tsiequiaa me lo cruz.

²⁷Biire grë menguiib co bzëebnie zho me nëz len yulow, ga pcaalsa grëraa menguiib ne nacgrë zho, brin zho igose me. ²⁸Blee zho xab me, bgacw zho me tib lar nizhnie nlaan, zig rna lar ne racw grë rey, ²⁹bzieecw zho bla lë yag guiets, bzoob zhow guic me zig rzob coron guic zha

ne nac rey, ni bloo zho tib lë goobgui nia me. Ruṅguzee zho me, rquiitsgzhīb zho lo me, rnee zho:

—ǝGolwi ganle zha ractaa zhirey zha Israel!

³⁰ No zho rtsuc zho lo me, rgob zho goobgui ne no nia me ga, rdeed zhow guic me.

Güeyquiaa zho Jesús lo cruz

(Mr. 15:21-32; Lc. 23:26-43; Jn. 19:17-27)

³¹ Blozhse sca bdziitnie zho me, blee zho lar nizhnie co lad me, bgacw zho me xab me stib, dzigo laa zho brieenie me ga zienie zho me zaatne yquia me lo cruz. ³² Nëz zienie zho me bdzieel zho tib meṅ Ciren lë Simón, bnabey zho meṅ co bi me zhicruz me.

³³ Zeene bdziṅ zho zaatne nac “Gui Beerguic Ngutoo” (Gólgota), ³⁴ ga bdeed zho nziu lo me notsa tiblo guizh nlayag, per zeene pquiaaro mew bien me nziu cow, bnëd me nie mew.

³⁵⁻³⁶ Blozhse pquiaa zho me lo cruz, bzhen zho tib xab me pchug zhow biaannie zho tib lëgaw, laa stiba bio zho rif; dzigo laa zho bzob ga, bzobnap zho. ³⁷ Guic zhicruz me, ga pquiaa zho bla lan diidz zaatne rnee: “LËË JESUS NU, MEN NE NAC ZHIREY ZHA ISRAEL.” Sca pquiaa zho, sac miṅco pquiaqui sca pquiaa zho me lo cruz. ³⁸ Ye chop ngbaan pquiaagza zho me lo cruz, tibga zhicruz zho bzo tib nëz cho zhicruz me. ³⁹ Grëse miech ne rdedtaa ran zho laa me quia ga, rzhidznie zho me, haxta rdzi zho guic zho ⁴⁰ rnee zho lo me:

—Led rëb luu lëë laa luu ntsil yadoo, ni tsonaque ngbidz nzaalo luu stiba, ǝpe nac dzigo rrieelod luu guieet luu i? Telne nli Xpëed Dios nac luu, biet lo qui.

⁴¹ Scaque grë pxoz rnabey, grë maistr ley, grë zha farisé ni grë zha ne nac zha non lo menguedz, rzhidznie zho me, rnee zho:

⁴² —Stib miech scataa beenguiac me, stib miech scataa bla me, ¿pe nac dzigo rriee lod me gla me me? ¿Goon me name nac zhirey ne, quiet me i sca zho; zeena dzuunbey ne men r nabey nac me! ⁴³ ¿Conque tant rnalo me Dios, haxta rnee me Xpëed Dios nac me, guiaadsilaa Dios me i nazho!

⁴⁴ Ye ngbaan ne quiagza me lo cruz ga, mincoque rbidzgo zho lo me.

Gut Jesús

(Mr. 15:33-41; Lc. 23:44-49; Jn. 19:28-30)

⁴⁵ Zig groł dzew, tibaque zeen goc tib ncow dipse lo guidzliu, haxta las tres biao biini stib. ⁴⁶ Horco nguiedz zëeb tsi Jesús, rnee me:

—Elí, Elí. ¿Lama sabactani?

Diidz co nac zig nac ne rnee ne: Luu nac xDios naa, luu nac xDios naa. ¿Pe nagne psaan luu naa?

⁴⁷ Zha ne ndxie ga, zeene bin zho sca rbedz me, no zho rëb Lí, men ne biadteed xtiidz Dios padzeela, men co rbedz me. ⁴⁸ Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me. ⁴⁹ Laa zla zho rnee:

—Psaan, nu dzian ne dien pe ziaad Lí guiaadlit Lí me i.

⁵⁰ Tibaque zeene pquiaa me stib redz nroob, znuse blozh me.

⁵¹ Horne nolozh me ga, hor co briez nzoli lar nroob ne quia len yadoo, grołtaa goca; psilo bni tib zhodox, grë quie masaque wbila, ⁵² nzian ro baan grë zha ne bnalo Dios mazd padzeela bzhial. ⁵³ Zeen gol dze ne brieegan me, ye zho laa zho brieegan, brieeg zho len baa, bzëeb zho lad nguiedz; nzian miech ne gon zho.

⁵⁴ Grë menguiib ne quianap me ga, ni zha ne rnabey lo zho, zeene gon zho bni zho co, ni gon zho grë ncuane goc ga, per nli bdzieb zho.

—¡Ne nlipagaa —rnee zho—, Xpëed Dios nac men̄ qui!

⁵⁵ Nzianlaa men̄ wnaa, zit zo zho rwi zho. Lëë grë men̄ wnaa co güeynal̄ zhits Jesús, been̄ zho xyudar me dipse len̄ dze ne pseed me miech, desde dze ne psilo me nëz Galilé.

⁵⁶ Lad co no Marí Magdal, Marí tsieel Zebedé, ni Marí ne nac xniaa Jacob grop José.

Bgueets Jesús

(Mr. 15:42-47; Lc. 23:50-56; Jn. 19:38-42)

⁵⁷⁻⁵⁸ Zhile sëëb ngbidza, zeene bdziñ tib mgui lë José lo Pilat, bnaab me diidzbey tsielit me xcuerp Jesús lo cruz; tib zha ricwa, men̄ guiedz Arimaté nac me, ye me zienal̄ zhiwseed Jesús. Nacne pxeel̄ Pilat diidz lo zha ne quianap Jesús ga, parne siguiel̄ zho glit José me lo cruz.

⁵⁹ Dzigo güey José. Blozhse blit José me lo cruz, laa José neyle tib lë lar cub, pchel̄ José me lar co, ⁶⁰ güeyxob José me tib len̄ baa ne nacchen̄ José ndieen̄ tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey. ⁶¹ Laa Marí Magdal bii biaan̄ ga, grop me stib Marí ne nacgrop me ga; zobse zho gax ro baa co.

⁶² Biini liu co, pcaalsa grë pxoz rnabey, grë zho zha farisé, güey zho lo Pilat, ⁶³ rëb zho:

—Gun̄ luu dispensar, laa no ziaadaque lo luu stib. Naraa rsoladz no, len̄ dze ne bii mban men̄ ntseeb ne sca biaadquidie miech ga, rëb me, zeene gac tson̄ ngbidz guet me laa me grieeban. ⁶⁴ Gane ziaad no lo luu, bzhiguiel̄ pxeel̄ zha ne yquiaanap ro baan̄ me haxta gac tson̄ ngbidz co; sac nend tsie zha ne nac xpëedscuel me tsiebee zho me, lozh ga guiab zho laa me brieeban. Nan̄le luu gan̄le, tel̄ gac min̄ co, cho gnë peraa gzhixcuaa zho.

⁶⁵ Dzigo rëbchaa Pilat lo zho:

—Telne sca racladz to, laa tib partid menguiib ndxie i. Goltsienie zho, golguiab lo zho yquiaanap zhow tel zha racladz to.

⁶⁶ Dzigo laa zho zie zienie zho grë menguiib co. Bdzin zho bloo zho tib bey cho quie ne nioog ro baan Jesús ga, par glu tel cho zha ne tsiegaala, ni biaan grë menguiib co yquiaanapa.

28

BRIEEBAN JESUS

(Mr. 16:1-8; Lc. 24:1-12; Jn. 20:1-10)

¹ Zna dze goc dze ne rdziiladz zho lo dziin ga, biini liu, dze ne rsilo zhmäl, silgaw zie Marí Magdal grop me stib Marí co zieso zho ro baan Jesús.

² Lëëtaaque hor co bni tib zhodox, lo zho co biet tib xanjl Dios gbaa bdoob me quie nroob ne nioog ro baa co, bdiix mew tib lad, bzobga me lada. ³ Masaque rlu me zigne rlu belye, xab mew, nquitsbie rnaw, zig rlu zaatne ndxie guieg. ⁴ Grë menguiib ne quianap ro baa ga, zeene gon zho anjl co, per nli bdzieb zho, rzhidz zho. Lo dzeb co, pcowgagh zho, grëse zho biab liu. ⁵ Zeene laa grop wnaa co bdzin, rëbchaa anjl co lo zho:

—Gdziebde to. Nanle naa Jesús men ne pquiaa zho lo cruz ga, men co ziaadguib to. ⁶ Per guiendle me nu, jlaa me brieabanle zigne bneele me ga! Golwi ganle nu nac zaatne pxob zho me. ⁷ Niinagagh goltsie goltsienie diidz lo xpëedscuel me, golguiab lo zho laa me brieabanle. Galilé me cuëz me zho, ga gan zho me. Laa to nanlew nasca.

⁸ Lëëlëd brieeg grop wnaa co ga, rias zho laa zho zienie diidz lo xpëedscuel me; lala rdzieb zho, ni lala rley zho. ⁹ Laa zho zie, tibaque zeene gon zho laa Jesús zole lo zho, ine pquiaabdiuzh me zho. Horco wbig zho pquitsgzhib zho lo me, bdeedz zho ni me. ¹⁰ Dzigo rëbchaa me lo zho:

—Gdziebde to. Gołtsie gołtsienie diidz lo grë zha bets naa, gołguiab lo zho tsie zho Galilé, ga gan zho naa.

¹¹ Horcoraa laa bla zhaguiib ne pquianap ro baan Jesús ga bdziñ lad guiedz. Güey zho lo grë pxoz rnabey, bzodiidz zho zha gon zho bzhial ro baa co. ¹²⁻¹³ Dzigo pcaalsa grë pxoz co grë zho zha ne nac zha non lo mengüiedz, dien zha gun zho. Nacne biaan zho diidz, mazd gdeed zho dimi lo grë mengüiib co, parne gneelid zho, sinque guiab zho, segur xpëédscuelaque me güeybee me len baa, per biend zhow sac nixguies zho. Nroob dimi bdeed zho lo grë mengüiib co, ¹⁴ rëb zho:

—Peet tsienied guic to, niicle telne gon gobernadora na no guionee lo me, zeena peet gund me to.

¹⁵ Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne bina len dze co, masaque bliladz zho nli sca goca, jni haxta lo nadze sca zienie guic zho!

¹⁶ Zeene bdziñ dze ne gdjeelo Jesús xpëédscuel me nëz Galilé, brieegza tsiiptib zha ne bzo gaxpaa lo me ga, güey zho nëz co; bdziñ zho guic gui ne rëble me ga gdjeelo me zho. ¹⁷ Zeene gon zho me pquiitsgzhib zho liu.

Lo grë zha ne ndxie ga, no zho rienpaa lëe me ga, nogaa zha ne bii racchop guic. ¹⁸ Dzigo wbig me lo zho, rëb me:

—Laa to gonle nasca naa rnabey. Grëse ncuane no gbaaw, nogaa guidzliuw, ladznia naa psan Pxoz naaw. ¹⁹ Niina nagon, laa naa rsan diidz lo to: gołtsie dipse lo guidzliu, gołtsieseed miech gac zho zha ne sëeb xnëz naa, gołchoobnis zho, gołguiab lo zho lëe min co rnabey Pxoz naa, rnabey naa ne nac Xpëéd me, ni rnabeygaa Espiritu Sant. ²⁰ Gołseed zho gban zho, grëse mine bnabey naa to gun to. Min co rsan naa diidz lo to gun to; ni gacnan to ganle, ib csaand naa to, gzataa dzew niicle haxta dze ne nitlo guidzliuw, naa gacnie to.

Diidz ne rdeed guielmban

New Testament in Zapotec, Mixtepec (MX:zpm:Zapotec, Mixtepec)
copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 14 Jun 2022 from source files dated 9 Jun 2022

5317ca58-7555-5e4c-a420-e1e9210e2df2